



書叢本基學國

集 憲 元

(下)

撰 庠 宋

行發館書印務商

中華民國二十六年三月初版

(61320)

國學基金元憲集 二冊

每部實價國幣叁角五分
外埠酌加運費匯費

撰者 宋 庠

發行人 王 雲 五
上海河南路

印刷所 商務印書館
上海河南路

發行所 商務印書館
上海及各埠

(本書校對者 何德明 林仁之 張叔介)

元憲集卷十八

表

十月一日奏告南京鴻慶宮太祖皇帝表

伏以告朔紀常。戒寒協序。瞻言像設。載極時思。恭惟尊謚皇帝。功冠往初。道隆燕翼。肇王基于有截。享天配于無窮。適履孟辰。永懷遺烈。

十月一日奏告永定陵眞宗皇帝表

伏以就盈紀月。司閉成冬。惕悽愴于非寒。悼劬勞于罔極。恭惟尊謚皇帝。道勳冠古。德澤涵幽。罄圖牒以輸祥。擁慶靈而祚世。眇沖攸賴。摧感何云。

十月一日奏告永定陵莊獻莊懿莊惠皇太后表

伏以寒律甫升。孟躔適會。方班吉朔。實感先慈。恭惟尊謚皇太后。德茂坤元。化流椒極。溢話言于彤史。闕柔景于仙園。追荷顧存。舉成哀塞。

十月一日奏告西京應天院太祖太宗眞宗皇帝表

伏以冬朔肇端。孝心叢感。仰別京之淨刹。肖華表之眞游。恭惟尊謚皇帝。神化溥將。睿謀燕翼。早肅在天之御。參綿卜鼎之期。方荷慶圖。敢忘時惕。

十月一日奏告永定陵眞宗皇帝表

伏以天運弗停。水行茲始。感霜露非寒之惕。結衣冠游月之悲。恭惟尊諡皇帝。功濟三靈。道包衆甫。軼鴻名于上世。叢寶訓于來昆。皇照靡渝。時思罔極。渺瞻靈寢。無喻哀悰。

十月一日奏告永定陵莊獻莊懿莊惠皇太后表

伏以冬管命時。歲陰布序。俯愴戒寒之候。聿深追遠之思。恭惟尊諡皇太后。坤載輸和。人倫託始。藹母闈之慈範。溢女史之芳猷。茂庇眇沖。永懷顧復。淒凝肇集。感塞何云。

年節賀皇太后表

元朔甫新。羣萌僭達。因慶儀之在旦。感慈訓之遠顏。恭惟尊諡皇太后。徽範映辰。柔風冠古。擁慶靈而祚世。育微眇以承祧。追荷恩勤。永焉摧塞。

賀西京應天院太祖太宗眞宗表

伏以瑞歷開端。羣萌達氣。當治朝之普會。極仙駕之永懷。恭惟尊諡皇帝。道冠往初。文包載籍。恢世年于鼎卜。盛詒燕子孫謀。仰賴丕休。益深遐感。

中元節奏告南京鴻慶宮太祖太宗眞宗皇帝表

伏以商瑄開秋。舒輪旣望。感芳時之將謝。邈仙駕以長遠。竊仰神姿。素嚴靖館。本弓劍軒臺之畏。謹衣冠漢廟之游。適履令辰。敢通哀悰。

中元節奏告永定陵眞宗皇帝表

伏以秋序迎郊。望辰旅夕。邈企山園之重。載驚霜露之濡。按歷未遑。因心若隕。惟百靈之護野。協六氣之在天。嘉節甫新。哀悰永歎。

乾元節內中謝眞宗皇帝表二首

臣忝荷先謨。紹膺丕歷。爰屬誕辰之慶。實資聖系之開。雖著節有常。而銜哀罔極。惟期慎守。少答垂鴻。臣猥以眇躬。紹承丕構。因誕辰之攸屆。感先願以如存。恭惟尊諡皇帝。茂烈欽明。深仁溥博。蹈百王之高致。詒億載之宏模。曾是遙追。敢忘善守。幸循寶訓。迄此昌期。惟勤日慎之誠。仰答天靈之貺。

乾元節內中謝莊獻明肅皇太后表二首

伏以載震紀辰。相沿著令。爰覽慶儀之舊。恍驚慈訓之違。矧熙盛之紹臻。固保安之所及。永懷懿烈。但極哀悰。

伏以司夏凝和。厥生名旦。率朝歡而惟日。緬慈訓以長懷。恭惟尊諡皇太后。德配坤靈。化均天覆。深戒練衣之儉。勗成黃屋之勤。事闕仙游。感叢慶日。庶謹承平之治。永全保祐之仁。

乾元節內中謝莊懿皇太后表

臣孱薄承基。劬勞託慶。方訂露囊之舊。追懷甲觀之祥。恭惟尊諡皇太后。淑聖凝姿。謙勤樹德。飾尊名于嬭廟。留懿範于堯門。慈訓所鍾。眇躬攸賴。永言顧復。曷報生成。

乾元節內中謝莊惠皇太后表

伏以訛致御辰。誕彌紀節。因紹修于慶會。聿追慨于慈顏。恭惟尊諡皇太后。寶儉成猷。體仁逮下。參顧存于先命。專擁育于沖人。獲嗣丕基。率茲柔訓。敢忘勵翼。少報恩勤。

冬節賀南京鴻慶宮太祖皇帝表

伏以周歷紀正。魯儀候物。感迎長之命節。惕追遠以叢思。恭惟尊諡皇帝。握紀先天。開圖罄宇。翼孫謀而可大。謹神教以如存。仰慕睟容。式安真館。未遑恭拜。增極哀悰。

冬節賀南京鴻慶宮太宗皇帝表

伏以天統肇新。朝章有慶。緬動時思之感。式瞻像設之嚴。恭惟尊諡皇帝。至德孚先。洪規裕後。享周廟不祧之配。留軒臺如在之神。仰庇孫謀。誕膺邦祉。敢忘厲惕。永答延洪。

冬節賀南京鴻慶宮真宗皇帝表

伏以氣運循元。星躔迎至。感霜露非寒之忱。極衣冠游月之懷。恭惟尊諡皇帝。道格無方。威覃有截。迪長源于浩劫。正垂統于來昆。尚託仙祠。仰延威御。式臻嘉節。敢致哀誠。

冬節賀永定陵真宗皇帝表

伏以歲律就陰。冬元復始。禮緣胡慶。感倍時思。恭惟尊諡皇帝。躬蹈聖猷。誕膺耿命。勒號榮而高世。詒統業以當天。神駕夕躋。仙園在望。永懷丕烈。罔喻哀悰。

冬節賀永定陵莊獻莊懿莊惠皇太后表

伏以流景弗居。微陽載始。爰屬嘉辰之會。永懷慈訓之遐。恭惟尊諡皇太后。淑哲綏猷。儉慈寶德。茂擁存之善教。協詒燕之深仁。運隔仙游。感鍾長日。展巡未卜。哀涕無從。

冬節內中賀露香表

伏以律肇初陽。景回南極。育幽萌而有漸。翕繁祉以惟新。席眷上靈。布和嘉節。敢虔芳著。用達精誠。降聖節內中謝露香表二首

伏以璿極監觀。雲輶降格。夙昭曠瑞。實紀靈辰。繫冬序之下弦。緬仙游之駐駕。敢忘薰奉。仰答禋祥。伏以仙御降監。靈辰著令。每屬孟冬之屆。緬懷真蔭之隆。爰卽禁庭。奉嚴寶炷。冀憑芬潔。永導寅恭。

天貺節內中謝露香表

伏以月集函鍾。適迎于善氣。天垂綠錯。爰紀于休辰。緬懷瑞節之端。實表先真之志。允依層禁。恪奉名薰。寶騰孔昭。繁禱永賴。

先天節內中謝露香表

伏以順啓秋辰。素標瑞節。肇先媒之寅奉。迹寶蔭以惟遐。爰祓名薰。上瞻沖境。精衷有嚮。茂嘏攸綏。

乾元節內中謝露香表二首

臣某言。伏以序協恢台。辰標震夙。享萬官之稱壽。荷六幕之叢禱。祇燎名薰。通誠寶宙。益祈鑒顧。永祐繁

昌。

伏以維夏開端。厥生逢旦。循邦令祝。延之會。感天俾熾昌之祥。虔奉名薰。上通真界。更期勵翼。永輯休嘉。遂州天慶觀開啓爲民祈福道場密告三清表

伏以西土奧區。民生惟錯。上清寶貺。天鑒攸精。緊道樞應物之宗。有法醮祈祥之式。已獨靖館。卽啓靈場。敢密罄于虔誠。冀嚮臻于介福。庶茲黔細。普荷熙康。

爲南郊下元節更不于景靈宮朝拜奏告聖祖內制表

茲者順攷禮文。謹修郊報。預涓辰于齋戒。將致饗于仙宗。惟水官校籍之辰。有霞館奉觴之舊。敢停常謁。專葺盛儀。冲鑿孔昭。篤誠茲諒。

爲南郊冬節不備薦饗奏告眞宗皇帝莊獻莊懿莊惠皇太后表

伏以近卜天正。紹修帝配。聿嚴備物。親款太宮。惟盛禮之方虔。懼別祠之致躓。敢停常薦。庶一齋誠。爲南郊于大內在京外處道場祈恩保安聖躬奏告三清諸聖表

伏以諏日仲冬。致誠吉時。肅陳齋輅。將次陽郊。雖被濯之載虔。賴聖眞之潛護。庶成嚴配。永迓繁禱。爲南郊于大相國寺道場祈恩保安聖躬奏告諸佛表

伏以廟裸惟嚴。郊薰有典。已涓景至。躬迓神休。將勤陟配之容。願集綏寧之祉。等慈無間。妙蔭焉依。爲南郊于景靈宮道場祈恩保安聖躬奏告眞宗皇帝表

伏以清廟告虔。紫壇陟配。咸先期而蒞事。方率力以奉神。惟是眇躬。庇于先蔭。益希保佑。用克欽承。

爲南郊預告天地社稷表
恭以三載克禋。禮遵舊典。百神竝秩。義重親祠。俯冲眇之纂臨。荷清寧之貺施。洽臻嘉運。丕冒羣生。宜躬執于豆籩。克奉承于郊廟。庶勤大事。仰答靈休。涓日有期。薦辭惟恪。

爲南郊預告太廟表

臣紹承謀訓。獲擁基圖。茂臻太和。實庇餘福。祇事陟配。不敢疏忽。三載而舉。抑惟舊章。幸緣歲成。躬展郊報。仍期裸獻。用罄孝思。繕禮有初。薦信無昧。

爲南郊預告后廟奉慈廟表

恭以報本奉先。是均明察。薦馨盡志。以一親尊。緬惟郊配。實稱祭首。必躬而信。敢憚于行。屬茲順成。圖厥祇事。謝告吉土。紓慨闕宮。方謹先期。用虔孝祝。

爲南郊預告在京諸廟表

恭以郊報之虔。厥惟盛典。景長之序。允協靈辰。爰卜親祠。式揚大號。咸秩之禮。來饗有期。眷惟神聰。胥祐邦慶。

太廟雅飾奏告表

恭以郊配有期。裸迎惟重。瞻言清廟。前戒庶工。以時修除。用謹齋謁。蒞事伊始。薦信敢稽。

爲南郊預前內中奏告露香表

伏以帝時有嚴。齋饗竚駕。紛盛儀而允集。率精懇以方初。敢奉名薰。上通虛界。冀孚眷佑。永保綏寧。

爲南郊預前奏告內中壽寧堂皇儀殿諸佛表

伏以陽管將新。郊祠有報。冀徽茂嘏。宏庇斯民。方躬展于盛容。更旁休于妙蔭。永康國步。胥契慈緣。

爲南郊預前奏告內中福寧殿玉皇北極諸聖表

伏以天統揆辰。陽郊展報。萬靈胥接。四海駿奔。率禮載虔。惟神所相。式通齋懇。用竚冥休。

爲南郊預前奏告內中東園門聖祖天皇諸聖表

伏以涓序一陽。薦馨有昊。已戒期于廟時。將躬執于牲瑄。力是多儀。理資冥祐。敢緣齋告。用集禱祥。

爲南郊預前奏告內中神御慈德二殿諸帝后表

伏以祗率舊章。恭承嚴配。聿奏齋明之式。將勤信次之行。靈蔭所敷。眇躬是賴。庶成熙事。無累先猷。

爲南郊預前于永定陵奏告眞宗皇帝莊獻莊懿莊惠皇太后表

伏以推策涓辰。燔柴令典。適勤眇質。躬對上靈。惟齋禱之多儀。竝訓謀之成式。更祈慈蔭。助集鴻休。

元憲集卷十九

表

謝郊祀加恩表

禮天拜胙。甫畢于鴻儀。括土均休。汎霑于異數。罔功內省。悸魄無從。中謝竊念。臣本以空疎。誤承簡拔。玷從官而積歲。尸榮祿以浮人。凡最所更。風猷蔑樹。曲荷天私之覆。靡循官式之常。超踐諫垣。預聞宰政。屬兵農之竝講。當朝夕之勤咨。徒謁陋愚。無裨紀律。力窮猶駕。衆知敗駁之傷。物重過權。始驗持衡之殆。遭時寬政。勿汝深疵。假淮國之一麾。賀龍躔之再集。皇心念舊。祕秩升華。移守汶田。坐豐周粟。會于郊而陟配。嗟守土之恪居。微蕘翹誠。孤匏擁歎。敢謂伏蒙尊號。皇帝陛下。回輿作解。舍爵推慈。因勞臣工之勒。肯暨州藩之廣。繪書懋賞。星驛馳音。衍多邑于舊封。倍榮租于眞實。命成難拒。恩溢無涯。矧籩豆駿奔。莫觀陪祀之盛。而公卿奉引。了無承乏之勞。逮流慶之叢臻。亦覲顏而虛受。忍慙云極。度德奚堪。惟餘頂踵之微。或効涓埃之報。臣無任。

謝南郊加恩表

禮成陟配。賞洽均禱。優命聿頒。兢心靡據。臣誠感誠懼。頓首頓首。竊念臣本惟寒士。獲玷近班。嚮自禁庭。舉參宰府。斗筭受任。尋貽不稱之譏。天地好生。終靡加誅之忍。特由諫署。出布藩條。積媿盈顏。樹聲寡術。

屬陽郊之大報。罄率土以駿奔。而臣越在守封。舉深存闕。無攝事贊儀之幸。有隳官去國之悲。何圖拜胙之辰。亦沛明縉之典。書勳八柱。爰極于上階。進戶列侯。更陪于大邑。寵章叢被。悻魄九升。此蓋伏遇尊號皇帝陛下。誕擁乾休。洽敷人爵。因雷風之大號。席簪履之餘恩。洒濯深疵。振除往咎。謝生無所。固推不報之仁。失旦思鳴。或取自新之效。大猷雖爾。弱植奚堪。徒誓銜銘。未知酬塞。臣無任。

謝崇文總目加恩表

竊念臣早以片文。誤階榮牒。序服星垣之職。入陪鑾禁之游。凡在官司。多塵總領。爰屬仙瀛之藏。廣收蠶簡之遺。皮閣寢盈。籤題罔辨。特迂詔旨。就擇時英。俾分討于藝文。且精求于領目。遠襲九流之別。近尋四庫之規。通質舊草。日程新課。而臣首膺遷擢。最買歲時。未終刊謬之功。已忝參機之舉。緹鉛清局。別委于俊僚。山藪寬恩。尋投于外服。逮諸儒之卒業。非孤臣之預知。比者伏蒙皇帝陛下。垂覽新書。嘉聞善職。追念摩編之久。靡遺尺寸之勤。爰俾罔功。亦膺蕃數。茂進文階之品。真疏幹食之封。媿集榮先。獎浮願表。上中經之簿。莫接于清班。出內史之方。何勝于渥訓。仰被燭幽之詔。未知論報之階。臨啓徘徊。言因謝盡。臣無任。

謝降詔答諭立御書梵字碑表

寶文就刻。譯侶叢歡。因善護之成功。虔率和而露奏。紆頒制墨。俯煥塵襟。中謝伏惟皇帝陛下。將聖自天。大猷覘古。丕承下武之緒。兼通西聖之言。闡其洪慈。衛我羣品。惟梵文之流布。乃佛說之信傳。雖曰旁行。

實存成法。比乘聽斷之裕。悉標聲畫之元。譬震且之六文。謹舌人之異說。氣瞻雲漢。文含日星。奮天藻以題辭。勒媧珉而庇宇。古今參驗。非科律之難分。華竺雙提。若迦陵之親演。而臣幸陪法席。親覩帝華。不勝鳧藻之情。用列縑囊之感。方塵清覽。遠錫溫辭。覺苑同文。已預人天之會。尙方乙牘。更膺緝縉之襲。徒蒙情涯。曷酬恩遇。臣無任戴天荷聖。激切屏營之至。

進觀御書梵字詩謝降詔答諭表

韓音頌聖。方惡于斐狂。綸檢垂慈。更加于褒獎。觀文眩目。拜賜兢心。竊念臣仕籍叨榮。儒林廢業。滄玷疑丞之地。皆陪潤譯之場。探內學以非優。撫鈍根而永慨。幸遇皇帝陛下。欽揚祖烈。丕護真乘。因竺館之先規。續貝書之妙蘊。盛延開士。深究旁行。對翻華裔之音。博采形聲之說。法宮多暇。書苑留神。爰御寶趺。親題梵畫。仍冠篇而善敍。且作刻以垂芳。紺殿雄成。祇園聳觀。實睿才之攸縱。顧佛劫以增遐。而臣例屬齋薰。獲窺摹矩。不勝私幸。竊綴短章。仰煩夜石之程。已積春冰之畏。敢謂伏蒙陛下。靡捐介善。申寵近司。枉深訓以發中。廓大猷而與進。戴恩嶽重。徒極于將顛。揣己毫輕。未知夫爲報。姑銘獎拂。用真肝脾。臣無任謝詔赴闕表。

使駟光華。甫臨州部。言綸溫密。申錫詔函。聞命震惶。撫躬跼蹐。臣某誠榮誠懼。頓首頓首。竊念臣嚮辭宰政。出布藩條。專處外以首公。顧還朝而絕望。周旋三任。首尾八年。終微樹化之方。可稱惟良之歎。比者伏蒙皇帝陛下。追憐舊物。均賦羣材。因內幄之缺員。降輜軒而垂召。仍緘帝札。曲暢天慈。諭發號之揚庭。俾

解藩而趨節。孤臣何幸。丕訓前頒。未知讓爵之端。先聳捐生之志。感深成泣。言拙無文。方促駕以就途。但望雲而翹首。永言歸報。倍萬常鈞。臣無任。

謝宣召入學士院表

祇聽褒音。仰承睿選。恩浮材限。憂倍榮涯。俯僂以還。心顏罔措。臣某誠榮誠懼。頓首頓首。竊以漢門金馬。始基待詔之華。唐署鑾坡。緒創司言之祕。預規中之訪逮。極朝右之凝嚴。聖世尙文。豐規冠古。慎咨碩彥。增暢皇猷。顧崇簡之有初。奚下流之可冀。如臣者。斗筭均量。舟劍懷慙。偶自諸生。幼親樸學。天聖初元。光華甫協。幽側竝揚。遭會時來。玷塵舉首。自褫巾而補吏。泊縹組以通閨。番直史庭。試煩財府。寸長靡効。曠度兼容。弗誅畫餅之名。更備星垣之乏。雖復奉行王訓。判攝事經。出入四碁。綢繆千慮。終取伐檀之誚。方期汰礫之逃。敢謂伏蒙皇帝陛下。式序衆勤。俯收介善。記甲科之前幸。察孤進之無他。召自綸閣。齒于鰲禁。矧典司至重。號令惟幾。慎方出之文。義無反汗。奉席前之對。威不違顏。自揣儒庸。將焉報稱。然當奉循丕式。載淪蒙襟。希皮弁之守官。免纏牽之貽累。微生易隕。洪覆難酬。臣無任。

河陽謝到任表

進聯省坐。易撫侯封。促駕啓行。適臨治所。選辰署事。初布藩條。祇荷獎甄。不勝榮懼。臣某誠感誠抃。頓首頓首。竊念臣一蒙策免。三寵州遷。祿有空餐。官無最狀。嚮屬盟津之缺守。猥煩漢札之疏恩。升秩夏卿。增華使榮。仍因便道。特許過都。朝推念舊之慈。禮借儀台之重。孤心易感。危涕難收。尋迫王程。遽開郡閣。此

州據山河之會。擁周晉之交。列戌分城。造舟濟險。隄防甚設。譏邏爲嚴。雖曰近藩。實名雄鎮。然而累年饑旱。比日沈災。東有漕渠開塞之煩。北有計檄誅求之苦。使多緣隙。民罕聊生。臣敢不略去煩苛。勤加綏輯。庶臻還定。少副憂勤。俯循備禦之餘。曷稱惟良之寄。此蓋伏遇皇帝陛下。俯矜忠樸。本乏同游。因寰服之奧區。進天臺之峻品。曲加存遇。終保衰遲。身遠天高。恩深語拙。惟有涕泗。尙冀感通。臣無任戴天荷聖。激切屏營之至。

揚州謝到任表

淮海奧區。圭符假守。揚舲戒道。止涉安流。引紱視章。卽頒聖詔。舟楫一都之會。夫家萬室之繁。去國匪遙。偃藩何幸。臣某誠榮誠懼。頓首頓首。伏念臣稟姿蒙拙。陶化亨嘉。始擢草茅。寢階纓綬。斗筲量淺。丞史願微。常蹈道以自安。敢越思而希進。猥由文館。入忝詞垣。俄自禁扃。召參台府。此際清衷。素定。靡復類能。羣議雖諠。罔容收渙。因懷自勵。訖稱大恩。而淺謀不足以計深。愚慮妄思。夫效智。叛羌負德。邊上宿兵。亟會宰司。參圖戎索。廟堂集論。或率己而妄言。帷幄定謀。卒因人而免悔。曾微寸效。可益萬分。至于進策治朝。敷言庶位。纖悉咸資。千容斷。周旋莫企于清光。備位踰年。妨賢積日。雖官箴挈矩。僅守匹夫之廉。而公路須才。安稱明君之蓄。加以恣冥自稟。濩落少機。言或漏于屬垣。疑多成于納履。積有怨咎。仰玷和平。矧當責實之辰。宜被黜幽之典。伏遇皇帝陛下。兼容如地。載煦爲春。盡赦多尤。止停貳職。仍七人之舊列。總千騎于大邦。假以便安。紓其惴慄。顧微生之再造。濱十死以何辭。謹當斂分思愆。首公營職。因楚人之旣教。

濟漢令之在寬。乘乃化孚。期于政辨。然念操心易感。實本于孤臣。求舊與歸。更依于仁后。視風波而累息。儻絲路以迷魂。臨啓怔忡。心隨涕隕。臣無任。

鄆州謝到任表

西清秘秩。式寵儒林。東夏奧區。更均邦翰。參爲異數。猥集孤臣。祇荷甄收。舉增惶震。中謝竊念臣斗筭近器。韋布諸生。興于羈旅之餘。玷厥殊科之選。嚮階華劇。進預疑丞。遭百度之交修。乏寸長而上報。久蒙君養。曷逃尸素之愆。終不汝疵。寢累含容之德。逮從外補。方涉再朞。前忝未酬。來譏已積。敢謂伏蒙皇帝陛下。曲全邦體。由獎官成。枉漢札之深辭。易汝田之巨鎮。冠升殿職。寵映藩條。仍加別使之名。兼撫連城之重。矧惟州部。匪遠寰畿。津陸交途。農商宿業。封巒在望。澤多膚寸之滋。鳴蹕如聞。野有儲胥之舊。茲焉寄任。允屬循良。退念散材。曷勝優委。敢不率循丕憲。上體至慈。獨獄市之煩文。濟詩書之美俗。庶幾安輯。少副憂勤。自餘頂踵之微。或効涓埃之報。辭殫語拙。感激何云。

進國陽大報頌表

臣伏以日在太初之歷。是謂履長。天隨帝者之居。茲焉臨饗。挖三堦而昭事。坐兩觀以均禱。徧朝眞馭之下都。翕受羣元之厚福。合生鼓舞。協氣陶蒸。忝蹈德以泳仁。宜交中而發外。中謝竊念臣單門下品。弱植淺中。被至化之純深。副大猷之餘緒。翹然在泚。廁君子之育材。間或登高。乏大夫之能賦。屬承平之嗣且。講容典以和神。南北異正而竝修。祖宗以侑而交獻。周游六氣。乘之而健行。盼饗萬靈。屑然而著感。目美

光之若晝。欽衆瑞以如山。矧當清道之辰。已預皇軒之引。瞻威咫尺。稟訓螭蛸。慶千載以親逢。暢四支而內抃。幸聯儒館。難默頌聲。愬積日以庇詞。邈談天而幾殆。僅成累句。式贊盛容。均子夏之一詞。〔案〕原邦體本虞初之小說。敢預家流。仰瀆程觀。彌增震媿。謹夙夜齋祓。撰成國陽大報頌一篇。隨表上進。以聞干浼。宸辰。臣無任。

傳法院乞降御集編入經藏表

臣聞帝藻垂鴻。本春山之祕蘊。金言輯教。極龍藏之寶嚴。迹夫翰墨之傳。均乎天壤之永。矧當盛際。抑有豐規。敢露虔衷。仰資外護。臣等誠惶誠懼頓首頓首。恭惟皇帝陛下。道包容哲。化格清寧。總民極以無頗。陶天倪而不宰。多能攸縱。衆善咸甄。睿佛譯之清場。本神宗之妙刹。香壇貝牒。慎宣使範之雄。綈帙牙籤。對比儒林之盛。克延慧命。參固不圖。然念永熙以上聖之姿。首敷神教。真妙以至仁之度。益闡慈源。竝因機務之閒。咨探空有之理。宸章睿采。法語仙音。率賜助于禪詮。已冠升于釋部。陛下紹隆先志。宏暢宗風。每緣聖作之華。備獎真乘之奧。人天抒歎。象緯交輝。緜涉歲時。寢盈策牘。未序寶題之次。曷聳沙界之聞。臣等叨服宰司。兼榮法館。悵鈍根而懵學。依洪覆以知仁。願續前徽。俾資善述。欲望聖慈。許以自來御製。應干釋宗文字。降賜傳法院。令釋經三藏。試光祿卿沙門惟淨等。依例編綴。竝入經藏目錄。庶茲總括。庸盛發揮。茂彰奕世之能。高映羣篇之首。且孚大覺。永庇含生。饒益之多。名言曷喻。干冒宸辰。臣等無任。

謝加職移知鄆州表

輕軺將命。祕殿參華。易守東藩。治行便道。寵章繁集。媿汗交流。臣某誠榮誠懼。頓首頓首。竊念臣世系單平。天姿淺固。親遭尙文之會。首叨擢秀之科。因士易農。緣名責實。褫巾未久。通籍爲榮。乘善養于羣材。預徧階于顯列。曾微風績。遂亞疑丞。齷齪備員。兢兢履薄。物勝權而衡殆。形過鑑而照窮。理有固然。道無不躡。果煩賜罷。方厭騰譏。尙蒙藏疾之仁。尋假出麾之寵。奄綏淮服。坐服漢條。省咎窮年。酬恩靡日。比者伏蒙皇帝陛下。哀憐舊物。拔拭深疵。念器使之嘗加。忍生成而遂棄。曲回天造。申穆朝猷。序聯清禁之崇。再委名城之寄。仍銜使節。參重州符。悅祇命以驚魂。徒拜嘉而隕涕。桑榆收效。已辱于垂矜。頂踵捐生。未知夫上報。臣見依準勅命。取便路發赴本任。無任瞻仰。

代楊鄆州謝上表

臣某言。蒙恩授臣知鄆州軍州兼管內勸農事。卽于今日到任。上訖。謬分左契。臨長東人。提千騎之雍容。有六條之森備。出麾有幸。坐閣增榮。中謝竊念臣箕斗虛名。丘園微介。決科僅中。論績稍遷。遵明辟之纂圖。忝望郎而升秩。用惟枯木。不自先容。細及秋毫。罔非帝力。但蠶如絲之亮。曷知媚竈之求。終賴洪慈。免其大戾。甫周一閏。更典三藩。銜篋藪以見容。員支離而竊祿。昨緣使道。遂獲造朝。許留數刻之間。俾典百斤之奏。俄煩節召。改賜袍紳。追露冕之爲榮。均解衣而拜賜。胡然頑陋。靡爾寵光。斯蓋伏遇皇帝陛下。通駿先猷。蚤蒙庶品。謂夫俎豆之無越。矜其丹腹之可塗。曾不疵瑕。猥從器使。伏況汝陽疏壤。魯道遺黎。昏作屢豐。敦龐俾乂。雖屬河工之近決。不妨田峻之有秋。惟冀至仁。少寬中戾。臣敢不內循丕訓。上體寶

慈列三壤之埴壘。勤修稼政。愛三東之杼柚。底慎邦財。儻臻樂職之風。冀贖浮人之刺。臣無任云云。

謝轉給事中表

郵傳疾馳。贊書申錫。改東臺之祕秩。仍左竹之善藩。恩數竝隆。心顏罔措。臣某中謝。竊念臣本惟弱植。素情遠猷。一玷文科。洊膺朝選。攝官承乏。率非才舉之宜。含垢匿瑕。陰荷天私之惠。獲徧階于華近。固無補于涓毫。至乃超備諫員。參聞宰政。當求治責成之會。有先機斷論之煩。力勉徒勤。道悠自蹟。辱收還于重任。始厭伏于煩言。繼荷宸慈。曲存邦體。旋易麾于巨鎮。復帖職于清廂。速貸前尤。叢臻謬寵。謝生無所履薄。增憂不謂更枉公僉。平稽歲伐。例舉當遷之典。兼紆卽賞之褒。循踐殊資。俾光外寄。此蓋伏遇皇帝陛下。深憐舊物。均飾庶工。因虞篇陟考之文。用漢守增畱之制。併推優渥。昭示保全。內省微軀。曷勝鴻施。謹當勤思寡悔。益服攸箴。承化樹風。或萬分而有取。竭忠酬貺。期十死以知歸。感極于中。辭殫靡喻。

謝賜撫問表

使駟馳星。天辭出綍。辱宸心之念舊。因頒式以推慈。恩厚忘言。感深成泣。臣某誠榮誠感。頓首頓首。竊念臣本由寒士。早玷榮班。出入近司。周旋二紀。石心許國。固無可轉之期。川謗盈朝。容致他來之吝。逮違樞握。游易侯藩。席槐府之崇聯。惕將壇之重寄。敢謂皇帝陛下。堯仁無外。漢度兼容。謂體貌之嘗加。眷忠愚而可憫。爰馳華牡。俾道溫言。薜焙惟珍。特分子貢品。寶匳有爛。紛照于私闕。仰聆金玉之音。俾極君臣之分。孤生內省。隆惠奚酬。但歸誓于麤捐。或謝生于覆育。

中書謝傳宣表

臣等伏奉入內都知張永和傳宣中書密院重修開先殿成迎奉太祖皇帝御容往彼供養所貴四時薦享得伸誠意與卿等中外同慶者寶宇雄成神儀載竚屬奉迎之伊始枉傳訓之發中睿德所覃羣心交抃恭惟皇帝陛下紹熙景命勤述先規彞緣作繪之容參對不祧之禮炳然威御臨厥孫謀因佛刹之增新命工師而度構再嚴祕殿將宅皇靈兼別廟之宏模超化城之絕境羽旄先導奚止漢冠之游都邑叢瞻實聳軒臺之畏孝誠克盡前烈彌昭臣等忝服近司首聆慈誨空極親逢之幸初無云補之方惟誓協恭或酬洪覆

賀册封兗國公主表

宮闈衍慶國邑疏封誕告有初均歡無外臣某誠欣誠抃頓首頓首伏以兗國公主天孫稟粹異女流占在姆不勤承親允穆恭惟皇帝陛下至仁敷祐篤愛成雍誕生禮矣之姿前導百斯之福教宮有典擇配惟嘉爰選良辰茂宣華册肇禹州而啓國築魯館以由章典物備臻官師載躍矧于歸夫舅族諒深沐于皇慈臣早忝近班今司外服徒聆發號莫獲觀光瞻望宸廷臣無任

再入參乞罷免重任表

臣聞綆短而使汲淵非浸灌之巧馬窮而後易駕非馳馭之宜物理苟然人情可喻是以明主臨下孤臣事君弗強所能乃輯宿官之業自涯其分方逃不職之誅敢傍斯言用敷至懇臣某中謝竊念臣天畀疎

拙地出羈單。偶緣挾冊之勤。誤中掄材之首。束紳仕路。佔畢文林。遭山藪之兼容。備閨臺之旅進。自爾朝
多過聽。官匪序遷。驟塵星掖之華。深入鑿坡之祕。固無寸效。可稱明恩。更因承乏之辰。猥玷參機之重。前
叨未補。來忝益滋。過中之器易盈。責實之名難副。果煩罷免。終賜保全。歷典州符。五新年籥。何意君環之
召。復聯公袞之榮。顛柝再條。朽肌還肉。雖聞弦戢翼。悸魄未安。而內手捫心。丹誠故在。輒復夜思。晝過。今
計昨非。期一得于陋。或少裨于顧訪。其如性資有限。機務至叢。卜式樸忠。初無趣和。倪寬懦武。(案)原
字明。而又睿德日躋。聖猷天建。按循先烈。裁定懿綱。求百辟之讜言。責三公之吏事。諒非雋輔。疇克同寅。
竊顧安庸。將焉報稱。宜從重劾。以警空餐。然念竭智以進思。介一心而自守。偶逃多悔。幸及三年。稽大比
之文。敢煩陟狀。撫不肖之質。尤合避賢。輒循考績之期。仰丐退身之幸。伏望體天法道。欽文聰武。聖神孝
德。皇帝陛下。廓包荒之度。推養士之慈。業已與成。則無令亟敗。事容善始。則當俾有終。許辭貳政之繁。卻
服從臣之未。職勞有底。量力自安。亦冀穆穆公言。潛引曠官之誚。諄諄末路。免罹不衷之災。意迫言蕪。期
于得請。干冒宸扆。

乞致仕表

臣聞爵祿有次。王者所以馭臣。筋力或衰。聖人不與爲禮。何則。上隨材而賦任。則壯者樂盡其節。下度德
而展體。則老者止于不能。授受由是得宜。始終因而偕篤。斯爲達道。貫厥大倫。愚衷所稽。皇鑒攸賴。臣某
中謝。竊念臣本與孤族。素乏遠謀。天聖初。伏遇體天法道。欽文聰武。聖神孝德。皇帝陛下。始擢萬幾。親臨

多士。軾怒蛙而待勇。撫駿骨以求駒。而臣適會時來。遽躋才等。猥緣士牒。仰沐朝猷。洊階華要之途。架入凝嚴之禁。終因人乏。遂贊宰司。辱體貌之兼隆。竭涓埃而無取。自茲典領。益復崇高。再參政務之繁。正管兵機之劇。一塵鼎鉉。兩幹星樞。形已過而照窮。力猶求而駕敗。屢招譏劾。深累包容。一昨罷帷幄之同寅。丐州藩之出守。理當策免。恩乃庭揚。假使闔之旌旄。帶輔臣之印綬。質于公論。實玷天私。雖席寵之有因。顧害盈而難追。重念臣久塵榮路。垂四十年。福過成災。氣衰得疾。去歲中禍。延同氣痛徹五情。乘悲泣之過多。駭營魂之不復。幽憂攻內。攝理乖方。接此頽齡。漸成宿疹。積寒棲于腠理。流毒匯于肺經。一喘之來。百骸俱廢。步趨多梗。拜伏爲艱。若復貪極品之崇名。懷千鍾之厚廩。鬼誅將作。人言謂何。況臣今茲行年六十有七。常恐一旦先犬馬填溝壑。終無以報恩塞責。臣不勝私願。願上還官職之事。乞骸骨。將孳息歸田里。避賢者路。七十致政。抑惟常典。臣年雖未及。病則有餘。幸丐餘生。貪延聖日。儻孤誠之獲遂。畢九殞以知歸。敢望聖慈。特除臣一致仕官。因便尋醫。以救殘喘。干冒宸扆。臣無任。

乞致仕表

言而無隱。情至者得以抒陳。瀆則有誅。德厚者爲之含覆。批章繼錫。俞訓未頒。輒復叩關。覬諧就第。臣某誠惶誠懼。頓首頓首。竊念臣顛蒙自信。憂畏早衰。近司五玷于朝。咨巨屏七更于郡。寄空勤夙夜。蔑著毫分。讒謗居多。寵光翻渥。雖虎符劇任。祿秩甚優。而鶴鬢暮齡。筋骸難勉。矧復因寒損肺。緣咳成嗽。拜伏稍頻。喘噎僅續。訪醫寡效。卻粒無方。操藥匕以自憐。擁食柶而太息。生涯若此。人事奚言。屢達封囊。願還駢

組辱中宸之念舊。未聽角巾。陪四輔以造朝。衆嗤蹇步。如伏蒲之有劾。願握節以何顏。伏望皇帝陛下。昭示至公。曲推洪施。遂臣知止。式保于有終。揆臣所堪。無強其不逮。得從初志。實緩深尤。虔候俞音。始安累息。欲望聖慈。許依臣累上章表。特除致仕。臣無任祈天俟命。

再乞致仕表

筆端言拙。悃愾難敷。詔底恩隆。都俞尙闕。輒緣洪造。更露微衷。臣某誠惶誠恐頓首頓首。伏念臣草茅地寒。樗櫟材散。曩因薄技。來會亨辰。列仕版者再閏八周。佐國論者五遷三已。每塵眷獎。遂極崇高。風績夙升。年華滋晚。頃希止足。姑解組于鄴城。比恤蹒跚。復假廕于譙壤。覩顏冒祿。力疾長人。惟知謹守常規。郡閣靡頒條之最。不能導迎善氣。農疇罹洚水之災。加以淮北荒殘。渦陽沮洳。蕭然南畝。悉變于橫流。蕞爾孤城。不沈者數版。眷言守土。尤藉長才。而臣適在暮齡。猥當優寄。敢臥尸于重祿。空勉率于屏軀。因此震驚。轉成鼠齷。而況任崇將鉞。秩視公槐。固當參寵勳賢。詎可久私癘瘵。伏望皇帝陛下。大明委照。廣覆推慈。矜齒髮之早衰。憫筋骸之難強。俾從閒佚。允謂生成。矧在先朝。已陳納祿。逮逢聖日。遽此延恩。出入三年。倦勤十上。昔祈退老。固瀝懇于朝端。今若因循。必取嗤于天下。非獨失臣子進退之節。抑亦玷衣冠廉讓之風。傾養馳誠。叫關佇可。伏乞檢會前奏。特除臣一致仕官。放歸田里。

乞罷樞相表

臣聞器小易盈者難持。任重將顛者思止。儻奉承之有失。卽隕越之可虞。敢援至言。冒陳丹蘊。臣某中謝。

竊念臣早由謹樸參備丞疑出入踐揚二十餘載食浮日積官謗愈誼而自再冠洪樞漸逼衰景徒竭短慮終誤遠圖故經制邊陲或蠻蠻內侮按列軍伍或戍卒未充上資聖謨竝稟成算至于稍嚴賞格則羣煦漂山暫塞倖門則衆怨成府孤特少助怯懦自知敢竊天工久妨賢路伏望皇帝陛下許還重柄垂丐殘骸得寬典刑庶保要領儻未令便歸田里或且許近守藩州補報之心內外惟一投誠至切得請爲期

乞罷相表

臣聞名本戒乎多取過實則凶力所貴乎自量弗能當止矧萬幾密勿任切于論思一介婆娑力窮于報稱所宜自劾以警空餐仰賴至仁罄敷危訴臣某誠惶誠懼頓首頓首竊念臣學非全古才不逮人擢始布衣進陪書筓寶元中因緣人乏參預政機試可罔功踰年賜免已璽之駕奚望于復驂方汲之淵何圖于續綆自再塵于國論俄六改于歲陰齷齪備員容容取誚其門改使樞管序正宰司光華所叢位望彌峻然屬邊烽罷警調軻息勤列辟交修日新于所治當寧親務天健而愈強因容具臣久忝高位至夫講求墜典崇報上神因大寢之宏規復九筵之愆祝克成鉅禮莫匪聖謀旣絕望于清光亦奚資于彼相逮均慶寵首及庸虛讓爵無階履高增慄重以福基素狹年事日侵有負乘之近憂乏將明之遠業雖主恩含垢外弭于人言而天道害盈難逃于鬼瞰一歲之內二息云忘昧聖哲忘情之高深朋友離羣之痛氣衰耳塞淚熱目昏寂聽則妖鼓亂聰審視則黑花盈睫居多忘誤動輒震驚悲憂一來志慮俱耗安可尙聯衰職之貴分揖槐庭之嚴身不自聊政于何有且三公之責吏事任靡容私聖主之督愚臣悔將累國

內循非據。實玷具瞻。伏望皇帝陛下。念稟數之早奇。憫匪才之難強。許還重柄。出補外藩。愛小器于未盈。免其必覆。貸稿骸于將隕。俾遂更生。進退之方。恩義倍允。投誠無隱。須可爲期。臣無任祈天俟命。

元憲集卷二十

外制

中書試御史大夫除右僕射制

敕古者因右武之官。尊主射之號。始寓天秩。以昭邦儀。惟左右于中臺。實師長于庶職。諒非肅哲之劬。曷允僉謀之同。疇庸匪私。惟德之舉。具官某。莊重不倚。寬博有謀。自覽德以逢辰。亟舒文而華國。凌懋忠力。協宣朝猷。訪之以善。而椒蘭益熏。嬰之以煩。而銜刃不頓。實有明效。暴于羣倫。勳者付以憲綱。寄之邦直。而能山立盛氣。條舉舊章。褫權豪之匪彝。勗官師而交輔。宜示殊典。進服大僚。噫。總六官之卿。納百揆之路。治本之自出。官成之所得。爲時羽儀。任政梁棟。副我則哲之效。繫乃司寅之忠。往踐厥司。無忝休命。可。

降授太常博士知臨江軍龐籍可尙書祠部員外郎福建路轉運使制

敕具官龐籍。傳曰。舉直錯諸枉。又曰。觀過而知仁。蓋所以判忠邪而貸苛細也。以爾比用局力。參于風憲。露章抗論。多所澄糾。而能陰辨度。匿斥言壬人。暴于公朝。卒得姦狀。乃以鈎撫之微累。訊證之弗讎。姑從常科。俾降元秩。今閩部遐曠。漕舟須才。宜復郎曹之華。兼還使節之重。體我甄敘。無忘夙宵。可。

皇弟鄭州防禦使允良因鄭州升爲泰寧軍可移別州防禦使制

敕具官允良。藉慶廟靈。參華宗邸。夙陶善教。寢服榮班。勳擇壤于陪京。俾建侯而禦侮。屬茲要郡。介我二

都特表中軍之雄。且壯近郊之守。高牙作鎮。旣易故名。列棨制藩。宜更新部。淮西奧密。楚北柔疆。命秩均封。以屏王室。可。

衛州團練使充邠寧環慶州路駐泊兵馬部署兼知邠州曹琮可防禦使充秦鳳路部署制

敕。唐制刺史兼使。以禦遏差重。國朝邊屯特將。以攝署爲雄。參付寵權。是屬公舉。以爾具官曹琮。性韻沈懋。風略雋明。地席忠勳之餘。才更煩瘁之使。向資親信。外職訓齊。仍總郡條。且濟戎索。而能威惠。克舉疆場。以寧。眷乃岐山之區。奄于天水之會。兵籍尤衆。師律後嚴。宜疇已試之勞。往司善帥之任。當念恩寄。方越常均。無懈克誠。以累先服。可。

故左龍武官大將軍昭州防禦使張昭遠可贈觀察使制

敕。夫勞臣竭節。雖歿而靡渝。王者念功。旣往而彌篤。所以合恩義之紀。貫衷榮之終。賁厥英魂。我有成命。具官張昭遠。才謀沈鷲。姿度方嚴。練韜略之大端。席公侯而茂閱。早由差擇。遂服驅馳。洊升諸使之聯。亟攝專城之守。通知疆事。兼濟吏文。展于體以實勤。勵乃猷而克壯。比階勇爵。用領禁屯。方出倚于幹名。遽歸移于末疾。頃亦換司環衛。仍護州兵。庶臻勿藥之和。奄軫聞鞶之痛。永言遺烈。深悼予懷。法賻如儀。廉車正秩。茲爲寵卹。尙克歆承。可。

故耀州觀察使曹儀可贈節度使制

夫勤官盡瘁者忠之全。哀亡勸存者義之篤。矧爾帶礪之冑。方備封疆之臣。務罄一心。靡膏他用。奄遘淪

謝宜錫寵褒。具官曹儀。性資端和。世載勳烈。在昔乃祖。以德冠羣。后從享于太宮。施及而考。以力宣王家。繼仗于齋鉞。負荷宏構。屬于幹材。自階仕于班聯。實積效于勞勤。遂繇別使。入掌禁屯。兼倚列城。出固西園。比嘉控遏之重。改升廉察之權。式佇後庸。克纂先服。美志未遂。修塗已窮。戚自計聞。實累中惻。俾正登壇之秩。尚識傳弓之謀。歸賻納書。爾或無恨。可。

東上閣門使梧州刺史魏昭。兩東上閣門使運州刺史王克明。並可四方館使制。

敕具官王克明等。夫史局有聯。館賓爲重。列于禁籍。用寵邇臣。非勳緒之可圖。顧恩典之疇稱。以爾等並生冠族。均賦美材。早服在庭之班。多更守局之職。擢嘉勤效。游職官榮。序位天關。假節州部。然克明曩緣外補。頻復尙稽。而昭兩雖屬近遷。公言猶鬱。俾偕升于近綬。且無格于常科。勉勵恪恭。滋稱恩紀。可。

衣庫副使知廣信軍王果。可尙食副使制。

敕具官王果。頃自朝紳。改乘使轂。仍委備邊之寄。甫更成歲之勞。屬是軍牙。對遷符守。義當便道。恩有進階。俾升膳局之榮。且壯和門之氣。勉修疆事。毋忝寵章。可。

故內殿承制魏成德。可追復供備庫副使制。

敕故具官魏成德。早基華胄。亟列內朝。奉使指以實動。更歲期而亦久。向緣微坐。遂免所居。方踐復圭之辭。遽迫藏舟之變。奄然不淑。良用軫懷。宜追寵于故官。俾終榮于厚笮。甄勞念往。尙或嘉茲。可。

右贊善大夫丁禹。可諸司副使制。

敕具官丁禹。優學儒家。策名官簿。才在煩而畢給。志越俗而不流。向積吏勤。遂膺州寄。而能樹風遐徼。歸課攸司。敝陟宮坊之聯。甫引朝闈之籍。而夙懷感慨。願奉驅馳。列牘自陳。徇忠彌切。嘉乃兼材之美。俾參貳使之華。勉樹壯猷。以基勇爵。可。

如京副使永定陵副使張懷則可莊宅副使制

敕具官張懷則。以肅給之姿。列禁嚴之侍。洊更歲次。階陟使名。比嘉軒闥之勞。出總山園之衛。恭懷先寢。近在神畿。雖百靈護野而有嚴。顧七遷成邑而增重。疇其謹職。宜用推恩。進厥華聯。仍茲舊領。益圖祇恪。副我欽崇。可。

深州防禦使駙馬都尉錢景臻男忱可莊宅副使制

敕某。公爵吾所重。而內使之介。以爲初命。豈惟爾婉變是厚。實我諸姑之慶也。制名賦祿。以進成人。勉就學能。以需官使。可。

新差知桂州東染院使榮州刺史馮仲已可洛苑使制

敕。桂林守印。必寄材良。洛城苑監。是光使號。以爾貝官。馮仲已。相門餘慶。世祿舊勞。洊服榮班。果敷休譽。或承軺將命。或握節護邊。寢兼刺部之雄。且啓封侯之業。屬吾遐郡。咨擇幹臣。公論攸先。寵章宜渥。俾進內司之列。往撫南荒之會。靡忘臨遣。用對褒華。可。

故左班殿直楊成可贈崇儀副使制

敕具官楊成夙以幹名備于煩使序服庭臣之列洊書官簿之勞美尚方申修塗早已克鍾懿烈可慶高閔矧盡瘁之未圖顧追榮而有典內司置使貳職參華超爾寵名以光幽窆可

資政殿大學士刑部尚書李迪降授太常卿知密州制

敕言之多誣實惟殄行過弗圖改茲謂遂非矧三事之舊臣均一德于同體表式攸寄中外所瞻苟自蹈于匪彝因難枉于明罰以爾具官李迪曩繇才等出應時須遭會先朝參管魁柄逮余儲邸之日亦預宮僚之榮中罹間言越在外服朕矜其介節申乃昔恩擢自爲藩付以當國而忠款靡效朋比屢彰雖榮罷于宰司猶階進于天秩洊加清職留冠邇聯冀省疚以自新乃構忿而深詆洎從薄責咸失事端噫進旣負幹棟責成之求退又乖宗工勵俗之德謬戾若此良用憮然跡其矯妄之來宜正典刑之黜尙緣哀請弗忍深懲特降序于禮卿且出備于藩守爾其內訟厥咎深體至慈念屈法之惟艱顧蒙宥而難再度佩成訓以復令名可

龍圖閣學士給事中知兗州范諷可責授武昌軍節度行軍司馬不簽署本州公事制

敕名不假人所以敦乎治體法無阿近所以去乎官邪苟治行之有虧非變憲之攸貸以爾具官范諷出于世緒涉乃藝文洊紆朝絨之華驟任諫言之責比嘉抗論亟用推恩歲歷未深寵靈彌渥而不能罄輸亮節祇報殊私墮計簿之舊章濫公朝之賞典乃復咨于州部冒市田廬陰答利交公形薦牘方自陳于罄篋曾不愧于心顏逮窮置對之辭盡露懷姦之態未足決獄仍擅之官繫傲蔑之罔悛顧刑章而何道

特從幽黜。以肅朋邪。俾典午于方州。且省愆于散地。爾惟取悔。余匪棄人。可。

京東路同提點刑獄內殿承制關門祗候王繼祖可禮賓副使制

敕具官王繼祖。班籍幹材。宮藩遺緒。久備闔司之使。寢承殿制之嚴。曩被朝章。分廉郡獄。赤車所屆。幽奸無冤。曾是稽勞。當茲滿歲。宜遷使範之亞。尙虔刑典之中。益罄勵精。無忝褒擢。可。

西上閣門使梧州刺史魏昭晒可東上閣門使制

敕九關之嚴。二閣爲重。實謹門籍。用冠使名。且寵東西之聯。俾詳功次之授。以爾具官魏昭晒。資性沈愿。風矩開華。席慶公臺之餘。累勞軒陛之職。奉承官訓。階序禁朝。自酬績于事經。早兼榮于使部。曩資勤力。參典盛容。歲歷游周。莊恭彌劭。宜進左扉之局。益重邇臣之班。當體茂恩。免服來譽。可。

左武衛大將軍遙郡刺史王堯明可東上閣門使制

敕滌瑕念勞。人材所以無棄。循階序位。官秩所以有班。矧于公朝。莫非明勸。以爾具官王克明。地陰華舊。風規韶遠。憑藉榮任。周歷禁聯。曩緣外家之親。超升諸使之重。入掌賓館。遙指郡麾。自矢遠嫌之防。遂從易地之譴。出監州旅。歸列衛屯。彌越歲時。屬沛恩號。念甄收之有典。因拂拭以爲宜。俾序要司。且繇上閣。勉懷退補。用對亨嘉。可。

戶部尙書夏竦除三司使制

敕周以冢宰制邦用。漢以列侯主計書。而皆內權重輕。外濟調度。衰征慎賦。(案)衰音儼。齊語相地而衰。征則民不移。原本作襄。征今

改操本建中合爲使名。我有才舉以爾具官夏竦文敏莊重淹曠清明自振揭昌期漸罄無任有精微之學以導化源有典誥之辭以華王體早符朝野之望迭處鈞衡之司清規所存嗣政攸庇曷雖倚垣翰之劇寄居留之雄歲紀游更朝猷增竚天臺正秩已穆于僉前地卿領務宜歸于職業兼增食采尙重官儀罔憚使煩體我圖舊可。

戶部郎中直史館知滄州郭申錫可三司鹽鐵使制

煮海爲鹽鑄山爲金不賦于田不征于關市而國用饒此山海所以爲天地之藏而古者暴威武擒兇醜舉是而資之也其職屬于司會府必得其佐謹其筭而收之則無遺利矣具官某資性純敏不以私污義居朝亡朋蹇然自立已嘗試于司會府而以累去職今還汝以鹽鐵厥惟舊哉奏刀旣熟奚煩朕之爲訓可。

三司副使制

司計之廢置歷世莫能定至真宗皇帝時析而爲三于是事有條功有緒交處而不可雜並行而不可亂問之百世朕知其不可易也然常得才用通敏之臣處之則法行而政舉副介缺丞相以爾等明厲有守嘗試外計府帑充實士馬宿飽可以貳吾大司農之治豈惟丞相之言哉此正朕之所欲求也置爾其孰爲過哉可。

新除三司戶部副使尙書工部郎中陳瑛可三司度支副使制

敕。夫金布刊令。地壤制征。雖輸入有常。而均節爲重。故支度參號。總務在中。副介承業。擇人斯授。以爾具官陳琰。志用精一。材局敏通。筮仕本于學優。修方濟乎儒飾。曩采朝論。升補憲僚。旋試治財之煩。繼將護漕之劇。莫匪最狀。達于余聞。爰以圖旌使勞。貳領民版。成命甫出。聯有序遷。位無相踰。任必差進。改司移用之要。且究析毫之能。勉調盈虛。罔或措克可。

三司度支副使尙書工部郎中陳琰可三司鹽鐵副使三司戶部副使尙書工部郎中司馬池可三司度支副使制

敕。故事邦計分部。設使介以經其業。雖職任均重。而班著有差。因勞序升。實本其次。以爾具官陳琰。性理純壹。靖而能幹。以爾具官司馬池。器識詳允。和而不流。並飾文來仕。展體首公。簪筆握蘭。分契將漕。休有嘉績。稔厥外朝。頃偕命于使煩。同胥協以陳力。屬乃比局疇。以外遷。俾按循階之常。且資奏刀之熟。正郎舊秩。會府劇曹。各懋爾官。以稱恩典可。

尙書戶部員外郎兼侍御史知雜事姚仲孫可三司戶部副使制

敕。國版制征。民部置使。必擇才彥。參主計文。列爲副介之雄。實艱授受之選。以爾具官姚仲孫。踐修士檢。肅給吏資。早階王髦。遂置朝紱。曩疇邦直之譽。且責諫言之良。忠規可甄。輿論彌洽。移總臺屬。亦旣歲時。誠存不流。文克無害。而左戶缺職。通籍類能。差序宿官之勤。允膺遷秩之次。往莅財算。深究事經。勿弛勿苛。尙質最要可。

尙書工部郎中兼侍御史知雜事司馬池可三司戶部副使制

敕國家底慎邦財。建崇使範。以主計之重。訂于列侯。因制用之副。均于小宰。非有幹用。疇允恪居。以爾具官司馬池。行淳而方。識簡而固。繇鄉俊以來仕。積吏闕而登朝。荐剖州符。遠將歲漕。比嘉守土之最。茂贊操籌之煩。朕察其冲恬。考以名實。亟正郎位。俾亞憲綱。時序甫移。品式方屬。而戶版缺任。庭著擇材。雖糾勅未盡其能。且甄升適在其次。特回簪筆之選。用經籠貨之宜。往竭乃誠。無忝榮遇。可。

除名人董仲言可團練副使制

敕具官董仲言。曩服朝紳。倅穎邊郡。罔敦飭篋之操。自罹除籍之辜。比荷貸恩。序升散秩。禮禧載洽。謫注尙存。宜卽輔寰之封。且升團結之筵。兼榮視品。仍俾定居。姑務省循。以報存錄。可。

太常寺太祝王靖可大理評事制

敕具官王靖。世藉慶餘。仕階蔭格。參名邦祝。祇事卿曹。大比方周。稍遷有典。宜升理讞之局。兼寵臺華之緒。可。

太常寺太祝監西京麴院魯有立可大理評事制

敕具官魯有立。爰以妙年。陶于善教。逮延世賞。克服官箴。比由祝策之資。往幹酒材之局。屬茲稽課。協乃懋恩。擢贊詳刑。尙領煩蒞。可。

太常寺太祝監江州廣寧監馬璵可大理評事制

敕具官馬瑛。卿屬之華。邦祝爲最。曩試煩于外局。實通質于舊勞。齋狀以聞。滿歲當陟。改司刑讞。姑續事程。勗哉首公。往荷榮典。可。

太常寺奉禮郎梅輔臣可大理評事制

敕具官梅輔臣。陶訓清門。序階榮籍。頗從吏補。休有歲勞。覈狀甚詳。升秩惟允。宜繇抱纒之屬。往參聽棘之評。恪服攸箴。尙續來課。可。

胡仲衡呂友直並除大理評事制

敕具官某等。日者屢肆大眚。圜空虛。理官具員而已。然而擇人以詳刑。則不可不謹。若爾某者。皆由此選也。宜及閒暇。益務明習。以稱朕哀矜庶獄之意。可。

元憲集卷二十一

外制

保慶皇太后叔楊知信可贈兼中書令制

敕親親之恩。自家而刑國。善善之報。循本以飾終。矧我慈闈之尊。永懷仲父之懿。申賁愍策。茲協大倫。故贈具官楊知信。天資朴忠。氣挺才武。早踐勇爵。訓于軍和。宿衛軒營之嚴。該明圮石之略。世逢偃革。未盡于壯圖。化怛藏舟。奄先于徂運。力命雖屈。慶善並流。洪惟母儀。實係家緒。曩緣傍蔭之厚。游舉追榮之恩。肆是休辰。彌顯徽範。宜特班于異數。俾增煥于乃宗。卽號將壇兼中書令。且光龍節之重。益顯鳳池之尊。繪檢密章。往付幽窆可。

楊崇勳祖累贈太師加兼中書令制

敕朕昨以荷三神之釐。疇百執之力。第以封爵。徧于幽明。蓋潤葉者流其根。移忠者本于孝。褒先錫類。邦教繫焉。具官楊崇勳。祖累贈太師守斌。以莊毅之姿。濟和之略。義無苟進。時弗我永。長算屈于浮齡。積善蕃于重葉。慶靈叢啓。秀傑嗣生。感會風雲之期。烜赫旌常之典。內幹幾密。外扞蕃宣。本燕翼之有來。宜寵靈之上集。賁章游舉。而殊數未昭。爰益鳳池之華。更光馬鬣之兆。永言幽漠。尙識褒崇可。

縣尉李述可縣令制

敕具官李述。頃由銓檄。尉乃縣封。善率追胥。悉擒蒐慝。書勞有狀。援比載明。宜紆縣綬之華。且酬官簿之最。往祇休命。圖績乃庸可。

前吉州龍泉縣令監蘄州蘄口權務吳處仕可睦州建德縣令制

敕具官吳處士。階蔭服官。積資參調。彙司權利。方責歲勞。屬郡將之專威。挾吏文而巧詆。俾從罷免。尋覽訴陳。別制下推。枉情咸露。適舉殘苛之罰。宜均潔雪之科。姑復舊階。往緩遐邑。勉恪而守。毋恤後艱可。

駙馬都尉李遵勗兄加贈太師制

敕。朕昨以擁三神之休。均百順之錫。第以封爵。徧于臣工。然流光者慶蕃。位重者文縟。特因下嫁之戚。申及孔懷之恩。弗檢常襲。是謂殊數。具官遵勗。亡兄具官累贈太傅某。寬明莊重。淳深幹敏。克纂堂構。自結本朝。以通侯之世家。備能臣之煩使。預平狂狡。陰濟惠和。或握節聘戎。譽高使表。或剖璋臨部。政推邊最。修塗未極。景算夙淪。天啓善祥。地華嫺睦。早慰在原之感。亟欽服袞之榮。及此均禱。詎忘旌德。宜極師瓊之品。載煥京阡之榮可。

皇兄故武定軍節度使檢校太保允寧可贈太尉追封信安郡王制

敕。姬典之盟。異姓爲後。漢策之誓。非劉不王。矧我文明之友。方隆帝室之表。奄忽遘沴。追旌可懷。皇兄具官某。姿局端華。理識明劭。幼陶惇敍之訓。勤服糾綏之箴。輔成天資。穆我邦族。而復地在尊戚。位躋中權。奉齋鉞以彌恭。戒朝鑿而有恪。夙夜之志。造次弗渝。固將分寶展親。秉德陪朕。合是多福。登乎永年。時惟

不備壽則中奪。永惟痛悼。震于予衷。今以三公之上司。二等之高爵。昭列殊典。申賁令猷。噫魂而有靈。尙嘉我之徽命也。可。

屯田郎中王渙父礪可贈尙書左丞制

敕。朕載耒勸耕。舍爵行賞。均厥慶賚。塞乎天淵。永惟通籍之列。咸被流根之澤。所以勸存而厚亡者也。具官某。亡父故具官某。早以士彥。登于朝次。有文以飾吏。有孝以顯親。名附史籍。行灼鄉品。騁修途之未及。屈浮齡而前謝。善訓諸子。不隕令名。寘我周行。莫匪嘉績。宜徇褒先之請。以顯教忠之族。星闈都坐。天轄上僚。足賁英魂。用告幽窆。可。

司天監主簿馬日房可司天監丞制

敕。具官馬日房。執技占官。勾稽監事。比奉營宮之役。頗資推策之勤。奏牘自陳。賞科惟允。俾遷丞率。勉荷旌酬。可。

司天監丞來慶祥可降授司天監主簿制

敕。具官來慶祥。隸業侯臺。參榮官簿。固當夙夜。審察躔離。輒輕肆以上書。且稽測而違實。迹其詭辯。合正嚴科。聊從降秩之文。尙聯視夜之職。勉思勤術。以荷矜恩。可。

太子中舍通判鄭州李宋卿可殿中丞制

敕。具官李宋卿。祇服善猷。克纂華緒。任宿其業。籍通于朝。比輟宮坊之良。近參輔郡之守。具有新最。能續

舊庸官簿常遷。盾省爲次。卽授之美。爾其勉哉。可。

太子中舍監在京廣濟倉沈維恭可殿中丞制

敕具官沈維恭。公臺舊門。軒冕重世。階蔭來仕。歸課屢周。比踐儲坊之僚。兼司國廩之契。歲放通滿。勞簿上聞。當遷之榮。中御爲次。往服丞率。尙幹委儲。可。

太子中舍通判德州薛中孚可殿中丞制

敕具官薛中孚。積學而優。展體來仕。洊稽官闕。入籍治朝。曷因通守之行。已在當遷之目。欲觀從政。姑俟彌年。逮此有勞。詎宜留賞。卽升盾省之秩。猶贊州符之雄。勉結歲成。無忝恩擢。可。

奏舉人前寧海軍節度判官蓋平可殿中丞制

敕具官蓋平。嫻曉吏文。綢繆使職。洊閱舉知之奏。已經覈課之詳。姑欲試煩。久茲倅事。選條再集。薦牘彌多。宜酬戎幕之勤。入通盾省之籍。可。

追官人前守殿中丞劉景可殿中丞制

敕具官劉景。早緣儒科。階置朝絨。比倅州事。自陷憲防。而具勅之初。如律爲重。尋用原情之典。裁報免官之論。恩霈維新。辜累宜釋。俾通閩牒。且復仕塗。勉爾矜修。體我甄序。可。

審刑院詳議官太子中舍李倩可殿中丞制

敕具官李倩。明習吏文。服勤官次。早補刑卿之屬。近更財權之煩。曷籍勵精。擢佐評讞。罪繇所麗。論報甚

詳歲在質成。恩有加秩。宜承鈎盾之府。尙服簡書之司。勉悉爾心。毋懈予命。可。

奏舉人前權平江軍節度推官張去惑可將作監丞制

敕具官張去惑。本偕士秀。參服銓條。比奉賓帷之籌。頻承漕府之檄。分捍水道。頗還居民。監司露章。衡審稽實。宜信朝賞。且旌吏勤。往陟匠卿之僚。無忘虞弁之守。可。

汝州長史王煥移虢州長史制

敕具官王煥。早以敗官。甫從善貸。列于州佐。近在寰畿。輒稽便道之行。陰狹千私之醜。夤緣女謁。繕作奏函。訊逮甚明。憲章罔赦。屬經洪濤。聊徙外藩。無貳前非。終取抵悔。可。

著作佐郎監華州鹽酒稅務梁堅可祕書丞制

敕具官梁堅。故事。譔著之佐。雖出補他任。而滿歲正課。猶進丞本省。蓋以因官成而育材類也。爾早階科秀。深敏吏文。洊緣外舉之章。入參中祕之局。勲圖親祿。卽筦利司。煩使有能。陟狀咸最。宜席道山之序。且通閨籍之華。尙結後勤。毋忝榮次。可。

三班奉職高器之可將仕郎守高郵縣尉制

敕具官高器之。郎名之家。素業相紹。早緣世賞。遂列使班。比控于朝。願從補吏。嘉其清尙。無忝爾先。宜易命于銓流。且詰封于縣禁。勉修官最。以荷恩褒。可。

濟州鉅野縣尉孔宗願可濰州北海縣尉制

敕具官孔宗願。系出聖門。蔭緣宗眷。比除邑佐。且便鄉閭。而聯官之人。實乃婣近。避嫌自列。易地有常。瀕
澼控疆。邏盜分職。往服榮牒。無貳乃誠。可。

權寧國軍節度判官茹宗元。可大理寺丞致仕制

敕具官茹宗元。早擅民貲。志希仕籍。嘗緣入粟之募。遂服解巾之榮。逮賓贊壽。已嗟耄岳。願還所任。宜允
來陳。尚序寺僚。且光卿品。可。

寧化軍判官李祐。可太子中舍致仕涇州司法參軍田鳴鶴。可太子洗馬致仕磁州司戶參軍劉宗
道。可大理寺丞致仕制

敕具官李祐等。各繇官牒。籍我吏銓。從公實勤。歷歲茲久。並控誠于晚節。冀還職于有司。知止可嘉。增秩
奚吝。儲坊置屬。卿棘有僚。寵爾歸休。且激頽競。可。

中嶽廟令劉碩。可太子洗馬致仕制

敕具官劉碩。曩中學科。晚服銓調。比繇縣尹之秩。來奉嶽祠之嚴。迫于暮齡。祈致所事。東朝洗馬。外著垂
紳。特示寵遷。且賞知止。可。

永興軍節度判官何操。可太常博士致仕同州郃縣令寇寧。可太子中舍致仕制

敕具官何操等。階于儒科。服在銓牒。或屢賓大府。或久宰善封。並陳遷事之年。且圖佚老之舉。禮臺通籍。
儲禁具僚。各服朝紳。歸寵鄉閭。可。

前韶州仁化縣令公孫知止可太子中舍致仕制

敕具官公孫知止承乏吏資累勤縣譜間繇遐任歸質攸司自陳艾服之勞冀辭銓調之補嘉聞惻愍宜遂燕安引籍儲坊掛冠鄉閭庇私從欲尙荷朝榮可

密州莒縣令劉維清可太子中舍致仕制

敕具官劉維清策名官簿分政銅章課考寢深齒力滋晚騰章來上解組是祈憫薄景于桑榆遂掛冠于田里特遷宮采以寵鄉評可

解州團練使邠寧環慶路駐泊兵馬部署張敏可大將軍致仕制

敕具官張敏階附先恩踐揚禁職累升別使遂視通侯勲書邊瑣之勤久正軍團之重據聞謝病尋請致官憫握節之載勞且據鞍而難強不能者止良克有終宜進環衛之名往寵歸休之樂體余念舊勉爾頤生可

供備庫副使溫臺明越衛婺處州都巡檢毛昌達可左武衛將軍致仕制

敕具官毛昌達早繇強力祇服近班展體知方使煩無懈頗酬材裕升列使華勲總州部之兵遠嚴山越之邏遽茲移疾姑念乞身省章卹然從欲斯在俾陟名于環尹仍歸事于禁聯勉訪全醫尙究遐福可

除名人楊安節可太子右清道率府副率致仕制

敕具官楊安節曩坐重科俾除初籍憫嘗聯于使範宜復列于儲官仍遂退休庶寬痕玷勉思前悔尙服

寵名可。

尙書禮部員外郎天章閣待制范仲淹可尙書吏部員外郎權知開封府制

敕內史列郡之首。邦風所繫。天官一臺之妙。郎選實先。歷求諸朝。我得良士。以爾具官。范仲淹。才給而肅。行介而通。早繇雋科。游質勞閔。逮育書林之秀。兼責諫蒲之言。確然忠規。稔厥時論。再臨州甸。咸結民思。勳旌雅猷。進陟嚴署。甫從宣室之召。仍兼京劇之司。往攝煩政。永爾終譽。可。

奏舉人前桂州錄事參軍周堯卿可著作佐郎制

敕具官周堯卿。秀踐儒科。選條補吏。嚮督郡郵之罰。自甄官簿之勞。使穀露章。朝紳舉最。屬于銓審。參應寵褒。宜引籍于祕丘。且勸能于公路。

元憲集卷二十一

外制

開封府推官邊調可開封府判官太常丞韓琦可開封府推官制

敕具官邊調等內史之治官政所叢必擇乃僚往贊煩務以爾調久服吏事有資材之美而濟以勵精以爾琦早擢雋科有緣飾之文而輔以詳允並猷厥朝譽播于人間或京府奏刀試于已效或國帑操契用匪盡才宜遞補于缺員且參觀于婉畫我有榮序遲圖爾勞可

益州觀察推官楊沆可權蜀州軍事推官制

敕具官楊沆近繇銓啓遠佐使籌會新辟之有從顧舊員而爲闕官因郡幕改珥賓簪効智則同書最爲勉可

節度推官郭昌可西京留守推官制

敕具官郭昌比調銓臺往參戎幕屬師臣之聘吏顧賓席之溢員惟是留都甫當闕屬宜從易地無廢修方可

節度推官蘇賁可某州推官制

敕具官蘇賁擢以戎帥就藩辟書補吏適茲俞請未及之官而使府改麾賓籌佇畫新選旣隨于將幕故

僚宜奉于廉車。是亦寵名。尙圖來效。可。

尙書度支員外郎祕閣校理劉立禮。可開封府推官制。

敕具官劉立禮。神赤之區。海寓同會。贊是尹政。必咨才良。以爾業履。競修幹用。開濟早服。文館有刊。譌之勤。屢倅州符。多飾吏之術。迹乃試效。宜于使煩。且鑿望郎之華。往參內史之劇。勉勵風力。以對寵褒。可。

史官楷書陳宗閔。可蘇州常熟縣主簿制。

敕史官楷書陳宗閔。史局編名。書觚奏技。久隨臺府。專給記曹。嘉時宰之序勤。宜選條之咸集。勾稽邑簿。正秩銓流。勉蹈廉隅。毋忝恩錄。可。

三班借職馮旦。可秀州華亭縣主簿制。

詩禮清門。簪裳華緒。比因遺奏。遂置末班。亦旣從公。居能寡過。且自陳于世烈。冀入預于銓流。嘉乃素懷。易之榮牒。勾稽善邑。無忝先猷。可。

前眞州六合縣主簿陳乙。可潭州湘陰縣主簿制。

久違銓集。自便家居。冒隱地征。占擾閭左。雖罪繇獄具。而罰以赦原。宜因佐邑之資。且爲去里之役。勉修來效。用贖往罪。可。

同知樞密院李諡。除尙書戶部侍郎知樞密院制。

敕。國家總右武之柄。慎惟幾之原。號爲皇樞。以經天緯。非有明達之懿。疇幹宥密之繁。矧道推同寅。績昭

已試。宜階上著。庸鬯大猷。具官李諮。器采忠純。業履宏劬。亮節堅于石席。明慮協于善龜。仰惟先朝。擢在榮序。啓迪言選。藻潤帝謨。肆朕纂臨。益俾親近。邇宣方岳之政。再寵天下之財。爰圖累勞。參贊基命。百汰無耗。屢照不疲。休問日升。衆事寢允。是用進地官之亞列。付皇極之祕機。寢陟上司。以輔予治。方今四鄙弗警。五刃並囊。復茲明哲之才。交修朝夕之務。何煩訓勅。往服寵光。可。

參知政事王隨除尙書吏部侍郎知樞密院制

敕。國家法象紫樞。總攬皇極。建爲使範。均厥宰司。必求經世之賢。參圖基命之要。我有公議。屬于名臣。具官王隨。器涵虛明。道與和正。感會先帝。據發懿猷。擢高妙之哲科。賁文思之休運。洊階廕仕。入服大僚。自朕震坊之初。嘗膺望苑之選。逮于纂紹。固已延登。松寒後凋。井德無改。曷由近侍。升贊元鈞。名實具瞻。政亦惟允。眷乃本兵之地。宜咨同體之賢。是用陟天官之貳卿。幹籌幄之幾事。順攷古道。對揚王休。矧試政之已彰。詎錫命而多訓。往踐厥位。永保令名。可。

故翰林侍講學士尙書戶部侍郎馮元可贈本曹尙書制

敕。夫保德終譽。名臣高致。悼賢加旻。前王令典。具官馮元。性度沈簡。風猷淹素。識探聖繫之奧。文擅詞宗之華。曩踐俊科。亟膺眷顧。傳經釋義。排去異端。登庠攝職。照明羣志。寢階前席之間。入直層構之嚴。肆朕升儲。實參僚采。逮于纂歷。彌資講勸。綢繆露門之學。匪免禁林之游。或裁成信書。或總制經禮。有資必判。應鑒弗疲。頃雖常借郡章。而復進聯卿貳。貪寬中授道之益。賒壺遂倚相之期。時胡不庸。殲我皇士。追惟

往範震于余懷。天臺設官。地板攸重。刻之密印。尙賁泉塗。魂而有知。歆此嘉寵。可。

尙書刑部郎中知制誥晁宗愨可起復制

敕。夫時之須才。則求忠于孝。仕而委質。則推義斷恩。眷乃司言之臣。嬰于去位之戚。敦還舊次。抑有彝章。以爾具官。晁宗愨。業履清淳。猷爲肅給。早聞才劭。入掌贊書。敷大號以惟精。攝攸司而兼裕。殆茲罹閔。姑許解官。躬變棘以盡哀。竭誠信于襄事。歸虞云已。卒哭奄周。當因時以殺情。念展體而宣力。矧家無辭事之職。禮有從宜之文。權廢至懷。紹修乃職。罔矜介節。往復褒章。可。

司天冬官正楚衍可秋官正制

敕。具官楚衍。隸業疇人。窮精天部。嚮繫率職。俾奉營宮。爰逮落成。未之甄錄。宜改司于秋正。俾紹勸于官勤。勉服寵章。毋墜前緒。

尙書考功員外郎知均州張仁惠可尙書膳部郎中制

敕。具官張仁惠。智諳而材。綢展國體。早承宰旅。能輯事經。旋寵爲郎之華。亟膺出守之寄。二邦通課。三載質成。宜眞司膳之選。且候及瓜之期。可。

尙書司勳員外郎判三司都磨勘司兼主轄支收拘收司文洎可尙書主客郎中制

敕。具官文洎。昔尙書主賓客者。有南北之曹。官名相沿。郎選差重。矧參治財簿。通質歲成。循名第勞。遷秩茲允。以爾才敏而慎。節甘而清。曩繇朝僉。出主漕輓。歸有政最。復序計聯。惟金布覆稽之煩。兼文符檢結。

之會。濟以舊課。宜于寵章。俾正握蘭之資。且彰奏刃之熱。可。

利州路轉運使尙書兵部員外郎王軫可尙書工部郎中梓州路轉運使尙書司勳員外郎張從革可尙書主客郎中制

敕具官王軫等。國家崇建外臺。總領諸郡。雖任專漕輓。而責在澄清。矧惟蜀疆。置使差重。積苟用久。賞則有加。以爾軫。悃愾不流。文敏毋害。以爾從革。純素自檢。廉介旁通。並久服朝聯。懋揚政範。奏刃司會。無競。牌之難操。籌外計。有毫釐之析。兼蘊善術。克綏遐氓。歲月當遷。閱閱來上。按有司之練實。嘉能吏之修方。僱工劇曹。典客華序。勿移擁傳之任。咸正爲郎之選。往欽並命。以續乃庸。可。

尙書都官郎中監蘇州茶鹽務陳覃可尙書職方郎中制

敕具官陳覃。早飾吏文。久階郎選。委蛇朝檜。荏苒郡章。比徇奏封之祈。往臨筦利之局。華皓靡懈。閱閱當遷。省曹之名。方志爲重。進服厥位。尙酬爾勞。可。

諸司使副陝西緣邊都監知州葛宗古王從政米吉張世昌並轉官制

敕具官葛宗古等。夫西部之防。與天水。屬安化。亘平涼。奄涇部。皆宿兵處也。參護屯旅。抑惟幹臣。將責後庸。且寄蕃獎。以爾等咸用才力。奮于班聯。出有將命之勞。居多試效之益。質乃功簿。稔于予聞。因使煩之。有初。固並命而惟允。或進貳別帑。或增數內朝。各踐寵階。往固邊略。可。

三司鹽鐵副使尙書工部郎中郭勸可天章閣待制知延州制

敕待對延閣。本咨名儒。制威邊藩。是重良守。二選參妙。兼材實難。以爾具官。郭勸資性端廉。操度詳允。夙以士秀。服于官常。自濯纓登朝。遊刃從政。有清譽以軌俗。有讜論而斥私。及序登諫。副總臺事。言益而彌慎。氣正而不流。旋嘉乃忠。姑試以劇。入充主計之貳。方究析毫之勤。眷惟誥努。介在西鄙。而郡將須代。朝議咸推。宜陟秘嚴之華。往專綏控之任。若其訓定戎索。保障民生。寬猛有宜。威惠交養。茲所望于爾也。得無勉哉。可。

三司鹽鐵副使尙書兵部員外郎陳貫可尙書刑部郎中直昭文館知相州制

敕夫應積星之躔。帖廣內之直。符守兼委。恩數實繁。時酬舊勞。乃允斯典。以爾具官。陳貫。性局彊濟。業履介廉。早擢俊科。稔聞吏閱。風迹聳于州部。幹固表于使臺。曷藉官成。入治財策。副幹大農之用。參主列侯之書。精心所經。白首彌厲。嘉聞久職。宜冀稍遷。用正郎闈之名。協修文館之職。往撫雄郡。併示寵章。循踐清階。毋替厥服。可。

尙書兵部郎中知潭州劉賽可太常少卿直昭文館知廣州制

敕百粵之會。督府表于南溟。九卿之亞。奉常尊于右棘。惟是文館。寵昭儒服。我有命數。屬之材良。以爾具官。劉賽。性劭直清。業總和濟。始階鄉秀。浸講吏文。內則居評刑受計之煩。外則宜頒條將漕之職。躬實勞止。譽亦藹然。淹徊諸郎。華皓一節。纘倚湘中之劇。未更歲次之遷。屬番禺守方符虎。須代適當使道。宜委于蕃。雖臨遣弗遑。而進升惟舊。俾改括河之貳。仍預登瀛之游。往撫裔邦。毋忝朝渥。可。

尙書兵部郎中天章閣待制張逸可樞密直學士知益州制

敕斗樞之庭。分置秘職。所以待名學。并絡之次。下爲督府。所以難守臣。參付寵章。可謂高選。以爾具官。張逸志託夷遠。思懷沈濟。曩繇邦秀。寢服吏資。濯纓登朝。則見許于甘節。奏刀治劇。則毋害于峻文。游假使軺之雄。咸奏方漕之最。躡咨公論。遂陟禁班。就委梓潼之區。歸承京兆之缺。惠稔西俗。政和中都。試才所更。二效尤著。必能將我明命。綏厥遠黎。矧蜀漢之繁。包邛樊之嶮。土沃風侈。民夥事叢。有旌纛以制師。有刀布以藝貢。總是煩使。姑寄爾能。爰卽中臺之華。進兼密署之直。往叱忠馭。無忝訓辭。可。

尙書刑部郎中天章閣待制李紘可龍圖閣直學士知秦州制

敕層禁藏書。以深嚴待儒選。邊瑣擇守。以循良制疆事。矧義圖廣內之秘。天水諸戎之衝。是宜延登。且重臨遣。以爾具官李紘。局度詳正。風力敏彊。早飾吏文。見稔朝論。或執簡憲署。意無隱辭。或操籌計庭。使有餘範。曩旌幹固之效。入升侍從之聯。尋駕傳封。外主漕輓。兩河之績。再歲有聞。來復近班。益見純節。而价藩缺帥。官簿類能。得是幹良。愜乃褒陟。宜仍應宿之選。序直巢阿之華。欽佩寵名。往撫雄郡。勉布威惠。副余倚成。可。

金紫光祿大夫檢校司徒使持節順州諸軍事順州刺史兼御史大夫知順州兼充溪洞都巡檢上柱國京兆郡開國侯食邑一千五百戶田忠俊可加檢校太保食邑三百戶食實封二百戶銀青光祿大夫檢校禮部尙書忠順將軍知溪洞安福州軍州事充寧邊寨東路沿溪洞把截外夷都巡檢

副使兼監察御史上騎都尉田忠穩可加檢校戶部尚書上輕車都尉銀青光祿大夫檢校國子祭酒充溪洞懷遠將軍知歸順州軍州事充寧邊寨東路沿邊溪洞把截外夷巡檢使兼監察御史武騎尉田洪部可加檢校太子賓客制

敕具官某等統帥部族守圉邊陲忠順自效遠邇無敵緣大禮之中慶宜湛恩之博及俾增爵秩以示殊寵可

元憲集卷二十三

外制

尙書司封員外郎知明州張弇可尙書祠部郎中制

敕具官張弇。資性淳夷。操行廉素。擢咨郎選。參按縣畿。心焉首公。善弗求譽。嘉聞美課。尋寵巨藩。而前此攸司。大比來上。始延恩格。更竣歲成。亦旣一周。靡或他吝。宜真握蘭之秩。廉懋剖符之績。可。

尙書屯田郎中知衢州胡晏可尙書都官郎中尙書駕部員外郎知慈州涉積可尙書虞部郎中尙

書比部員外郎知巴州陳甫可尙書駕部員外郎太常博士知蒙州田瑜可尙書屯田員外郎制

敕具官胡晏等。故事。南宮郎專治臺務。國朝均內外之任。率真拜而煩使之。亦旣有遷。尙本其次。以爾等咸服士操。胥濟吏文。游歲結勞。登朝有著。分掌州任。參穆化條。前勤著聞。今治通舉。合是課目。愜予褒章。都隸朕虞。僕駕田部。或正或貳。勉卽厥官。可。

尙書虞部員外郎馬尋可尙書比部員外郎太常博士張泌可尙書屯田員外郎制

敕具官馬尋等。夫臺郎始于墾田。省書總于鈎比。皆一時之俊選也。以爾尋効智肅給。持法敏詳。而嚮守軍牙。有緣飾之政。以爾泌屬辭辨麗。秉操廉約。而涖腰縣組。有撫字之勤。並見考歲成。來結官最。宜階承務之劇。且勸斂才之規。往服寵嘉。毋怠祗飭。可。

太常博士通判定州馬僑可尙書屯田員外郎國子博士知濱州盧南金可尙書虞部員外郎制
敕具官馬僑等。或俊茂服官。或淳固宿業。各敏乃事。序登于朝。勳者輟貳邊麾。假領州檠。雖新莅未久。而
前課已周。宜酬三歲之積。並允一臺之拜。體余郎選。勉爾吏勤。可。

國子博士郭長吉可尙書虞部員外郎通判西京制

敕具官郭長吉。業治儒經。仕優官簿。早階郎署。協布郡條。失于保任。遂罹降斥。屬郊恩之蕩。加京守之
薦。能俾復典虞之曹。往參主鑰之政。悉心營職。以稱所知。可。

尙書職方員外郎知衡州任旦尙書職方員外郎監衢州清酒務郭昭著並可尙書屯田郎中尙書

虞部員外郎通判廬州陳執方可尙書比部員外郎制

敕具官任旦等。各以吏能。參賓部選。或州藩爲政。頗迪惠和。或權酷示譴。已淹時序。並通前績。偕集攸司。
正秩員外。清曹劇選。按名卽授。尙勗官成。可。

尙書都官郎中知處州黃禹昌可尙書職方郎中淮南路提點刑獄尙書祠部員外郎

案此下原制本有闕文

敕具官黃禹昌等。朕以較吏之法。責于攸司。官無內外。三歲一考。循課卽授。褒勸在焉。以爾禹昌。勤身蹈
和。白首無懈。以爾越。小心絜矩。清猷彌劭。並累書閣簿。參賓郎闈。或華榮爲州。藉教條之熟。或赤車按部。
副欽恤之懷。率以年庸。愜我朝獎。陟司方志。貳度國征。往服寵階。尙結來最。可。

應賢良方正科太常博士蘇紳可尙書祠部員外郎充通判應茂才異等科張方平可秘書省校書

郎充知縣制

敕具官蘇紳等。國家振復賢科。咨求邦彥。非以角空文于無用。蓋將佇遠猶之斯告。膺是選者。不其難哉。以爾等抗志經墳。沈精道索。或昌辰委質。已列于朝綬。或別都論秀。洵偕于計物。並能貫穿前載。發揮大猶。溢奏牘以獻文。諷薦章而署行。爰臨便坐。躬覽著篇。雖異等之未躋。亦洽聞而可錄。茲焉第賞。誠協育才。噫。結華綬以陟郎曹。褫野巾而登秘省。贊條外闈。字俗邇封。併示寵章。勉永來譽。可。

十二考人前明州錄事參軍劉愿可大理寺丞奏舉人前渭州司理參軍張京可著作佐郎制

敕具官劉愿等。各以勤廉。參于調補。或郡綱督罰。通續前勞。或州獄守公。見稱敏識。閱其吏啓。嘉乃官成。宜從振滯之條。兼懋舉知之格。省僚寺屬。勉服榮階。可。

十二考人前權楚州團練判官高中正可大理寺丞奏舉人前江陵府節度推官劉湜可著作佐郎制

敕具官劉湜等。咸絲吏資。早介戎幕。或風力清劭。見舉所知。或勞考優深。載符允令。得于銓啓。嘉乃官成。祕局刑司。各備其屬。可。

十二考人前鎮國軍節度推官知鄜城縣宋辰可大理寺丞奏舉人前權岳州軍事判官監納潭州茶米場陳選可著作佐郎制

敕具官宋辰等。比者作爲恩格。差次使勤。銓覈有條。升獎惟敘。以爾等屢由選集。出補賓從。或假以縣章。

積勞于功狀。或莅乎茗稅。見保于監司。宜懋乃勞。改躋優秩。佐郎丞率。分以命之。可。

十二考人前權保大軍節度推官張從宜可著作佐郎制

敕具官張從宜。久調中銓。屢賓外府。近援赦格。歸質歲勤。繫書考之。滋多。顧振淹而有序。宜緣信賞。俾陟榮塗。勉佐蓬丘之華。更圖縣綬之舉。可。

殿中丞知單州碭山縣王文英可國子博士太子中舍知真定府馮日宣可殿中丞制

敕具官王文英等。國家多出中朝臣。以宰百里。蓋欲寵厥任而惠綏吾民。政苟有成。賞不淹晷。旣以勸善。亦俾久官。惟爾等。榮名儒家。效智公局。日以謹飭。蹈于廉隅。修方累勞。遂列閭籍。比荷臺詔。出撫縣封。並能審諭教條。弭服愁艱。灼有善狀。列在攸司。因其大比之辰。且光卽授之寵。經庠盾省。分以命之。益勵乃誠。毋替來譽。可。

殿中丞新差知温州平陽縣楊中和可太常博士太子中舍張子元可殿中丞制

勅具官楊中和等。夫考課之法。所以明淑慝而敘功次也。馭厥郡吏。存乎彝章。以爾等並服朝紳。洊更歲籥。或經明有法。克劭素猷。或門調累勞。頗書善狀。屬茲大較。咸用序遷。議禮曲臺。分曹盾省。各祇寵渙。無替令名。可。

河東路轉運使尙書兵部員外郎陳琰可尙書工部郎中殿中丞通判興元府李公謹可國子博士

太子中允直集賢院知鄭州呂公綽可太常丞太子中舍知明州奉化縣陳世長可殿中丞制

敕具官陳琰等。夫多部郎曹。冑筵師職。容臺之卿屬。盾省之監聯。並爲華階。以敍能吏。惟爾等懿文典學。完行幹材。或將漕使軺。或剖符寰郡。或倅丞于州事。或撫輯于縣封。並質歲成。克厭朝賞。宜就增于榮秩。且究懋于乃勞。成命罔私。余訓無忽。可。

尙書虞部員外郎通判益州楚經。可尙書比部員外郎太常博士知越州蕭山縣王簡。可尙書屯田員外郎殿中丞前知封州劉直溫。可國子博士太子中舍知漢州綿竹縣趙壹。可殿中丞制。

敕具官楚經等。尙書曹有比勾掌屯之員。中朝臣有師庠盾省之屬。各著官簿。以陟吏資。惟爾等智效事。經籍引朝紱。或勤于外補。方贊郡條。或績乃舊勞。累光縣譜。並齋闕來上。質歲有周。宜序美資。交獎成績。毋或懈位。以忝懋功。可。

尙書比部員外郎提舉兗州仙源縣景靈宮晁邁。可尙書駕部員外郎國子博士通判南安軍徐紹齡。可尙書虞部員外郎殿中丞集賢校理知復州王琪。可太常博士太子中舍知鬱林州查冲。之可。殿中丞制。

敕具官晁邁等。課功之黜陟。視勞之殿最。我有彝法。付之攸司。以爾等早服仕階。進班朝次。或華顛郎署。或頰弁經庠。或文雅游書林。或廉端備儲案。並緣外補。參積歲勤。然方奉真祠。倅軍壘。守支郡。撫遐陬。宜卽官成。序進恩等。今以駕曹虞務。絕野盾省之屬。分以命之。其各無忽。可。

十二考人前權建雄軍節度推官張行成。可著作佐郎。奏舉人前南安軍錄事參軍慎晃。可大理寺

丞制

敕具官張行成等。國朝考吏。雖黃綬一命。皆責在銓審。而覆于殿庭。矧厥累勞。固用稽實。以爾亟參調補。咸寡悔尤。或年老應于赦條。或保任列于公牘。宜從信賞。于以懋官。秘省卿曹。各備其屬。可。

十二考人前權保康軍節度推官田穎可。著作佐郎。奏舉人前陳州司理參軍孫淮可。大理寺丞制。敕具官田穎等。問者詔書以吏久不遷。始限考法。才而可任。參責舉知。蓋因方任人。非可以一故也。惟爾等或從事戎幕。或訊獄輔州。年勤應條。薦狀符格。覆自銓啓。愜于余求。省屬卿丞。各服榮序。可。

前權清海軍節度掌書記林杞可。著作佐郎。前明州錄事參軍。錢訪可。大理寺丞制。

敕具官林杞等。或士類美林。或王門遺緒。並沿官牒。久服銓流。杞以作記之工。載華戎府。訪以督郵之敏。流澤藩掾。薦能累牘。鈎課如書。蓬丘佐員。棘路分案。各踐榮次。無忝爾知。可。

大理寺丞通判邕州鄭史可。太子中舍衛尉寺丞。知益州成都縣。王景良可。大理寺丞制。

敕具官鄭史等。補吏有資。施政惟敏。比緣卿屬之選。分任邊州之選。或協贊守條。或懋成宰課。並緣歲滿。宜獎職勞。儲案通閩。法丞署局。各祇榮次。尙續來勤。可。

十二考人興元府觀察支使張肅可。著作佐郎。奏舉人前眞州錄事參軍張孝友可。大理寺丞制。敕具官張肅等。載名銓符。展體官次。或序才累牘。委公車之封。或結課周星。無杜陵之殿。並列在奏籍。應于賞科。蘭臺佐郎。棘位丞屬。勉服並命。思稱懋官。可。

十二考人前益州節度判官尚頌可殿中丞奏舉人前權筠州軍事推官林高可著作佐郎前真定府錄事參軍張立可大理寺丞制

敕具官尚頌等。夫中御之丞列朝品。著書之佐參仕彥。司刑之屬選吏文。皆敍才之榮塗。勸勞之優秩。以爾等咸有成績。調于中銓。或年考淺深。或保任狎至。質諸功狀。符厥賞科。宜並命于華聯。俾陳力于來效。可。

大理寺丞知蘇州長洲縣薛糾監杭州糧料院杜直並可太子中舍光祿寺丞通判海州石延年可大理評事監徐州鹽稅務王諄可光祿寺丞監霸州鹽酒稅馬湜監潁州酒稅李熙政並可衛尉寺丞簽署鄭州節度判官廳公事王政路可將作監丞太常寺奉禮郎監開封府陳畱縣鹽稅務晁仲紘可大理評事制

敕具官薛糾等。胄緒之良材。敏從政。率階京署。參服吏文。或化協郡條。或最聞縣譜。或幕籌甚婉。或局利載登。並稽三歲之庸。宜升一等之秩。儲寮卿竊。各懋乃官。可。

將作監丞王拱辰可著作郎直集賢院制

敕具官王拱辰。夫東觀之論著。麗正之刊輯。皆漢唐樂育之地也。非曰時彥。疇允恪居。以爾業履端和。藻章韜映。擢絲辭等。擢冠士科。尋補匠卿之僚。仍倅州麾之政。而游銜家卹。頗隔歲成。比召復于故聯。且自陳于素蘊。乙篇可喜。給札有規。逮閱試言。茲顯能賦。宜通秘丘之籍。兼光書殿之舉。欽服朝範。循致寵階。

可。

太常博士直集賢院韓琦可右司諫供職制

敕具官韓琦。昔蕭望之有言。以諫官補郡。誠大惠也。然朝無諍臣。所謂憂末而棄本。朕甚憇之。今茲擢才。實曰稽舊。以爾器質純茂。識略淹該。名高俊科。職在文館。嘗倅事于京劇。旋贊畫于財煩。官成有聞。朝論惟穆。臯觀奏牘。求引邸章。雖徇使符之行。屬圖言責之補。且告猷近署。與頒條外藩。循名既殊。所益良重。宜輟往授。以服寵班。兼去儀臺之名。尙仍仙殿之局。企佇忠鯁。副此獎甄。可。

授趙元昊開府儀同三司依前檢校太師兼中書令定難軍節度使西平王加食邑實封制

門下。朕三歲而郊。述修常祀。四海以職。同戴上儀。屬膺祝施之辰。普均慶賚之典。眷我良翰。撫于西人。聿圖成效。用蕃嘉獎。具官趙元昊。資植端厚。器局沈和。克負家聲。光啓王爵。緇衣以改造爲美。甲令以能世稱忠。邊最數聞。時事狎至。自禋燔前戒。妥侑僊升。輸珍實來。固圉惟謹。馨露乃心之恪。益昭維屏之勳。宜錄久勤。用參信賞。夫均儀公府。酬勞采食。實租奉之數。叢典冊之華。茲爲寵章。並照方國。於戲祀惟大事。爾協其恭。邦介純禱。爾預其錫。當懷褻遇之渥。毋怠輯綬之經。往哉若時。欽對余命。可。

尙書司封員外郎直集賢院李溥可三司鹽鐵判官制

敕具官李溥。曩踐秀科。久勤吏事。濯纓通籍。漸翼爲郎。逮預書林之華。再輯守麾之政。積資逾久。應務爲宜。繫鹽筴鐵官之煩。有歲成月要之劇。今茲缺屬。是以求才。往倅計文。尙遲來效。可。

刑部員外郎直集賢院柳植可三司鹽鐵判官制

敕具官柳植。國朝合三使之任。商萬方之利。置副率屬。用相維權。缺員之舉。緊才是擇。以爾志尚凝簡。謀略淹該。夙懷懿文。遂踐高第。尋被陵莪之育。久帖書林之直。況剖符名部。去輒見思。運籌會府。試于已效。比雖慎求。雋望對記。爾言而綽有兼資。可備煩使。宜伸體脾之器。分贊鹽鐵之務。遲乃成績。光余類能。可。

右正言直集賢院吳育可三司戶部判官制

敕具官吳育。左右之曹。諸案爲劇。分贊使範。允歸才舉。以爾言行偕敏。吏雅兼資。濯纓諫垣。抱槧書府。曷藉聲實。試予財煩。操籌所更。奏刃彌熟。宜居地版之佐。姑重計文之選。可。

侍御史馬絳可三司戶部判官制

敕具官馬絳。夫地官有聯。使介爲重。缺員之補。緊材是擇。以爾性理淳暢。行能廉簡。久試吏事。階服憲僚。雖夙夜以首公。實夷退而行已。宜攝兼局。俾效所長。惟登版上。計之繁。有衰征慎賦之要。往茲乃職。佇觀厥成。可。

郎中員外郎南郊加恩制

敕具官某等。朕親執玉幣。祇見郊丘。合祛神祇。嚴配祖考。肆我皇土。服勞于公。適圖福瑞之均。宜先慶賞之舉。爾等學優而仕。吏飾以文。早陟朝闈。進都郎位。外內迭治。材諧兼資。蔚如國華。光我俊選。旣欽柴之竣事。方舍爵以差勤。或進視卿曹。或遞加勳籍。往對嘉命。無替恪誠。可。

館職朝臣南郊加恩制

敕具官某等。朕昨以推策候長。練歲習吉。灌鬯清廟。燔燎泰壇。既尊親以侑神。乃禋福而灑澤。爾等學富而敏。行周而和。咸奮辭華。充我朝選。進預金閨之籍。分裁石室之書。官政協修。士譽彌藹。比緹儀之並講。遵信賞之遂行。或攷侍祠之勞。或旌宿業之效。遞舉勳策。且對榮階。絜乃洽聞。虔此嘉命。可。

楊崇勳父累贈太師中書令兼尙書令追封秦國公制

敕乃者。竭誠禪宗。肆類尊考。實受純嘏。洽暢茂恩。爰列褒親之條。參圖錫類之賞。首閱侯籍。宜煥世靈。具官楊崇勳。父累贈太師中書令兼尙書令。全美材資。忠淳並裕。介而難進。勇且知方。包義府以自高。撫生涯而永慨。任雖靡廡。慶則有餘。藹然身支。列在人傑。勤庸稔于帷幄。威望著于藩垣。光我臣鄰。本之義訓。曩旌遺烈。屢賁幽塗。雖服衰之載華。顧直茅之未啓。龍舒胙國。躬桓飾圭。並示漏泉之榮。益紆濡露之感。可。

元憲集卷二十四

外制

尙書禮部侍郎參知政事石中立除尙書戶部侍郎資政殿學士制

敕登賢于朝。所以贊機務。均逸于位。所以優考成。矧左戶亞卿之聯。西清別殿之職。合是寵數。且解近司。以爾具官石中立。文雅兼資。夷素無競。早階朝弁。遂服禁材。自書命于掖曹。旋升華于侍從。藹然休問。溢于公朝。聶藉璋璋之姿。入參槐鼎之重。左右大政。勤勞厥躬。年序甫周。道冲彌勝。宜適終謙之吉。憫嬰賦政之煩。特進寵名。仍光祕秩。往膺兼授。尙對徽恩。可。

著作佐郎監洪州酒稅鄭修可祕書丞監檀州稅務于可度可太子左贊善大夫制

敕具官鄭修等。籍佐京司。勤宣吏局。或權財官釀。或收算門征。並循齋伐之規。來滿計年之格。宜酬善狀。擢實外朝。書省卽遷。儲坊序拜。姑仍續課。尙謹終譽。可。

大理寺丞監南劍州商稅張鑑可殿中丞簽書西京留守判官廳公事王珣瑜可太子右贊善大夫制

敕具官張鑑等。或席蔭效官。或緣儒補吏。聶繇卿屬。參委事經。都幕借籌。郡征書最。率授考法。來諗歲成。殿監有僚。宮坊著籍。宜孚賞典。並服朝聯。可。

太子中舍劉德之可殿中丞大理寺丞溫嗣良可太子右贊善大夫制

敕具官劉德之等咸以吏勤恪于官次或縣章歷試多列最凡或訟牘見誣近蒙澄雪並越歲成之日宜偕朝渙之恩盾省分聯儲坊有籍各祇榮序尙服攸箴可

江南西路提點刑獄尙書都官員外郎晁宗簡可尙書司封員外郎尙書屯田員外郎通判鳳翔府崔嶧可尙書都官員外郎太子中舍監兗州酒務王整大理寺丞知南雄州陳鑄並可殿中丞大理寺丞知福州長溪縣鄭戡可太子中舍制

敕具官晁宗簡等並稱吉士參服具僚或使轂糾循近承朝委或州符倅守交輯政經或卿屬佩縣章或宮官掌酤利雜焉會課咸克應條郎省分曹殿廬贊府逮于儲案莫匪朝榮卽寵爾勞用信吾賞可

尙書比部員外郎知房州徐弁可尙書駕部員外郎尙書屯田員外郎通判楚州沈周可尙書都官員外郎國子博士陳宗纘可尙書虞部員外郎殿中丞監台州商稅趙德亮可國子博士大理寺丞案原缺一字州滴河縣張利可太子中舍制

敕具官徐弁等夫序官之方責實爲效功賞所值奇于平衡茲乃一邇遐而均勸沮也爾等並緣仕牒參服王畿或郡縣布條或閭臺引籍或貳藩有最或征旅載勤咸以歲成列在恩格星闈郎選米廩冑師逮于儲坊亦寵朝絨差次而授各竭乃衷可

大理寺丞知威州趙祐可殿中丞知雲安軍李敏可太子中舍制

敕具官趙祐等。各服吏資。參補卿屬。緣分遐徼之守。通嗣前勞之庸。計最上聞。恩典無廢。陪官盾省。引籍震坊。有著于朝。且寵其任。尙結終課。思稱序遷。可。

殿中丞監在京豐濟粳米倉李宗傑。可國子博士。大理寺丞尙正德。可太子中舍制。

敕具官李宗傑等。或經生服官。或蔭格延賞。智效茲久。歲成屢更。而參掌倉儲之煩。外司酒利之筭。通質前課。抑惟舊章。國胄清階。震坊華籍。宜從並命。且寵稍遷。可。

大理寺丞知河南府登封縣李虞卿。可太子右贊善大夫監河陽清酒務聶德一。可太子中舍制。

敕具官李虞卿等。並飭吏資。旅參卿屬。或邑圻敏政。或官釀庀司。齋伐于朝。甄勞滿歲。訖無殿狀。胥協寵階。宜對踐于儲坊。且通榮于闔籍。益虔官守。尙對恩褒。可。

太子中舍劉世寧。可殿中丞。大理寺丞劉文正。可太子中舍制。

敕具官劉世寧等。醇謹服官。綱繆累課。或序華儲禁。或列案刑卿。率職殊聯。稽勞比牒。宜錄歲成之效。迂遷朝著之榮。可。

尙書虞部員外郎侯渭。可尙書比部員外郎。殿中丞楊歸一。可國子博士制。

敕具官侯渭等。夫展體營職。臣所以事上。計課遷秩。朝所以懋官。績苟有成。恩必爲避。以爾等階榮仕牒。陳力公家。籍預闈臺。政更郡邑。比獻累勞之狀。率符覈實之條。郎署有員。經庠列局。各欽明命。往服乃僚。可。

尙書都官員外郎前通判宣州江鎬可尙書職方員外郎殿中丞通判秦州董經可國子博士制
敕具官江鎬等國家絃材之方考績爲實故吏無內外三歲一比以爾等或躬蹈儒訓或善襲世謀並飭
吏文來引朝禮躡參倅事之選且寄類能之勤涉此閩成咸以課舉覈狀有次增秩爾宜司域美曹教胄
清品各服明賞用勸庶工可

太常博士通判滑州王述可尙書屯田員外郎殿中丞前知濰州徐起殿中丞通判安肅軍祁可久
並可國子博士制

敕具官王述等故事考吏必計功限歲而面陟之若官參外聯身隔歸課者乃稽成卽授急示明勸以爾
等或論秀筮仕或承學中科並濟吏資稔服朝範爾述適居輔郡贊我帥臣協用教條能罄風力起與可
久皆任在邊壘狀集攸同勤庸相當褒擢非吝宜承郎宿之務且進經庠之師勉蹈攸箴毋忝公賞可

太常博士通判福州謝微可尙書屯田員外郎殿中丞通判沂州張薦可國子博士制

敕具官謝微等夫郎官博士皆往代之高選也因革雖異名品尙優制厥朝聯往待功次以爾等踐揚閩
籍緣飾政經或倅事閩區甫從臨遣或贊條沂水未及代還並當歲月之遷難稽善最之賞各循華級益
蹈清規可

尙書駕部員外郎知龍州張舜元可尙書虞部郎中尙書屯田員外郎通判明州皇甫宗孟可尙書
都官員外郎殿中丞通判沂州周踐可國子博士制

敕具官張舜元等昔虞書考績周家大比率用三歲以覈衆功國朝因之所以質官成稽古道也以爾等敦修士檢勤曉政經或承學中科或富文飾吏並參華朝絨營職郡條遐俗安安善部澄一雖守麾關掌之名異而類能稽伐之理均功狀可嘉恩典非吝序升郎秩改服師庠勉膺卽授之寵用穆有彛之制可尚書虞部員外郎知同州張師錫可尚書比部員外郎殿中丞知端州趙時殿中丞通判秦州楊文舉並可國子博士制

敕具官張師錫等夫臺郎有總勾簿領者于諸曹爲劇學官有訓課國子者以博士爲優分職雖殊公選猶重以爾等或食德之裔或通經之良並久服朝班分攝州任剖符倅事限關踰嶺附課來會增秩有常並懋所居之勤且階卽授之寵可

西京作坊使知洛州張明可左武衛將軍權判左金吾街仗六軍儀仗公事內殿承制蔡州兵馬都監裴化鱗可左千牛衛將軍權判右金吾衛仗公事制

敕具官張明等夫環衛建官有經武執刀之率徼循按隊有慎街訓仗之禁分職乃事時惟寵名以爾明早服使勞攝藩符之重以爾化鱗勳由殿省督州旅之屯並黽勉公家驅馳晚節深念使藩之效久嬰補外之勤宜換峻班特均優秩且參華于引籍實資號于銜珠勉蹈寅恭以對褒擢可

前尚書金部員外郎王惟正前太常博士李東之並服闋可舊官制

敕具官王惟正等向以罹閔家庭解官朝絨並遵經禮克守通喪燧穀載周苴麻有訖司珍外秩抱藹清

曹各膺還次之恩。用光移孝之美。可。

前尙書比部員外郎張師錫服闋可舊官制

敕具官張師錫。曩罹內艱。自解榮籍。華首而慕。素鞵有終。宜因禫祭之除。往復朝聯之舊。勉思移孝。且體斷恩。可。

前國子博士梁惟吉服闋可舊官制

敕具官梁惟吉。頃嬰家疚。言謝朝聯。燧穀再新。禫祥有訖。復從王事。茲實禮經。勉循移孝之方。姑踐服官之舊。可。

前祕書丞馮適前祕書丞集賢校理彭乘並服闋可舊官制

敕具官馮適等。嚮執親喪。自褫朝絨。並銜終歲。已及外除。嘉克蹈于禮經。難久辭于王事。宜還舊貫。勉服茂恩。可。

殿中丞致仕田儼服闋可舊官制

敕具官田儼。曩膺家戚。遂離官次。喪期有訖。朝恩惟序。宜還盾省之秩。尙邁鄉閔之歸。可。

前殿中丞魏莊等服闋可舊官制

敕具官魏莊等。曩者各執親喪。並去官次。苴麻如禮。燧穀再新。宜散祥琴之哀。復還朝弁之吉。斷恩移孝。欽我寵章。可。

前著作佐郎周沆前大理寺丞蘇安世並服闋可舊官制

敕具官周沆等曩遵家艱。並去官籍。禫祥有數。燧穀載新。宜抑孝心之隆。復還王事之守。斷恩展體。用適禮經。可。

前光祿寺丞錢揆服闋可舊官制

敕具官錢揆。曩執親喪。自離官籍。奄終祥禫。已復故常。勉勵移忠之心。姑還主膳之次。可。

前大理評事丁瑑服闋可舊官制

敕具官丁瑑。曩服親艱。憫勞王事。愔然去職。訖此終喪。官抑御琴之哀。復還聽棘之屬。可。

前太常寺太祝林克讓服闋可舊官制

敕具官林克讓。曩屬家艱。俾解王事。喪期有數。祥祭遂除。宜服故官。以嗣前績。可。

沿堂五院承引官將仕郎守京兆府別駕張昭吉可右千牛衛長史充沿堂五院副行首制

敕具官張昭吉。祇事宰庭。編名府屬。職于贊道。協乃幹恭。宜進敘于缺員。且副升于右列。兼榮衛佐。勉服朝恩。可。

起居舍人知諫院姚仲孫可尚書戶部員外郎兼侍御史知雜事制

敕漢家以文中御史參遷目。唐制以郎知雜事。雄官儀。明其緣飾。風采濟于幹用。然後能振綱紀。而澄姦伏也。我有公遷。屬之名材。以爾具官姚仲孫。肅給自將。和正無撓。早服賢舉。亟給吏勤。曩擢朝貴之華。入

光諫署之列。重以言責。涉于歲期。嘗疇厥勞。進序清秩。而造膝靡懈。視履有方。善非近名。直不爲訐。迹其雅尙。宜渥寵褒。俾階左戶之榮。改率南臺之屬。樹聲措枉。茲有望焉。可。

監察御史裏行高若訥。可尙書主客員外郎兼殿中侍御史裏行制。

敕具官高若訥。志操清淳。風宇韶令。早繇辭等。擢在雋科。自褫巾于仕塗。逮引籍于朝紱。曾靡他吝。休有厥聲。比緣慰薦之章。寓行察視之列。屬攸司大校。舊課有成。通覈歲期。當懋恩典。俾升郎位之寵。且參殿中之憲。往服兼命。無懈迺誠。可。

鎮安軍節度使同中書門下平章事呂夷簡。元隨袁宗可。銀青光祿大夫檢校國子祭酒兼監察御史武騎尉充教練使制。

敕某下元隨袁宗。早率隸勤。載懷忠事。屬吾元弼。均逸近藩。嘉其執侍之良。協乃補除之次。綬紆庠秩。憲職武勳。併示寵私。勉懷祗恪。可。

贈太保中書令王曙。元隨高貴。可銀青光祿大夫檢校國子祭酒兼監察御史武騎尉充教練使制。敕某下元隨高貴。早繇家隸。事予台臣。屬茲終位之哀。軫以服勞之舊。正名牙職。攝寵朝階。勉荷遺恩。以終初惠。可。

銀青光祿大夫檢校國子監祭酒知溪洞峽州軍州事兼監察御史武騎尉舒通旻。可加雲騎尉制。敕具官舒通旻。邊種推豪。世官內屬。久祇疆事。能稟朝規。屢全出徼之俘。彌顯來王之節。騰章自達。疏賞

攸宜俾進勳名。用光忠效。可。

熟戶俞龍潘可銀青光祿大夫檢校國子監祭酒兼監察御史武騎尉制

敕秦州永寧寨熟戶俞龍潘。乃父以祗服世勞。奉承邊略。奄遺緒業。屬爾後昆。繼軫淪亡。次須紹襲。宜擢升于軍簿。俾保訓于族人。仍視官榮。且謹吾圉。可。

元憲集卷二十五

外制

翰林學士承旨尙書禮部侍郎知制誥章得象加階食邑實封制

敕朕以天正上元味爽冬至親旅備物拜貺于郊參賴左右之臣協敷陟降之禮亦旣均福茲用懋官以爾具官章得象理識清明風姿高劭早服榮序濬發懿文入以代巽風之辭居常無溫樹之語游疇時望升冠禁庭會崇配于嚴陔咨領使于容薊緊爾儻導成我肅恭固當進于榮階衍以多邑且旌親近之選兼茂講求之勞益綏善猷往敷徽數可

入內東頭供奉官于德源可內殿承制制

敕具官于德源恪職禁庭序勞使籍凡更指任咸著勤庸慎祕殿之參承訂外朝之拱集宜從超拜用示優褒益勵乃誠無忝官次可

入內西頭供奉官勾當御藥院周惟德可內殿承制制

敕具官周惟德以懿愿之資補禁嚴之籍率力彌厲將指弗渝比兼藥劑之嘗亦更歲律之籍宜疇謹幹超序班聯惟承命于殿中實均儀于朝右往祇優渙無廢前庸可

內殿崇班焦宗約可內殿承制制

敕具官焦宗約。食德侯家。聯榮戚里。仍借累課。遂服華班。緊爾好逑之宗。乃余自出之懿。式嘉媚近。奄及淪亡。矧遺札之上聞。且令夫而爲請。宜緣永悼。特渥寵章。俾進殿塗之懿。無爲世閱之忝可。

內殿崇班曹傳可內殿承制制

敕具官曹傳。重侯之門。藉蔭而仕。風華有裕。謹敏自將。服在榮班。無忝勳閥。矧中闈之昵屬。輔良治之美才。宜進殿聯。且光親籍。往祇渥洽。罔懈踐修。可。

內殿崇班夏元規可內殿承制制

敕具官夏元規。地承勳胄。名列禁班。拳勇知方。敏勤無累。眷言乃父。方總衛師。授恩典之常科。庇身支而有請。所宜進秩。用獎教忠。勉服內聯。以光華閥。可。

太常少卿張宗誨可四方館使文州刺史知貝州制

敕。賓館置使。方奏是司。州符長人。郡寄爲重。尤是蕃獎。屬于兼材。以爾具官張宗誨。風力精明。志用沈果。出于槐鼎之緒。濟夫几案之資。久服朝聯。遂階卿亞。中外所歷。閱閱已彰。然惇學有初。晚節彌厲。比閱論兵之奏。益嘉徇國之謀。將適所長。固當易授。宜均榮于外著。且增采于禁班。勉佩褒華。以伸忠蘊。可。

奏舉人前權祁州軍事判官胡思聰可著作佐郎制

敕具官胡思聰。鄉秀榮名。吏銓隨牒。勳參賓畫。介在邊藩。賞有將漕之臣。胥暨通閩之士。咸條善狀。分集攸司。覈實孔彰。懋勞惟允。陟于祕佐。勗乃官成。可。

前同州馮翊縣令張造可著作佐郎制

敕具官張造。吏銓結課。殿最有常。詔恩舉知。保任爲重。向非佳吏。曷光清選。以爾早服儒行。嘗擢俊科。廉以自將。文而毋害。頃字氓于大邑。能寡悔于厥躬。齋伐上聞。薦章可復。佐于秘局。旌乃官成。欽服寵章。以終素守可。

奏舉人前揚州觀察支使黃昌齡可著作佐郎制

敕具官黃昌齡。久籍中銓。累賓大府。雖本階門蔭。而見許吏資。薦寵狎聞。滯淹可恤。宜參賞格。進序京曹。往佐著書之庭。尙酬入幕之畫可。

開封府兵曹參軍王翼可著作佐郎制

敕具官王翼。文敏中科。身言補吏。掾于京劇。再結歲勞。府列薦辭。朝無各賞。擢佐著書之選。尙領坐曹之務可。

奏舉人前應天府推官謝郢可著作佐郎制

敕具官謝郢。材服俊良。行歸廉素。彘繇科選。見重賓籌。宗工外臺。連啓交薦。擢參書省之佐。姑信吏銓之賞可。

奏舉人昭信軍節度推官前知興國軍大冶縣同監買茶場張經可著作佐郎制

敕具官張經。藝文而仕。廉智自將。再珥賓簪。參司利權。薦能累牘。稽實盈條。宜佐局于蓬丘。且漸榮于磐

羽可。

奏舉人前湖州烏程縣令王稷可著作佐郎制

敕具官王稷推秀士林階勞吏牒綰銅被選製錦無傷近署薦能外臺舉最章交軍府課協銓條宜升議著之佐且寄品流之賞可。

奏舉人前江寧府上元縣令兼管勾府學任凱可著作佐郎制

敕具官任凱丘園之良造秀階選雖褫巾補吏而挾策名家曷徇守臣之章俾與郡學之法兼宰劇邑姑慰後生風政並修慰薦尤數宜用銓部之啓擢佐史筵之郎勉服恩華尙寵儒業可。

尙書比部員外郎通判舒州趙溫瑜可尙書駕部員外郎尙書虞部員外郎知道州譚嘉言可尙書比部員外郎制

敕具官趙溫瑜等階蔭宿官第勞引籍或布宣郡詔或通刺守符歲課上聞郎選惟序宜均郎授之寵且懋稍遷之勤可。

天平軍節度使檢校太師同中書門下平章事判河南府王曾男太常寺太祝紹可將作監丞禮部尙書知亳州晏殊男明遠可祕書省校書郎資政殿學士尙書戶部侍郎薛奎親姪男房孺可將作監主簿尙書戶部侍郎知廬州陳堯佐親孫男知愚可將作監主簿尙書戶部侍郎知永興軍范雍親孫男子初可將作監主簿翰林侍讀學士兼龍圖閣學士尙書工部侍郎權知開封府程琳堂弟

溫瑜可試將作監主簿制

敕具官王曾男紹等。稟和令胄。服業素風。率在妙齡。未參初仕。適因誕節。旅集慶儀。乘嘉會之均休。復乃親之言念。願延賞典。以啓榮階。循厥舊章。俾覃渙渥。卿曹書省。正秩試官。差序以陞。勿忘祇勗。可。

樞密直學士知益州張逸外孫姚穀可試將作監主簿制

敕具官張逸外孫姚穀。越在童牙。甫親師塾。惟乃外門之懿。時余邇列之良。方寵奧藩。翼惟麗澤。宜試榮于匠屬。尙慰心于母黨。可。

皇姪故如京使從善可贈刺史制

敕具官從善。宗籍之英。王藩衍祚。早被恩于敦族。亟階寵于陪官。游服使華。克敦朝矩。方竚麟趾之盛。參固犬牙之封。而遵沴弗瘳。殲良遽及。眷言短歷。深軫余懷。特升號于竹符。且厥儀于密印。魂而有識。尙或嘉茲。可。

中書試西上閣門使除懷州刺史制

敕文武之効。濟治式均。出處之寄。惟才是擇。矧州部之雄重。有民政之撫綏。必埃茂庸。乃付茲任。具官某。志懷沈果。謀術淹該。服煩使而有初。露美材而滋久。風華自飾。忠謹內充。自列職于禁闈。實練儀于朝著。訖無貳事。休有厥勞。酬其使範之誠。易以价人之重。矧茲近輔。屏于中邦。有旌纛以輔威。有圭符而分契。政之麗則。興歎于閭里。化之得則。蒙潤于京師。今茲作牧之榮。可亮簡心之極。宜思尤效。以篤前庸。無俾

刺舉三河之人。專美于漢牘也。可。

落軍權正授團練刺史制

敕。國家經武有常。懋功至慎。苟勞于久次。則寵以番休。亦將均燕瘁之宜。一中外之使。具官某。志懷鷗果。姿局雄嚴。早奉戎昭。進司王衛。訓顏行而知勇。肅師律以無譁。忠效著聞。歲期屢易。特峻圭符之數。用酬夙夜之勤。往踐使聯。罔替嘉績。可。

管軍加團練刺史制

敕。王者崇衛帥兵。分建營府。必咨忠慎。以領訓齊。具官某。早志戎韜。游階勇爵。自撫循于爪士。克震疊于旌和。歲月屢周。勤勞匪懈。稽功有典。進秩爲宜。遙視圭符。敝升師領。益輸亮節。以服明恩。可。

京西路轉運使尙書度支郎中楊日華。京西路轉運副使尙書主客郎中林維三。門白波發運使尙

書比部員外郎王隲並可加勳制

敕。具官楊日華等。朕以屬者先後陪陵。西畿戴役。眷言經用。參責攸司。訖事在辰。計功有典。以爾等各緣吏伐。分領使權。或調食于寰封。或董舟于河次。率勤供億。胥濟繕營。勳級之華。朝章惟重。俾書于策。用寵厥官。益勵風聲。且稱甄獎。可。

尙書主客郎中判大理寺司徒昌運。加柱國。國子博士。權大理少卿。公事呂紹寧。加輕車都尉。國子博士。通判齊州。淳于侖。殿中丞周孝孫。審刑院詳議官太子中舍李倩。並加上騎都尉制。

敕具官司徒昌運等。朕以官司之繁。法禁惟錯。倚請託庇。日以益滋。頗末相違。遵用靡據。是命爾等設局而審議之。彌歷歲躔。協比曹屬。而能分條輕重之目。總括繁簡之中。成篇載勤。列牘來上。其有宣力參半。補吏外遷。逮此圖庸。固當均賞。宜並升于勳籍。且增勸于朝猷。欽踐寵階。毋替厥服。可。

太常博士集賢校理知臺州范說。可尚書祠部員外郎。國子博士通判成德軍陳及。可尚書虞部員外郎。右贊善大夫知汝州梁縣呂師簡。可殿中丞制。

敕具官范說等。尚書諸曹。參知承務。鈎盾華省。咸率屬僚。因其寵階。式敘功次。以爾等早勤智效。祇服朝規。或預校中經。正簡編之謬。或往釐外職。成郡縣之勞。並攷攸司。莫匪嘉績。疇其歲滿。易乃官聯。增秩以留。勉終來效。可。

尚書職方員外郎知歸州沈厚載。可尚書屯田郎中。殿中丞知平定軍樂平縣張傑。可國子博士。太子右贊善大夫通判吉州晏融。可殿中丞制。

敕具官沈厚載等。夫稽功緒。陟官成。頌之歲期。蓋有彝法。故虞考績而周大比也。以爾等或學古優仕。或籍蔭累勞。適于吏資。服我朝著。並緣郡縣之績。參有新故之勤。通會課條。率應恩格。郎曹茂秩。庠局美聯。逮于盾省之華。咸稱閨籍之選。各懋終譽。無忝稍遷。可。

太常博士前知富順監戴翼。可尚書屯田員外郎。太子中舍通判蔡州王康。可殿中丞制。

敕具官戴翼等。夫尚書以墾田爲郎。鈎盾以中御率屬。皆一時功次之選也。以爾等或鄉秀來任。或經術

自將咸服吏資。寘我朝紘。惟翼遠勤。巴徼而成。課可甄。惟康近倅。汝南而前。勞未錄。閱于考簿。協乃歲成。宜懋當遷之資。益圖報稱之效可。

十二考人前權資州軍事判官孟化成可著作佐郎奏舉人前彬州宜章縣尉監温州大富南監張上遜可大理寺丞制

敕具官孟化成等。各沿吏牒。亟調銓流。或從事戎旃。久而無過。或商功鹽策。訖于有勞。憫其歲日之淹。嘉乃監司之薦。宜從陟狀。進服榮章。祕局卿丞。毋忝分命可。

二考人鄆州觀察支使王爲可著作佐郎奏舉人權寧海軍節度推官吳威可大理寺丞制
敕具官王爲等。國家旌宿官之勤。明舉善之法。合以求士。宜無棄才。以爾等早調銓符。並隨賓檄。或績勞書考。已及周星。或沈雋伸知。見稱累牘。嘉聞吏啓。俾陟京聯。郎佐卿丞。各服襲命可。

尙書司封員外郎直集賢院判二司開折司兼提點催驅公事王儼可尙書工部郎中制
敕具官王儼。積星蔚然。著象郎位。若馴工官贊事典者。又俊選之極。摯以爾家慶。憑厚材資。幹巖曩。奮辭蘊茂。擢秀科。游服朝綏之聯。久更書殿之直。曩繇郡最。參理計文。當逆受鈎考之煩。罄推行靡密之效。質乃歲課。愜予褒章。宜正屬于列曹。尙宿業于司會。勉恪新命。滋樹令猷可。

尙書屯田郎中知曹州陳師古可尙書都官郎中尙書職方員外郎通判荆南府吳有鄰可尙書屯田郎中制

敕具官陳師古等。臺郎有督中都之隸。覈墾田之實者。本朝遷補。率以茂材吏處之。惟爾等咸踐秀科。久通榮籍。官宿其業。吏飾以文。或剖符爲州。地切寰服。或倅條分政。事叢督府。且有舊課。列之攸司。三周質成。連最當陟。宜進星鳥之次。益蹈羔羊之規。仍懋來勤。俾久于職。可。

和州司馬范極可泰州司馬制

敕具官范極。早籍銓流。洊擢殿格。勳坐勢交之援。實從軍佐之遷。屬乃禋燔。大需恩號。滌瑕有典。易地爲宜。勉新令圖。尙弭前悔。可。

林獻可移袁州司馬制

敕具官林獻可。勳者果于貢辭。實在班籍。繼繇賄墨。謫佐軍司。而靡念省非。輒復干上。託緣夢寤。陰濟訟仇。迹其初心。弗忍嚴譴。俾移遐郡。且警狂夫。尙記昔言之忠。俾仍典午之籍。可。

三司戶部判官尙書刑部郎中劉齊可尙書兵部郎中制

敕具官劉齊。臺郎之選。雖有彝序。至于內外兵之劇。則高才異最者處之。以爾文行交修。風采兼劭。久紆朝紱。洊攝郡廳。治無苛聲。去有餘頌。早旌吏伐。參握計籌。曾未踰時。輟以居部。比緣財使之缺。復被召還之音。官雖屢移。課則通考。宜繇司寇之筮。升備夏卿之屬。且勤會要用。服寵甄。可。

尙書主客郎中知潭州夏侯彧可尙書金部郎中制

敕具官夏侯彧。昔漢二千石有治效者。輒繅書勉勵。增秩賜金。國朝稽勞懋功。卽賞于外。亦其義也。惟爾

踐儒科之目。通吏師之學。游懷章而出守。亦馳傳而糾刑。責我周行。多歷年所。頃資劂刃。入贊計籌。而湘潭之邦。符竹須代。輟以居部。會其實成。按有司之類能。通三載而論績。且因善狀。爰俾敘遷。司珍劇曹。應宿華選。寵之新秩。時惟勗哉可。

熟戶訥略約蘇可本族軍主制

敕具官訥略約蘇世豪西鄙。籍隸諸酋。善稟朝規。協祗疆事。蠢茲寇盜。奸乃禁防。嘉戢捕之有勞。顧賞勤而斯允。俾還族帥。用獎戎昭可。

環州蕃部沃協等可本族副軍主制

沃協等世保疆陲。地雄種落。眷言乃父。實主團兵。奄遘凋殂。固當嗣襲。矧見推于尺籍。宜並副于軍幢。勉服茂恩。用光先職可。

殿中丞馬坤崔中正薛貽應並可國子博士制

敕具官馬坤等。各服吏勤。序升朝品。勵廉隅而有素。守科指以無違。歲籥游周。功簿來上。嘉其寡過。協乃推恩。宜並命于經庠。且勸能于官次。益敦素履。無廢前勞可。

登仕郎太常寺太樂正張用成可太樂署丞將仕郎守太常寺太樂署副樂正張惟慶可太樂正太

常寺攝樂正孟化琮可將仕郎守太常寺太樂署副樂正制

敕具官張用成等。參習樂華。奉承署表。率工師而宿業。彌歲歷以書勞。官缺備員。籍當次補。或進丞本局。

或聯正爾司。各服寵階。罔替成效可。

王拱辰父可贈太子中允制

敕。乃者恭郊廟之享。報臣工之勞。均覃茂恩。并寵先烈。所以勸存追遠。納人于厚者矣。以爾具官王拱辰。亡父具官某。惠和膚敏。端平愨固。序調銓擢。參尹縣圻。晚賦歸來之篇。善訓過趨之嗣。冠升材等。優啓士途。逮垂紳之造朝。已瞻帖而銜感。永惟知子光我得賢。宜獎教忠之風。且光通籍之贈。賁于幽漠。尙或歆榮可。

尙書吏部侍郎知樞密院王隨加功臣食邑實封制

敕。朕昨以母后上仙。山園復土。首咨樞輔之哲。專領使儀之雄。亦旣祔升。聿圖勞瘁。具官王隨。才範沖遠。賢業富優。令望稔于先朝。休績參于余治。逮司幾務。實冠近聯。善講本兵之謀。洽聞籌幄之論。屬慈闈喪恤。神域慎終。制定禮文。護興事典。實繁精力。副我沖懷。今坤廟格思。寰畿訖役。宜霈賞勤之令。且褒同體之賢。功號增華。幹封衍食。併爲異數。茲協至公。往服寵章。詎假多訓可。

贈太傅中書令寇準可諡忠愍制

敕。夫徇義保躬。賢哲罕兼其致。原心觀行。衰沮得伸其公。惟節惠之舊章。實經世之明勸。不有正義。孰旌遺烈。故贈具官寇準。器質莊重。風猷簡貴。感會先聖。綢繆上司。明心若丹。直道如矢。逮余主鬯之日。實乃秉均之秋。圖惟協恭。罔有二事。搆盜言之障沓。挾危法以中傷。白璧易汙。貝錦難辨。再罹遐謫。遂歎云亡。

終非零雨之歸。徒軫幽泉之痛。間雖游伸澄雪。追賁寵嘉。而誅行易名。尙闕茲禮。沈謀碩畫。淪于疑論。逝者莫愬。朕甚憫之。諡法有危身奉上曰忠。佐國遭憂曰愍。合是休典。慰其塋魂。可賜諡曰忠愍。

尙書祠部員外郎集賢校理同知宗正寺趙槩可尙書刑部員外郎制

敕具官趙槩。尙書諸郎。雖功次遷授。至于首曹劇選。則以雅望處之。爾業履清淳。韻字和秀。早階俊譽。升寘上科。尋服書林之游。嗣結軍牙之最。入承尹政。休有吏資。勳請豫章之行。方均渤海之寄。屬余宗籍。慎補乃僚。亟命召還。且俾參攝。眷惟舊課。通覈攸司。宜循載績之規。進聯寇部之屬。欽率優典。彌劭令猷。可。

元憲集卷二十六

外制

大理評事監在京廣衍倉李鄴可光祿寺丞制

敕具官李鄴。地襲華腴。世承燕翼。曩繇卿屬。參掌國儲。官勤有庸。歲滿無殿。嘉其最狀。稱厥懋恩。俾改膳卿之聯。尙修庾司之職。可。

大理評事知建昌軍南城縣李虞卿可光祿寺丞制

敕具官李虞卿。緣文有資。階蔭而祿。比繇評讞之秩。外寄絃歌之才。三年質成。百里兼最。膳卿補屬。令組載華。勉續前勞。尙佇來賞。可。

大理評事監海州酒稅王誨可光祿寺丞制

敕具官王誨。世祿妙年。相門餘慶。比從外掌。克服攸箴。滿歲攸勞。倍官有秩。宜參膳卿之屬。且酬海邦之筭。勉履寶訓。無忝茂恩。可。

十二考人前權福州支使張貴和可大理寺丞奏舉人前知陳州宛丘縣宋孝孫可衛尉寺丞制

敕具官張貴和等。序登仕籍。祇率官常。並敦勤吏之風。罕絀簡書之責。比因成課。來調中銓。或赦令之議。年或薦章之保任。質于彝典。符厥賞條。俾補屬于卿丞。且勸能于選部。可。

奏舉人前撫州司理參軍孟造可衛尉寺丞制

敕具官孟造。本借鄉能。入服銓調。嚮司狂獄。介于江湖。而民挾詐輕吏。困叢密。惟爾善職。訖無煩辭。交章以聞。覈課尤審。宜酬歲考。升佐衛卿。益懋修方之勤。且光擢俊之舉。可。

奏舉人前鄧州司理參軍歐陽宗閔可衛尉寺丞制

敕具官歐陽宗閔。夫選條以累勞爲資格。詔書以陟狀舉滯淹。勤庸相當。乃議甄擢。以爾處躬無玷。效智有初。洊更州縣之勞。罔絀簡書之責。灼焉善最。副厥薦言。宜改佐于卿司。用勸能于公路。可。

太常博士集賢校理錢延年可尙書祠部員外郎制

敕具官錢延年。世德載靈。孺年筮仕。早嘉學治之劭。參服讎書之勤。亦旣登朝。洊俾從政。頃倅州事。自遵家艱。逮闋制而復官。屬稽勞之滿歲。司禮列局。承務有聯。且寵握蘭之資。更光抱槧之業。可。

太常丞直集賢院判三司都理呂公綽可太常博士制

敕具官呂公綽。唐典博士。隸奉常者。爲六品清官。曩制相沿。今選尤重。以爾氣調秀舉。才致敏通。雖籍公臺之華。躬修儒素之檢。以奏技帖仙職。以累伐佐計籌。參會課條。甫越葑閏。宜繇陪棘之屬。進繕當茅之儀。姑爲寵階。尙服煩使。可。

祕書丞知鬱林州黃中可太常博士殿中丞監眞州權貨務孫祖道可國子博士制

敕具官黃中等。夫考吏之法。覈實爲先。沿勞限年。按狀遷秩。則政不壅而才有敘矣。以爾等或懿文筮仕。

方爲政于海區。或精力首公。適幹利于江界。並列成課。集于攸司。宜從歲滿之遷。以勸官成之效。禮臺舉省。博士有員。卽而授之。勉服華寵。可。

殿中丞陳希亮可太常博士制

敕具官陳希亮。曩繇辭等。服我仕途。官率攸箴。文能毋害。比成縣譜之治。入齒朝紳之華。自上歲勤。參符考日。俾繕儀于漢苑。且光績于虞篇。往踐榮階。益固清守。可。

前鄭州原武縣令游開可著作佐郎制

敕具官游開。業文登科。絜矩從政。比爲右輔之邑。見舉外臺之章。銓覈上聞。朝恩有典。宜參祕籍。用寵官成。可。

淮南轉運使李昭述男仙卿可試祕書省校書郎制

敕具官李昭述。男仙卿。乃父以望郎之華。膺別使之選。授節云始。任子有常。矧鱸序之令門。服鯉趨之清訓。膺茲延賞。必克嗣徽。往試讎書之榮。無忘食德之舊。可。

益州路轉運使楊日嚴男公度可試祕書省校書郎制

敕具官楊日嚴。男公度。任子之令。所以褒官勤而延世賞也。惟乃父察使于西州。方促萬里之行。曾無九折之憚。宜榮吏牒。以寵親庭。優學勵躬。無忝來遇。可。

廣南東路轉運使龐籍男元魯可試祕書省校書郎制

敕龐元魯乃父以被詔天臺揚旌嶺服方馨首公之節且授任子之恩將責使勞宜推世賞免膺學筮以寵私門可

駕部郎中致仕辛惟簡男炤可試祕書省校書郎制

敕具官辛惟簡男炤迺者詔書吏有引年辭仕者許上一子名以補吏所以寵退身厚世祿也乃父惟簡老于郎潛願去朝班且及恩典庇嗣之請今俾往試讎書勉蹈清規無忝余賞可

前鄉貢進士石洵直等三十三人並可守祕書省校書郎制

敕石洵直等迺者深詔庶邦並舉髦士必加參棘乃允詳求以爾等署行鄉書露材貢部紛懷鉛而就列咸摘藻以奏篇蔚有深辭可躋異等因其中選榮以修方祕局校文京員錫綬勉敦儒範以對朝恩可

河北都轉運使楊偕姪孫景芬可試祕書省校書郎制

敕具官楊偕姪孫景芬爾之從祖久服計臣比升榮聯且委雄部適駕言于使傳遽餘蔭于私庭責效云初延賞奚吝俾試讎書之秩用懋貽孫之謀可

廣南東路轉運使鄒覃男之才可試祕書省校書郎制

敕具官鄒覃男之才乃父彘服詔恩遠督方漕頻海之部踰嶺實勤且援比以上書願因勞而任子眷言遐役宜允所陳俾試讎書之榮無忘延世之獎可

廣南西路轉運使尙書都官員外郎韓琚男景修可試祕書省校書郎制

敕具官韓瑒男景修。以乃父進服朝恩。遠將使漕。眷言踰嶺之部。方責乘輅之勤。受節云初。需頭有請。固宜延賞。參勵教忠。特試讎書之榮。且盡任子之典。可。

尙書比部員外郎知澤州孫昌。可尙書駕部員外郎國子博士通判鄧州呂務簡。可尙書水部員外郎制。

敕具官孫昌等。昔漢明帝有言。郎官應列宿。宰百里。非其人。則民受其害。況攝郡檠。倅藩條者乎。惟爾等或通經而才。或藉蔭而仕。並絜矩從致。濯纓登朝。而方出廳高平。關掌宛下。新績舊課。通質歲成。宜進諸曹之聯。且光所部之寄。欽服並命。毋替寵階。可。

尙書屯田員外郎黃汴。河催綱劉立言。前通判台州閩鼎。可尙書都官員外郎制。

敕具官劉立言等。懷文飾吏。選俊爲郎。或護漕河渠。或贊條符竹。並階前績。通續今勞。宜循滿歲之格。進貳中都之秩。兼仍事守。以結最凡。可。

尙書比部員外郎通判嘉州郭宗禮。可尙書駕部員外郎尙書虞部員外郎通判祁州成壁。可尙書比部員外郎國子博士知貝州歷亭縣成道。升可尙書虞部員外郎制。

敕具官郭宗禮等。尙書郎有掌輿駕鈎簿。領典虞衡之職。皆曹劇任要。列于天臺。時惟寵名。以待功次。爾等通經筮仕。從政累勞。六計本乎至廉。一心蹈于無懈。或關決州務。或仍宰縣封。歲月有成。凡最來上。遞進某等。咸協乃庸。無渝素誠。忝我休命。可。

尙書虞部員外郎知金州師仲說可比部員外郎太常博士知貴州陳堅可尙書屯田員外郎制

敕具官師仲說等。夫稽歲質成。世有曩法。故虞陟明。宣責實。皆是物也。爾等或食德之裔。或修辭之良。頗濟吏文。實我朝紱。並緣靡盬之效。出副惟良之求。雖姚墟舊藩。略越遐境。成績未報。前課可甄。比勾劇曹。頓升華序。各膺郎位之選。尙結州麾之最。可。

尙書虞部員外郎張楷可尙書比部員外郎制

敕具官張楷。久服師規。序參郎選。嘗奉行于寬詔。俾攝守于名城。屬此還臺。適當會課。酬其歲滿。寵以階升。往踐勾書之曹。彌遵絜矩之訓。可。

尙書虞部員外郎梁餘慶可尙書比部員外郎制

敕具官梁餘慶。學古而官。累勞以日。洊階最目。序充郎位。比關隴倅事。條教有倫。逮茲還臺。適遇稽伐。宜承比勾之務。且寵年庸之勤。勉服稍遷。以格來舉。可。

太常博士施昌言可尙書屯田員外郎制

敕具官施昌言。識理淹深。風華秀舉。曩由高第。仍佐外藩。政洊考于歲成。學不忘于時敏。迺者嘗俞奏牘。命試禁林。逮給札以來。目成篇而喜。嘉其進業。寵以爲郎。勉蹈儒猷。允光朝序。可。

太常博士劉適可尙書屯田員外郎制

敕具官劉適。辭誠並修。器幹兼裕。早中科等。遂服政經。刃解煩而有餘。文飾吏而毋害。自引籍朝著。結綬

縣章官靡曠離。歲亦淹久。嘉其奏課。寵以爲郎。宜踐田曹之華。且光磐羽之漸。可。

太常博士前知夔州巫山縣魏平仲可尙書屯田員外郎制

敕具官魏平仲。器韻清舉。才謀簡濟。早有休問。齒于英游。自解巾昌辰。束帶榮序。文飾吏而毋害。績當官而可底。三歲會課。我朝彝章。矧更縣道之勤。宜副田曹之務。益服賢志。用光郎選。可。

太常博士牛圭可尙書屯田員外郎制

敕具官牛圭。曩修辭誠。洊効官職。比階司苑之籍。出尹象雷之封。間被臺符。移贊州事。緬是封略。雜于民夷。治無殿科。歲有遷格。宜因覈課之審。卽寵爲郎之拜。尙仍所位。勉集後勞。可。

尙書祠部員外郎崇文院檢討天章閣侍講王宗道可尙書度支員外郎制

敕具官王宗道。被服儒猷。祇勤官次。早用士林之選。首從王邸之招。員在胄庠。職兼書館。多歷年籥。進備朝簪。屬開講道之筵。俾預敷經之列。彙緣內閣。參訂露門。帖以寵名。志在榮遇。而宗英刻奏。學肆敍勞。且冀稍遷。重違所請。宜改承于郎務。益詳究于典言。勗爾清修。對我甄獎。可。

前權相州觀察支使郗慕清可檢校尙書水部員外郎制

敕具官郗慕清。國家竣事東耕。均禱庶品。官無內外。賞有彝常。以爾從辟廉車。累勞仕籍。方茲展體。慶乃丁辰。宜視秩于郎曹。用圖勤于幕畫。可。

授柴宗慶開府儀同三司依前檢校太師同中書門下平章事武成軍節度使駙馬都尉加食邑實

封制

門下。朕丕承先謨。恭恤明祀。獲執牲幣。祇見神祇。適當拜胙之成。思均與物之況。矧余右戚。參視貴臺。久擁旌旄之雄。時勤屏翰之績。不有異數。疇聳庶邦。具官柴宗慶。淳固蹈常。柔嘉廣業。地承代閭之舊。才對肅雍之華。能興乃宗。遂膺斯仕。以藩侯而奉朝請。多歷歲時。因元帥以敦詩書。自恬風素。逮兼槐席之重。出臨棠舍之封。允迪惠和。且宣條教。屬禮嚴之誕布。率貢品以惟寅。身雖守藩。志則存闕。忠劬並劬。戩祿爾宜。是用冠文階之崇。優食采之典。茂厥真賦。濟于壯猷。於戲。天秩之隆。非式禮而奚敘。公餼之荷。惟持滿而克安。益服令圖。往卽榮次。授受之戒。可不勉歟。可。

授陳堯佐光祿大夫依前檢校太傅同中書門下平章事淮康軍節度使加食邑實封制

門下。薦誠類帝。所以格三靈之和。均禱拜胙。所以優四海之澤。倚吾舊老之雋。方制中權之雄。兼榮鉉臺。參殿寰服。禮成第賞。朝論攸歸。具官陳堯佐。志意沖夷。風槩高劬。抗心希古。學有本原。展體首公。政多緣飾。逮事列聖。目爲名臣。寢階謨猷。遂翊機柄。洎入正于槐路。實增煥于袞章。雖內解政樞。寵頒齋鉞。仍宰庭視品之峻。冠友邦維翰之良。賢勞並均。體貌無改。升禋已事。布號崇朝。宜增命數之繁。且昭貺施之普。崇階馭貴。多邑衍封。益以實租。會爲異渥。於戲。天錫之祉。余弗敢專。師僉之諧。疇可虛授。往虔誕告之寵。益契同寅之懷。矧在蒼明。無假多論。可。

授鄭守忠光祿大夫依前檢校戶部尙書寧遠軍節度使殿前副都指揮使加食邑實封制

門下王者受釐于天。理弗專饗。疏爵于位。勸必有功。粵惟將臣。翊我齋輅。勞施伊始。均福攸同。聿圖剛辰。參布明命。具官鄭守忠。性尚淵濟。才質颯果。感會亨旦。策發壯猷。多通兵技之學。早著和門之業。游書勳籍。久服禁屯。或訓練徒兵。或董齊越騎。進階征鉞之重。遂司交戟之嚴。夙夜靡渝。親寄無貳。屬圖郊類。躬展國容。實提北落之師。來備甘泉之仗。導迎街蹕。循徼巖廬。大禮克成。寢威有助。宜酬從祀之恪。允昭進律之文。特峻貴階。載陪多邑。仍真幹食。僉允朝言。於戲善保者位高而安。能力者道遠而勵。曾是異數。孚于厥勞。往哉汝諧。毋替終譽。可。

授楊崇勳開府儀同三司依前檢校太尉河陽三城節度使加食邑實封制

門下。朕奉事天明。肅祗郊配。內則公卿顯相。率禮不愆。外則岳牧協恭。以職來助。馨德昭鬯。鴻釐普臻。爰洽揚庭之恩。用褒維屏之寄。具官楊崇勳。精忠以力。沈毅而和。早會聖期。號爲慎將。休有成績。播于公言。寢酬武幹之庸。正司機務之柄。告猷克壯。廣業彌勤。逮倚陪京之藩。洊易均賢之地。而能恪守侯度。允藝貢常。交撫大邦之人。并蒙中甸之福。屬茲第賞。協乃懋功。是用訂公府之儀。增采地之數。仍因真食。俾衍故封。朝謀僉承。獎策參備。於戲。惟帝錫祉。有格來之藩。惟辟申恩。有厚往之報。宜循進等之授。益寵于宣之良。往對光亨。無煩訓諭。可。

授荆王依前守太師尚書令兼中書令行荊州揚州牧荆南淮南節度大使加食邑實封功臣制

門下。協邦惇族。義炳唐篇。受賑展親。道光姬室。矧宗盟莫二之地。羣辟相維之尊。屬舉鴻儀。載均順福。襲

外事用剛之吉。稽異姓爲後之常。特推茂恩。告于有位。推誠保順。同德協恭。贊治崇仁。亮節守正。佐運翊戴功臣。荆南淮南節度大使。管內觀察處置等使。開府儀同三司。守太師尚書令。兼中書令。行荊州揚州牧。上柱國。荆王。食邑二萬五千戶。食實封一萬一千二百戶。賜入朝不趨。劍履上殿。詔書不名。元儼。器範凝邈。志懷淳暢。連輝皇緒。有德懿藩。早膺無戲之封。日爲最樂之善。茂分寶王。參擁麾旄。官序百僚之師。爵窮五等之貴。雖洊加殊禮。獨冠寵名。而居盈益。冲秉節彌亮。率我宗裔。保于燕謀。陽郊受釐。端闕敷號。眷言信厚之長。宜廣陪敦之恩。是用卽褒功之華。增異數之稱。衍采地于多邑。優幹食于眞封。克綏壯猷。度越常檢。於戲立愛。惟始庸樹庇根之強。涵澤旣優。滋同拜胙之貺。國論惟允。家情亦隆。欽懷永圖。以屏王室。可授依前守太師尚書令。兼中書令。行荊州揚州牧。充荆南淮南節度大使。管內觀察處置等使。荆王。賜入朝不趨。劍履上殿。詔書不名。加食邑一千戶。食實封六百戶。仍賜推誠保順同德協恭宣忠贊治崇仁亮節守正佐運翊戴功臣。散官勳如故。主者施行。

京東路轉運使尚書刑部員外郎直史館韓瀆。可尚書兵部員外郎尚書屯田員外郎通判池州周咸。可尚書都官員外郎國子博士知越州餘姚縣劉緯。可尚書水部員外郎制。

敕具官韓瀆等。或茂材爲郎。或華陰通籍。瀆以帖職史館。咸以累課吏資。有倅州之敏。緯則積階胄席。假領縣章。以年以勞。並允遷秩。今按中兵都隸及司川之職。皆右劇也。宜卽授而寵之。勉圖後庸。無廢余典。可。

保慶皇太后叔母蓋氏追封榮國太夫人制

敕。朕稽若邦猷。輯和孝治。因先朝淑德之輔。正永樂徽名之尊。禮既具揚。恩亦惟厚。追賚外戚。率緣慈懷。保慶太后叔母。追封榮國太夫人。蓋氏世德蘊靈。女師蹈訓。協濟中範。作合令人。盡潔志于祭絜。流順教于家闈。雖景命近止。而慶祚有開。敝親中闈。實曰諸母。絜盛儀之允備。宜先澤以載。絜俾易舊封。且光大國。鈿釵增數。湯沐衍封。告于九京。尙或歆寵。可。

皇叔荆王亡妻張氏可追封魏國夫人制

敕。夫德高內助。則維巢之詠興。命或弗永。則飾壤之恩篤。矧惟近屬。倏構冥災。懿範未淪。徽章有典。具官荆王亡妻晉國夫人張氏。華基茂緒。淑操芳猷。動合珩璜之音。居遵圖史之誠。早膺盛禮。作配英藩。躬婦順而弗渝。佐宗事而尤恪。游疏大國。參緹寵儀。方憑無遂之賢。永贊維寧之盛。何圖奄忽。遽隔幽明。生而有涯。心焉增悼。宜正名于寶魏。且紆痛于幽泉。密印鈿函。尙茲歆服。可。

齊國夫人許氏進封晉國夫人制

敕。竭誠均愛。久則彌彰。毅德推恩。厚而無斃。齊國夫人許氏。性鍾淑詰。行服閒和。早祇事于掖庭。首效勤于甲觀。克圖善育。本出至慈。忠存襁褓之辰。譽訂山河之懿。鼎雖游疏湯邑。增衍國田。酬推燥之夙功。美居謙之令躅。質于舊典。猶缺美名。宜追保佑之力。更益褒華之稱。茲爲異數。無替沖猷。可。

故宮正紀國夫人郭氏追封尙宮制

敕宮正紀國夫人郭氏。早鍾柔操。參備後庭。善服矩儀。多歷時序。寢服宮闈之秩。游疏湯沐之封。式寵懿猷。遽淪徂景。華聯有等。遺範可懷。特舉褒優。尙慰冥漠。

典簿張氏進封宮正。勾當大內公事。掌絲李氏進封典言。同知尙書省事。御侍永樂縣君武氏進封

典寶。落御侍。長安縣君王氏進封掌寶。落御侍制。

敕典簿張氏等。婉孌自修。禁嚴被選。早奉宮掖之列。屢更歲籥之華。宜緣久勞。稍遷祕掌。益圖恭靖。以對褒榮。

掌醞許氏進封司記。聽宣許氏進封典言制。

敕掌醞許氏等。性服恭柔。地承嚴禁。克祇乃事。無懈攸箴。宜酬宮巷之勞。進掌掖庭之局。益思勤勉。用對寵嘉。

帥臣鄭守忠高化石元孫追封母制。

敕乃者。祇祓陽郊。別獻坤廟。內循明發之感。均愴靡依之懷。矧余帥臣。追悼慈育。宜錫榮號。以寵孝思。具官姓某。亡母累贈某郡太君某氏。躬稟柔嫺。踐循法度。早奉金夫之懿。實生雲將之賢。志達五經。任隆三衛。慨鼎茵之弗逮。追湯沐以游加。及是展儀。允當均福。進啓郡田之數。再紆子舍之哀。緝禮榷章。參詔冥漠。

御史中丞杜衍亡母追封京兆郡太君制。

敕。郊之報也。均福以惠下。推恩以篤親。本孝慈之所從。罄幽顯而率洽。曰子端士。參總憲綱。緬懷劬勞。增厚褒恤。以爾具官杜衍亡母。廣陵郡太君盛氏。柔嫻其德。溫靚其容。毓慶清修之門。來嬪良奧之室。勤助賓祭。輯和宗姻。婉訓有基。令子是似。漸徙宅之教。卒成善名。副專席之求。游咨直質。疊緣顧復之義。屢延封賞之科。及今相儀。當用申獎。繇淮海之奧。徙咸鎬之都。寶鈿芝函。往告幽窆。可。

入內侍省押班岑守素母進封郡太君制

敕。具官岑守素母。河南縣太君梁氏。肇毓慶宗。有行茂族。早助金夫之懿。入參貂省之華。載服閨風。遂流家檢。實鍾令嗣。列我信臣。能豐祿以逮親。屢賜田而啓邑。且陳奏牘。罄序孝心。願從禰室之榮。冀益封君之數。嘉其誠懇。進厥等威。疏郡寵名。循陔美志。勉膺優渥。永渙徽柔。可。

文思使知府州折繼宣母進封郡太君制

敕。具官折繼宣母。信都縣君劉氏。稟和慶族。作儷勳門。曩勸義于金夫。甫疏榮于石窹。實生令嗣。克襲先封。道茂壺儀。訓覃忠教。方劬綏邊之績。更張及養之勤。瑞福溥均。劬勞有請。宜因本郡。超正寵名。且慰高堂之歡。用光象服之等。可。

兩省妻封縣君制

敕。朕乃者升禋紫宮。麗澤南闕。因考庸懋賞之典。廣視品從夫之封。寵于朝倫。寔有恩限。以爾具官某妻某氏。慶靈辨族。閒婉飭躬。資于多儀。儷乃良士。蹈無攸之戒。既式爾宗。助有爲之賢。方幹余疊。均膺在且。

疏邑開榮。姑命澤田之羞。且光象服之數。可。

朝臣妻封縣君制

敕國家禮成陽郊。賞均大令。蓋由通籍而上。更延及室之恩。所以獎首公褒內助也。以爾具官某妻某氏。高華辨族。幽閒賦質。允服盛禮。來嬪令人。序陟廣朝之聯。勤經敏政之業。迹其輔佐。宜乃寵嘉。俾開湯沐之封。且光簪鈿之等。可。

帥臣鄭守忠高化石元孫妻進封郡君制

敕朕屬者謹郊報之常。稽禮文之變。茂對三后。平施萬邦。既旻臣工之勞。復延伉儷之寵。所以貴從夫而恩及室也。具官某妻某郡君某氏。慶靈辨族。閒婉飭躬。資于多儀。式是良匹。蹈無攸之戒。既克家肥。助有爲之賢。實參戎重。均禱在且。增邑有常。宜易郡田之封。益光宗事之懿。可。

御侍苗氏進封郡君依前御侍制

敕御侍苗氏。早以良家。入充近掖。能蹈邕柔之範。亟參進對之華。備位小星。方隆淑問。啓封大邑。宜寵徽恩。往膺湯沐之榮。益劭宮闈之訓。可。

入內都知王惟忠亡妻范氏追封郡君制

敕具官某妻高平縣君范氏。憑後慶宗。蹈和柔訓。夙奉有行之禮。載稱無遂之賢。輔乃金夫。列我貂省。嚮酬勞于侍幄。亟延寵于封君。懿範式彰。冥災奄及。眷邇臣之悼往。宜卹禮之有加。郡壤升名。泉塗滲澤。厥

章渥數。尙慰幽魂。可。

參政樞密母追封郡夫人制

敕。朕乃者。祇被陽郊。別獻坤廟。雖陟配有。序而明發。載懷內忖。孝心之虔。實均子道之感。爰因贊福。咸及顯親。以爾具官某母某郡夫人某氏。性本柔明。行兼法度。始循婦德。終繼壺慈。擁育邇臣。踐揚臚仕。寢逮累茵之貴。已隔安輿之歡。永慕所鍾。賁章前渥。訖茲大賚。允若重封。并賦賁于泉路。慰乃棘心。可。

參知政事宋綬外祖母追封郡夫人制

敕。夫尊賢于朝。則儀品偕重。延賞于室。則封號並隆。旣穆人倫之端。兼懷逝者之作。所以篤家情而渥王澤也。故具官王徽之妻。故太原郡君王氏女德純茂。世靈華衍。早遵良匹。協樹善猷。繫天昌之能賢。遵皇揆而稱首。實荷先顧。光服近僚。惟時賜田。已被柔壺。永從如日之誓。終乏克家之孤。移祉外孫。參我良弼。具上前烈。深軫朕衷。方襲庸于舊臣。宜均寵于齊體。且因本郡。特正順名。厥章鈿函。往賁幽窆。可。

元憲集卷二十七

內制

中書試戒風俗奢靡詔

聞夫古先哲王之御俗也。皆上求天心。下建民極。天道貴實。故敦本以體元。民情易流。必閑邪而制法。然後能趨富壽之域。開衣食之源。至蘇來臻。大命無泛。國家荷三聖之業。保萬方之大。容典飭盡。訓戒諄勤。然而世道久夷。人心多靡。近聞中外。頗僭典常。自通邑名都。世家豪姓。競作浮侈。迭相矜尚。珠玉被于服玩。緹繡哀於坦牆。雕幾歲更。規矩時易。醬菹庖味。山藻室廬。靡嗟民力之勤。罔憚邦儀之禁。此而是縱。孰不可容。況曩者神宗親駕農祠。示稼穡之重。真廟深惜上幣。嚴銷塗之律。朕皆祇紹祖武。奉行前猷。惟爾庶邦。敢忘茂訓。自時以往。咸俾改爲儻。輕蹈於匪彝。當一施于重罰。布告遐邇。知朕意焉。

敕州郡勸農詔

昔者堯湯之災。而民不病。知備故也。禹稷之盛。而身服勞。知本故也。惟本與備。一出于農。哲王盡心。義在于此。矧去聖愈邈。務本日衰。非告以話言。納之善道。則懼夫懈怠之俗。相靡而弗還。富壽之期。因循而莫復。朕所以躬紹祖武。親禮農祠。御千畝之場。越三推之數。因以申勞狎野。優復力田。招來太和。茂育羣品。則號公諫宣之旨。賈誼勸文之戒。朕雖不德。庶或無慙。而今春以來。善氣猶鬱。蝗羽爲孽。雨足屯膏。南自

淮楚而接之江。東綿齊魯。而著之海。野乏青草。家無見糧。丁壯輕去于里廬。細弱相捐于溝壑。曾未周歲。奄及大饑。至於邦縣之間。率寡京坻之蓄。教不先具。民亦何辜。庸非貪吏以培克而奪其財。苛人以趨辦而窮其力。淫巧游惰者失其禁。逮訊證捕者妨其時。使吾赤子陷於饑寒。嘉歲變于禮書。興言及此。朕甚痛之。況視民之勤。禮存彝訓。墾田罔實。漢有明誅。自今以還。其申勅詔條。切督州郡。凡令之出。以農爲先。謹視土膏之宜。明宣稼政之目。諭以國家寶穀重食。尊本鎮浮。庶幾流亡有所底止。敢或弛厥穡事。重爲民殃。當一寘于重科。俾大變于衰俗。布告天下。知朕意焉。

舉遺逸詔

王者稽若大猷。總制羣品。曷常不求輔于有衆。收績于無爲。張軒冕之華。以來世彥。厚丘園之禮。以聘道真。然後教化尊于朝。風俗清于野。琮璜入于東序。鸞鷲集乎西廡。天無曠工。祿必配德。自淳政不競。茲舉寢衰。招延者罔汰于濫竽。苟冒者希聲于畫餅。使賢人志士。穢世嫉邪。蓄高韻于無聲。韜奇文而滅彩。築巖釣渭。無復嗣音。加璧裏輪。遂成絕典。寧所繇之殊路。將可復而在人。朕荷祖宗之靈。託元元之上。永惟大本。非賢罔濟。比詔執事。博訪異人。鶩精鳴鶴之臯。馳心白駒之谷。歷祀綿久。希風寂寥。將朝廷禮意之未臻。有司物色而乖當。何區域之大。而賢才之寡歟。抑又聞之。蘭菊高芬。多挺生于幽藪。隋和善價。不自納于賈區。緬惟高尚之蹤。固非科級之致。宣令郡邑。深體眷勤。其或求志于里閭。抗情于丘壑。樂篆素以希古。葆孝悌而道榮。有一于茲。且以名上。朕將敕公車之府。備鵠版之書。虛心望風。待以不次。庶幾皇士。

同獎大寧傳不云乎。舉逸民天下之民歸心焉。咨爾羣倫。毋忽余意。

賜南京胥司文武百官尚書吏部侍郎知應天府韓億等賀南郊禮畢及上尊號受冊詔
欽崇報本。禮重邦經。刻玉崇號。義緣人欲。內循寡德。忝舉鴻儀。膺福享名。心焉增愧。卿近由丞弼。方委保釐。率屬罄恭。露章馳賀。味其辭旨。忠恪兼勤。欣歎之懷。寤寐無舍。

賜西京胥司文武百官資政殿學士尚書吏部侍郎知河南府范雍等賀南郊禮畢詔

長景涓辰。高禋措事。獲膺純嘏。還霈茂恩。三靈交歡。咸與欣會。卿屬司胥。鑰度戒乃僚。便道奉章。旅辭致慶。情文參允。將順並照。申闕于茲。歎矚何已。

寶元元年南郊御札勅內外文武臣僚等

夫一陽大報。方冊彝規。三歲親郊。祖宗盛則。朕猥以涼菲。獲承基緒。祇率丕訓。茂昭前人。兢兢業業。罔或寧暇。賴上穹鑒祐。列聖保綏。方隅晏然。氣物時若。民微艱食之阻。邦輯阜財之經。嗣洽太和。莫非靈貺。雖復犧幣有品。粢芼載燭。申勅祠官。謹修歲事。然齋輅停軫。欽柴輟熏。弗躬于行。撫己成闕。祭疎則怠。心焉增惕。矧紫營在望。奚敢憚勤。黃流並禱。庶幾能饗。爰諏景至之吉。恭迓帝臨之休。慎舉鴻儀。式先誕告。朕以今年十一月十八日。有事于南郊。咨爾攸司。各揚乃職。凡所以供調。毋黷典常。應諸道州府。不得以進奉爲名。別行科斂。裕神約禮。稱朕意焉。故茲札示。想宜知悉。

賜參知政事程琳生日生餼詔

任參丞弼。業總謨明。出入再期。周旋一德。嘉聞誕日。宴啓世祥。毗倚甫隆。寵頒惟舊。餼醪具品。醴粢兼儲。住資合族之歡。姑慶生賢之會。所宜欽荷。以對同寅。

賜參知政事王讓生日詔

志局堅明。材猷肅給。勳筦斗樞之重。移參鼎餗之和。碩畫所經。大倫並輯。眷言異稟。實紀初辰。嘉賢運之有開。宜恩頒之載渥。樽醪且旨。庖犧具將。用昭禮食之華。姑集家庭之慶。體余注賴。往洽燕私。

賜知樞密院夏守贊生日生餼詔

盟府舊勳。樞庭新望。告猷伊始。備賜惟常。矧秋籥之孟辰。紀慶弧之善旦。特推蕃錫。且志同寅。往洽宴私。諒欽眷待。

賜知樞密院盛度生日生餼詔

寵分齋鉞。職筦朝樞。動成密勿之猷。居然俊乂之老。生賢肯會。紀旦有初。方寄同寅。固存異數。牽醪朕旨。醴粢精良。併資宴豆之華。且慶門弧之吉。允宜欽荷。用對眷懷。

賜知樞密院王德用生日生餼詔

識洞武經。世資忠槩。能荷旗常之伐。進參帷幄之謀。造膝有猷。慎辭無玷。勳茂疇于久職。凡再易于中權。命數益隆。志懷彌劭。眷言異稟。實紀初辰。朝有慶儀。禮兼飫賜。稻糴鑿品。醪餼叢滋。俾均合族之歡。用志生賢之會。所宜欽受。且表眷勤。

賜同知樞密院陳執中生日生餽詔

茂承世範。參筦朝樞。年序未淹。風猷載洽。眷言異稟。式紀初辰。宜昭侍幄之華。追慶射蓬之會。芳樽和旨。庖具珍盈。姑示眷慈。往欽蕃錫。負荷世猷。彌綸機政。迹乃生賢之運。協余同德之休。適及誕辰。乞昭慶物。樽華芳旨。庖齋珍腴。往申宴豆之歡。且志門弧之吉。體茲眷獎。用克欽承。

賜宰臣張士遜生日生餽詔

弼直宏才。謨明舊老。允服賚予之命。實基生甫之祥。曾是季秋。挺茲慶日。拜儀有典。賜品惟優。宜因宴具之豐。尙續壽祺之永。往欽異數。用表同寅。

賜武成軍節度使同中書門下平章事駙馬都尉柴宗慶進謝賜生日禮物馬詔

卿嫻近之華。藩宣有寄。曷屬始生之旦。用申蕃錫之恩。仍俾乃宗。具將予好。寵賢惟舊。疏懇載勤。仍效右牽之良。參扞中藏之感。虔劬適禮。愧尙交懷。

賜鎮海軍節度使新授知樞密院夏守贊赴闕沿路茶藥詔

卿甫膺節召。八總機繁。念稱媿以戒塗。屬炎歊而在候。方滋渴疴。宜謹綏調。特命輕軒。往頒茗劑。所宜欽受。姑表眷懷。

賜契丹賀正旦使蕭傅到貝州茶藥詔

卿奉將隣幣。來慶王正。肅邦禮以惟虔。驚使程而匪懈。眷言次舍。式戾方州。不無鞅掌之勤。宜有綏調之助。特推優錫。用集至和。諒卽欽承。且昭恩賚。

賜契丹賀正旦副使韓志德到貝州茶藥詔

卿遠服使聯。參修聘範。款邊關而邁往。冒歲律之淒凝。緬是勤斯。軫于勞止。雜頒靈品。助擁時休。宜體眷懷。卽當祇荷。

賜契丹國信使茶藥詔

肅持命節。祇達朝言。冒暑于行。念勞云久。夙宵良苦。調衛宜先。特申藥茗之頒。參資湯液之品。祛煩蠲疾。尙諒眷懷。

賜淮康軍節度使同中書門下平章事陳堯佐加恩誥敕詔

卿儒苑上才。槐階舊老。茂分旒節。陪我寔畿。屬郊事之方竣。冀靈休之普洽。持數明命。參寵元侯。具刻贊章。往榮藩屏。仍俾家庭之嗣。奉將詔版之嚴。萃厥恩私。所宜祇荷。

賜尙書工部郎中天章閣待制知同州司馬池爲澄城縣百姓黨岫持刀刺殺親叔依條斬訖待罪特放詔

漢輔要邦。秦餘舊俗。化條所被。恩種宜悛。何茲悖德之氓。靡率懷音之教。毒加親序。汙我人倫。卿適莅郡。封載欽官獄。恥聞凶類。尋正嚴誅。閉關示愆。露章引劾。願任吏師之責。益彰臣禮之恭。觀過有來。省躬奚

咎。勉興善政。以牧吾民。

賜資政殿大學士尚書左僕射判鄆州王曾乞南郊陪位不允詔

卿儒苑上才。公槐雋老。冠名祕殿。均逸東藩。雖挹道均沖。而協恭無懈。屬升禋之誕告。遽刻牘以斯聞。願肅朝饗。旅陪祠鬯。然坐堂之政。甫慰氓謠。擁傳之勤。重煩耆德。宜輟甘泉之從。姑紹潁川之良。其在傾輸。徒增歎囑。

賜鎮海軍節度使知澶州夏守贊乞南郊陪位不允詔

卿以擁節之嚴。守夾河之重。茂宜民政。總訓師和。有鄰疆餒勞之煩。有隄事繕完之備。實惟勳舊。鎮乃要衝。會郊報之在辰。覽郵封而慳懇。願陪盛薦。深體忠懷。然職在刺條。地陪寰服。宜切圭符之寄。用紓朝宿之勤。其在歎嘉。靡忘鑒寐。

賜武成軍節度使同中書門下平章事駙馬都尉柴宗慶乞朝覲上壽不允詔

卿皇室近嫺。重侯茂閣。早持帥節。兼視臺華。擇分陝之名區。寄屏周之良翰。會余慶節。遽刻奏封。願飭介圭之朝。因陪壽罍之獻。誠雖輸嚮。禮實重煩。況任貢已列于前。撫封方倚于外。宜綏闔政。昭副朕懷。眷是寅恭。靡忘嘉歎。

賜刑部尚書知徐州李迪乞赴闕上壽不允詔

勅李迪。省所上表。乞暫赴闕。隨班上壽事。具悉。卿久服蓋臣。洵持魁柄。曷當周衰之重。移殿徐邦之雄。克

布惠和以式方面。雖甘棠流詠于陝服。靈河蒙福于漢京。樹善相均。配古無愧。屬余誕節。時閱奏封。願集奉觴之辰。且紓戀闕之志。然倚矚舊老。倡率守麾。風化所期。內外惟一。無煩趨覲。姑穆翰垣。恭愛之誠。歎賞徒切。所請宜不允。故茲詔示。想宜知悉。夏熱卿比安好。遣書指不多及。

賜護國軍節度使兼侍中張蒼乞朝覲上壽不允詔

卿倡牧元侯。登樞舊德。繼開大府。實冠友邦。屬我誕辰。願陪慶會。雖奉觴攸好。而趨節爲勞。姑穆翰垣。式符眷賴。輸誠循禮。徒用歎嘉。

賜河陽三城節度使楊崇勳爲移知陳州乞朝覲不允詔

卿早秉戎旄。屢綏藩政。民謠載路。歲筦亟淹。彙因苑道之夷。後徙淮陽之守。隱然屏翰。陪余京師。遽閱囊封。願先載覲。眷心存之。雖切。願外倚之。有初。無煩造朝。且重分闕。

賜西平王趙元昊詔

朕奉承端命。撫有萬方。上席祖宗之謀。靡佳兵革之舉。專任德教。以統華夷。推心信人。自謂無負。卿世懷恭順。名冠翰垣。嗣享王封。守我西土。朕不矜官爵之貴。不吝祿秩之優。任倚中權。寵均同姓。關市交易。行李無猜。貢獻頒分。道路相屬。則朕之恩信。卿之款誠。稽于大倫。誰得爲聞。今乃遽形表疏。輕述僭差。且將徇過分之謀。舉非常之號。冒陳世系。輒改歲元。省闕再三。嗟惋何已。寧朕之寡德。不足以懷來。將卿之失圖。自成于迷妄。事無萌隙。何及于茲。況自乃父以來。盟書可復。今略陳大要。以曉爾心。且卿父誓表其略。

云。臣立誓之後。若負恩背義。百神怒誅。上天震伐。使其殃禍。仍及子孫。此表見存藏之故。府卿之先父。卒保斯言。故能高朗令終。功業相襲。福之所庇。理則宜然。今卿忽此背馳。了無所據。壤爾考之約。孤本朝之恩。忠者兩虧。今古爲恨。揆之王法。所不忍聞。自卿表之來。內外咸憤。然朕獨排羣議。深惜舊勳。恐卿惑左右一時之辭。非英傑本懷之欲。人誰無過。事猶可追。倘能去尉佗越帝之名。復吳芮漢庭之令。洗心嚮善。改往懷昔。則朕之待卿。曠然如舊。永紹世祿。長爲國藩。變通之機。不踈終日。去就大分。其審處之。所進鞍馬駱駝。並卻付來人牽回。爾其戒已往之愆。復將來之善。則永世無窮矣。故茲詔示。想宜知悉。

賜西平王趙元昊爲賜差來人見辭例物詔

卿志凝忠概。世纘武勳。保障有勞。恭亮彌馨。比余誕日。首率貢儀。差駿產以斯材。旅慶琛而有煥。仍嘉親校。能恪朝規。既閱右牽之良。特渥匪頒之數。且昭恩賚。并寵藩維。永念傾虔。尤增歎尙。

賜振武軍節度使知延州范雍充鄜延環慶兩路沿邊經略安撫使詔

卿幹棟名材。籌帷舊望。自付擁旄之任。卽臨乘障之衝。叢爾狡羌。忘我前施。陰連種部。規擾塞垣。雖購募有科。而威防難廢。再念誥勞控遏之會。安化經營之方。節度素分。綏懷莫一。斷于朕志。台乃使名。按瑣序勞。繫卿爲重。已申朝命。馳錫詔書。俾蚊蚋暴集之辰。有兔犬指縱之地。宜欽異數。益講武韜。內安屬國之民。外殄反常之犯。稱余遠略。遲乃茂勳。

賜奉寧軍節度使就差知涇州夏竦充涇原秦鳳兩路沿邊經略安撫使詔

卿望映民宗。謀參王體。頃從樞幄之舊。移陟師壇之崇。出鎮三秦。並護諸將。而叛羌各種。狡穴野心。竊號背恩。游魂伺隙。比雖申嚴邊鎖。換補將屯。然自平涼以東。隴道交屬。建防制要。當在臨涇。慮烽燧之警秋。或狂狡之送死。必先威禦。以便指縱。余心念焉。無易卿者。已頒成命。卽俾改轅。特新使號之華。再襲戎鈐之重。仍令兩道。同稟善經。綏御所資。等威皆絕。宜欽慎選。毋或憚行。勉壯厥猷。用恢西略。

賜置勒斯賚詔

近者夏州僭逆元昊。孤背朝恩。竊爲僭制。已詔有司。應元昊在身官爵。及所賜舊姓。並令除削。訖卿性資忠勇。世嫉仇讎。得此布聞。諒增同憤。然恐元昊恃其凶狡。妄肆侵凌。卿宜先事爲防。因機伺便。整揚勁騎。率勵衆心。或躡其空虛。出其不意。以時掩擊。殄滅醜徒。助天道之禍淫。成王威之禁暴。則崇名厚賞。非卿而誰。勉建殊勳。副余外禦。兼昨者里坡默里烏進奉到闕。言卿有男轄戩瑪克占覺二人。特以卿故。並授團練使。仍支請受。續據秦州奏。得卿文字。知轄戩等。各往宗噶爾城并蘭州住坐。兼言道不與元昊往來。如元昊入漢界。兄弟二人將兵殺截。此蓋卿從來一心向國。致轄戩等如此忠孝。況卿父子至親。義須和協。與卿同共。掩殺僭逆元昊。勿落元昊姦使。別致間諜誘引。

賜中書門下詔

昔苗民弗懷。首羅虞竄。邠支自立。終伏漢誅。蓋犯順者無赦于國章。除殘者罔限于夷服。炳焉通誼。疇或敢踰。趙元昊戎漠餘妖。邊關小種。性含虺毒。志負狼貪。昏頑表于稚年。傲悖成于壯齒。曩者德明卽世。西

控哀。驚朝廷錄守方之忠。憫稱嗣之禮。拔于童豎。付以節旄。名襲真王。寵視同姓。金絮有秩。絡繹以周。其窮關市弗譏。貿遷以通其貨。假我明命。取重諸羌。固宜竭犬馬之勤。効涓埃之報。克守先業。以稱大恩。而乃背惠反常。毀忠蔑孝。僭舉國號。扇惑蕃渠。跳梁井蛙之涯。旅拒秋螳之轍。公遣軍校。冒服使車。列牘自陳。歎天罔畏。旣彰逆節。合舉明刑。朕深憐舊勳。特加涵覆。橫遏羣議。密賜手書。貸其方命之愆。開以自新之路。護送來介。俾還穹居。庶遷善而革心。終特遠而迷復。至敢驅率醜隸。攘竊塞民。騰布文符。誘誑區落。而朝廷列奏。邊吏抗辭。願舉偏軍。往平狡穴。促梟稱亂之首。以正不庭之辜。朕再念一夫肆狂。餘衆何罪。況元昊脅從。濟欲濫殺。逞威名。會外奔。諸帳懷貳。苟戈鋌並縱。則玉石奚分。且俾列于購科。止用取其魁惡。其元昊在身官爵。並令削奪。仍令宗正寺除去屬籍。惟彼諸部。素奉本朝。迫此奸兇。遂成誑誤。倘能結黨歸義。執賊效功。必當昭洗前污。申明厚賞。國有信誓。煥如丹青。應賞募科格。並委中書門下詳爲條件。以時播告。俾體朕懷。

夫政平召祥。化缺生沴。推精盪禳。其猶影響。故王者遭異而思德。省己以及人。交修治綱。仰答靈譴。朕雖寡昧。敢忘斯舉。比者善氣弗效。陰眚屢臻。坤體震于冬藏。雷音發于春孟。邊關民舍。被害尤苦。是用臨朝。嗟惕。馳使撫綏。推咎以咨諫言。協恭而戒臺宰。冀獲愆謬。庸克振除。尙慮幅員之遐。不無官守之衆。其間或吏貪而弛。或教虐而苛。或狴牢有滋豐之煩。或賦徭有輸調之急。或受賕鬻直。使下情壅于上聞。或隱災逃負。使醜恩隔于周浹。或世償逋折。巧避赦原。或歲嬰呼擾。猥妨農作。一物失所。太利用虧。朕念共斯

責者。外則有使轂按巡之司。次則有藩條守長之任。率荷優寄。當體至懷。苟前弊之尙存。宜悉心而司革。庶迎美應。用洽重熙。凡厥具僚。無忽余誠。

夫至公之行。則淑慝咸辨。私議弗禁。則風俗易偷。朕躬攬權綱。茂綏政治。每觀邪正之辨。思寄誅賞之中。庶臻大猷。以止多辟。而士類至廣。材品或殊。久服涵養之仁。寢成黨與之弊。至乃挾朋相援。奸利自營。驅扇颺塵。混淆朱紫。託狂辭而市直。結陰好以濟仇。章交公車。聲布行路。使濟濟羣讓。有愧堯人之封。翕翕煩言。更興周雅之刺。永惟澆競。良用懲嗟。若夫委質事君。協恭宣力。思無出位。是曰守官。和異于同。固當擇善。況朝經式序。仕次有階。因行察言。緣名責實。苟存忠潔。自致顯榮。何必舍爾夷途。蹈于險轍。釣名汙行。觸禁投愆。宜內訟于乃心。毋亟傷于至化。尙安所習。國有嚴科。凡在搢紳。明體予意。

王者稽若大猷。總制九服。曷嘗不寄治于守宰。責效于監司。職焉相維。命乃無泛。朕奉承景業。流觀往辟。知仁壽之本。以政教爲先。故咨求羣材。綱紀衆務。察州有等。字邑有員。建漕部以謹民財。馳使詔以糾邦獄。委屬偕重。休戚與均。保乂之方。數路而已。固當上體勞疚。允迪惠和。使鰥寡無恫。怨訟咸息。沐浴至道。臻乎太寧。今則不然。吏文多端。而貪殘日滋。民生孔勤。而奉養多乏。愁歎未能盡訴。囹圄不以時虛。感動陰陽。延致災眚。朕雖引慝自咎。申誠博謀。眷爾多方之臣。得無曠位之責。自時厥後。宜惕攸箴。班條者企循良之風。擁節者勵澄清之志。刑罰則寧寬而無濫。徭役則量力而勿苛。任百里不可以自輕。效一官不可以懷苟。率我王度。以承天心。尙或勿虔。罔有攸赦。布告中外。知朕意焉。

賜外任臣僚進乾元節銀絹詔

孟序乘離。誕辰著令。爰率邦儀之舊。載均朝享之歡。卿恪奉彝章。遠祗慶集。聿馳任土。來侑稱觴。眷旅實之珍盈。驗祝延之悃愨。永言歎尚。無捨于懷。

賜外任臣僚進乾元節功德疏詔

慶序祝延。邦儀著令。卿發于忠愛。申以齋明。集方外之勝緣。歸我辰之茂嘏。仍因淨範。虔疏寶題。駢軸相輝。通郵來上。具體贊揚之盛。益昭輸戴之勤。省閱于茲。眷稱無斁。

賜振武軍節度使知延州范雍進謝賜牌印月俸公使錢到任馬詔

卿近擁軍旄。往司戎索。爰錫印符之重。兼資泉廩之豐。人爵所班。邦恩惟舊。遽披謝牘。仍效名駒。敷感載勤。靈誠彌愨。永言率禮。茲用欽懷。

賜奉寧軍節度使知永興軍夏竦進謝賜牌印月俸公使錢到任馬詔

卿乃者繇天臺之聯。膺戎閫之重。特頒節傳。詔刻印章。惟鍾官月廩之豐。逮侯邑餐錢之舊。並循邦令。參寵使權。署政有初。需頭來上。曲條謝禮。併效駿驅。永念忠懷。實深嘉歎。

賜外任臣僚進端午馬詔

朱夏適中。端辰協午。肇于嘉節。實紀慶儀。遽形輸貢之華。遠集效牽之駿。勤誠有底。累歎無忘。

賜諫議大夫張意進謝恩馬詔

卿久服吏資。近充諫列。侃然華皓。允矣甄升。閱感敍之盈章。復效牽而致禮。恭勤所集。歎尙兼懷。

賜諫議大夫俞獻卿進謝恩馬詔

卿頃緣最狀。序陟禁曹。方寄守麾。已躋陞謝。飾驂來效。禁禮載虔。益驗傾輸。良增嘉尙。

賜諫議大夫盛京進謝恩馬詔

卿績著藩條。望華朝禮。曩繇卿列。進序諫曹。霈澤有初。露章申感。仍效斯材之乘。允將由禮之恭。載閱勤誠。但增嘉歎。

賜外任使相節度使進乾元節馬詔

震誕之辰。允刊彝令。官司罄祝。申侑至虔。卿位服宗工。勳宣名翰。樂聞慶會。祇率邦儀。遠效舞驂之良。入飲充庭之品。愛心所底。貢禮斯華。言念傾輸。彌增眷矚。

賜彰信軍節度使同中書門下平章事王隨進謝到任馬詔

卿頃罷政機。近綏侯服。星言之部。時克偃藩。屬宣布之涓辰。序恩勤而累感。效茲阜駿。絢乃庭儀。言念寅恭。益深嘉矚。

賜護國軍節度使兼侍中張耆進謝孫男恩澤馬詔

近以均錫鴻禧。就蕃榮數。仍眷抱孫之愛。復推延世之恩。率是寵章。抑推彝制。遠陳函奏。兼效厥驂。感敍過周。歎嘉無斁。

賜淮康軍節度使同中書門下平章事陳堯佐進謝差男押賜加恩告敕生日禮物及孫男恩澤馬詔

懃以茂加勳策。追慶門弧。並因子舍之歸。卽寄使軺之寵。屬推世賞。施及孫謀。雖命數載蕃。而等威斯協。需頭來上。駿足效牽。過敍感惊。有昭邦禮。貢輸爲費。歎想交懷。

賜龍圖閣學士尙書工部侍郎知并州杜衍進謝恩馬詔

朕懃者親選舊勞。就嘉祕職。仍屬綏邊之重。且資訓俗之方。眷此序升。詎煩過謝。駿良來效。悃悃具將。永念忠勤。靡忘嘉矚。

元憲集卷二十八

內制

賜置勒斯賚男轄戩勒書

勅轄戩省秦鳳路部署司。奏據汝將到蕃字。譯作漢字。稱汝告秦州部署諸官員。自家要抵敵草寇。便各往宗噶爾城並蘭州住。蕃漢兩家往來。道不與草寇往來。如有草寇兵士入漢界來時。自家兄弟二人。將兵士殺伊草寇事。汝款塞輸誠。舉宗效順。奉宣王略。式遏邊虞。憤狡寇之陸梁。謀成師之犄角。忠懷壯節。朕甚嘉之。然汝兄弟既奉朝廷。即須父子和協。盡心孝順。和爲一家。使出兵之時。手足相應。同殺僭逆。元昊斯爲上計。勿聽姦人間牒。今賜某物。至可領也。故茲獎諭。想宜知悉。秋涼汝比好否。遣書指不及。

賜彰信軍三軍將吏僧道百姓等爲授王隨本軍節度使示諭勅書

朕以王隨時棟名材。公槐舊望。比付宰司之重。頗成歲績之勤。而屢控讓情。懇辭大任。重違謙慙。特峻等威。俾改陟于齋壇。且兼榮于鉉席。眷惟戎節。近制寰畿。陪余京師。式是侯服。雖未臨所治。而遐率懿綱。繫乃軍和之嚴。暨于州里之衆。遴茲賢帥。良愜爾瞻。固當善稟教條。仰承威惠。增崇藩屏。稱朕意焉。

賜定國軍三軍將吏僧道百姓等爲授王德用本軍節度使示諭勅書

夫擁旄授律。以獎戎昭。疏藩疇祉。以屏王室。諒非舊德。疇負寵名。朕以王德用。忠族世勳。壯猷亮節。早階

勇爵幹我近司。綢繆萬樞。陟恪三接。嘉其匪懈之力。易以中權之雄。宅是左馮。屏厥西夏。雖肇頒于新節。且留掌于煩機。眷乃翰垣。底茲威惠。所宜率籲衆志。欽服化條。同底大和。以奉賢帥。

賜交趾郡王李德政甘州可汗王伊嚕格勒雅蘇歷日勅書

朕祇仰乾經。順修時訓。每緣命朔。必謹頒常。卿詔服世勳。協寧邊略。屬歲元之更序。資玉歷以布和。宜克欽承。用符恭授。

賜五臺山十寺僧正圓凝等新進功德疏勅書

靈山奠方。西聖儲瑞。聿爲寶所。以佑中區。眷爾苾芻之流。參軒迦蓋之重。每緣新歷。茂集勝因。歷讚誦之寶題。形熾昌之善祝。傾虔有素。歎尙無忘。

賜元州舒延金進奉謝賜眞命官誥及加妻母邑號勅書

汝祇稟朝威。保寧徽煖。彛寵州符之號。特頒臺詔之文。遽達貢儀。罄紓謝臆。永言恭順。良切嘉稱。

賜右屯衛大將軍昌州刺史承裕左屯衛大將軍封州刺史宗顏進和御製讀三朝寶訓詩獎諭勅書

洪惟列聖。參建大猷。至訓睿謀。充圖溢牒。曩緣約史。申命記言。屬茲講藝之餘。將虔布策之覽。永懷先烈。因抒短章。仍示宗支。用均燕翼。汝地連昵屬。天賦雅材。唱韻甫頒。奏篇俄上。匪徒揆藻之麗。實具然其之能。秀劭若斯。歡慰何已。勉修素業。終稱茂親。褒善最成。吾意倍極。

賜知府州折繼宣放罪勅書

汝世荷朝恩。任優邊瑣。凡該郡政。合稟公規。覽使者之勅章。列部民之訴牘。悉條違冒。紛有端倪。雖涉交仇。而理須置對。審如訟狀。當正刑科。朕以汝忠順之門。勤勞固圉。方期來效。搆此煩言。良用軫嗟。特從矜貸。然國章不可屢屈。吏議難于再加。爾當念咎省躬。棄汗履潔。心無憚改。日以自新。上續弓裘之勳。勉訓山藪之施。保名全節。可不慎歟。

賜溪洞刺史等進乾元節水銀端午綿紬勅書

慶節稱觴。嘉辰角黍。汝保寧遐徼。欽率彝章。任土達誠。效珍有品。眷茲順恪。深用歎嘉。

賜乾寧軍兵馬監押右班殿直趙化明勅書

勅趙化明。省河北轉運司奏。准密院劄子。令乾寧軍勘會保明到。汝的于正月一日。親自部領軍員兵士。往軍北蔡家庄。鬪敵。殺倒賊頭共五人。全火。當同看詳。委是詣實事。汝禁庭隸職。軍壁薰戍。能率蒸徒。往擒寇孽。厥官斯舉。編戶用安。言念忠勤。良深嘉尚。故茲獎諭。想宜知悉。

賜五臺山僧正法震等勅書

勅五臺山僧正法震等。省所差副僧正兼真容院供養主英惠大師。賜紫廣洎進新正功德疏到闕事。具悉。瞻彼名山。素嚴真像。屬茲獻歲。廣集勝因。奏疏以聞。精誠可諒。宜加賜予。式獎恭勤。今賜廣洎紫僧衣一對。絹二十疋。故茲獎諭。想宜知悉。

賜知唐龍鎮殿直來守順勅書

勅來守順。省所差人管押進奉乾元節并告家闕及直進馬共四疋事。具悉。汝率職居邊。輸忠奉國。爰效右牽之貢。仍傾無隱之誠。言念恪恭。尤增嘉尚。特推頒賚。用示眷懷。其所進馬。今依估價。迴賜錢七十九貫文。所有告家闕別賜銀一百兩。並交付差來人。至可領也。兼賜差來教練使任璘王受郭海各紫絕衫子一領。錢三貫文。故茲示諭。想宜知悉。

賜祠部郎中知河南府陵臺令兼永安縣趙世長勅書

勅趙世長。近雨水衝注。奉先橋汝部押兵士救得本橋事。在昔先皇恭朝陵寢。跨茲溫洛。肇建輿梁。比淫雨之載零。伊衆川之交注。汝克勤障捍。訖免隳摧。言念勤勞。豈忘嘉尚。故茲獎諭。想宜知悉。

賜尚書兵部員外郎知壽州梅詢勅書

勅具官梅詢。近草寇竊發。汝擘畫捉賊。人物安居事。壽陽劇地。東楚奧區。控引淮淝。表裏瀟霍。逋逃所聚。剽竊寢多。疇汝幹材。付之郡職。果有方略。屏茲寇攘。枝黨悉擒。巢穴皆覆。省司官之奏列。知編戶之乂安。載嘉乃勞。深副予意。

賜杭州天竺山傳法住持僧文勝勅書

勅杭州天竺山傳法住持僧文勝。汝早悟上機。素推重德。近茲京輦。肇建禪宮。已徇羣情。爰命促召。將廣安于法衆。式闡真乘。宜束戒于輕裝。副茲寵待。故茲示諭。想宜知悉。

賜馬亮進乾元節絹勅書

勅馬亮省所進奉乾元節絹二千疋事。具悉。卿爰以能材。往分外寄。載登厥貢。克遵任士之規。來慶誕辰。深諒愛君之節。虔恭可尙。嘉嘆寧忘。故茲詔示。想宜知悉。

賜知舒州洪鼎勅書

勅洪鼎省所進奉新茶一銀合事。具悉。汝輟于學館。往布郡條。懿彼名區。旨茲嘉蒞。能採掇而來貢。應氣序以惟新。言念恭勤。良增歎尙。故茲示諭。想宜知悉。

唐龍鎮勾招鞍馬空名勅書

汝部族推雄。忠勞夙著。惟邊疆之頗邇。聞良馬之素多。能選權奇。入充貢獻。必頒善價。用獎純誠。

府州勾招鞍馬空名勅書

勅國家務推恩信。遠示招懷。聞彼邊陲。素多良駿。儻獻輸之來効。固誠禮之可嘉。其在賞酬。必令優厚。勅書到日。汝等可多將三歲以上十歲以下。堪勝帶衣甲壯嫩好馬。赴京進貢。候到日支賜茶酒錢。及厚給價直。已指揮經過州縣館驛。支給熟食草料。如法供待。務在豐盈。故茲示諭。想宜知悉。

賜知代州趙日新進黃金鍍銀礪石火匣勅書

完石含溫。良工賜巧。熾燃備用。鈞飾均華。會此淒凝之辰。修厥藝常之獻。勤恭所至。歎尙無忘。

賜知廣德軍龔會元進先春茶勅書二首

惟厥苦茶冠于常卉。薄言采攝。來效貢輸。矧屬誕辰。且先方物。服恭修職。併用稱嗟。

江楚之區。茗薺攸產。陽膏其動。露蘄載萌。攝芳筥以先期。襲采緹而效貢。傾勤有恪。嘉尚無忘。

賜知光州郭昭昇進新茶勅書二首

土毛之繁。茗品尤上。先春效味。輸貢有經。眷乃摘山之勤。加茲于橐之密。罄恭謹職。併用稱嗟。

茶品之英。淮區攸產。當新陽之盈。值先百蘄以萌。滋著厥貢條。是惟方物。逮此甘芳之薦。弗違采攝之期。

言念恭勤。良深歎矚。

賜知豐州新授侍禁王餘慶進謝恩馬勅書

鼎寵邊勞。序遷庭侍。遽緣恩擢。來效貢輸。服阜惟良。賜金有品。逮于給使。咸俾霑膏。深諒爾忠。當體余眷。

賜冀州刺史趙翰階州刺史張重德進謝恩馬勅書

汝以職勞。茂膺恩數。眷獎功而甫爾。遽列感以勤斯。爰效駿牽。且將謝意。恭虔所底。歎愧良深。

賜石州安慶府都督康興進乾元節馬勅書

慶節在辰。庶邦效貢。汝世承邊扞。勤稟朝規。遠輸牽右之良。來集祝延之會。永惟忠恪。深用稱嗟。

賜新授崇儀使李士彬進謝恩并乾元節馬勅書

增秩懋勞。抑惟公賞。祝延上慶。茲乃忠懷。繫厥駿之竝將。顧庭儀而有恪。恭誠順節。歎矚兼深。

賜殿前都虞候劉平進謝到任馬勅書

卿輟自衛廬。往來邊壘。訓齊甫爾。感敍勤斯。載閱右牽之良。彌昭中蘊之恪。眷言歎矚。無廢于懷。

賜潞州安慶府都督安美等進上尊號馬勅書

朕擲迫羣情。紹加徽冊。繫乃心之忠順。樂朝慶之光華。遠效名駒。來參貢物。然載驅多費。平估有贖。且錫貨緡。用酬駿產。仍推恩例。並獎使勤。其在歎嘉。弗忘于意。

元憲集卷二十九

內制

賜文武百僚上尊號不允第一批答

夫號惟表功名不浮實休有前誠是謂至公。朕以眇眇之身託元元之上。負荷淳烈。遙駿大猷。持盈載勤。燭理猶昧。日慎一日。弗遑底寧。幸屬中區之和。將躬吉士之報。揆乃冬序。布之先庚。恤祀有初。克已彌勵。而公袞四近。官師百工。繇朝逮鄉。自夏而裔。咸一厥慮。颺言于廷。願因拜祝之成。益余建顯之數。省閱于再。良用慚然。矧曩徇羣心。游膺丕稱。準文配義。已多慙德。今又徵祈福之會。崇溢美之聲。神聽惟聰。禮典將黷。齋明抑畏。其若是乎。徒嘉乃誠。毋重台責。

第二批答

朕曠以郊報之嚴。邦體攸重。親率厥典。誕告羣倫。方將勵抑損之誠。保齋禘之戒。嘉與三事庶尹。共遵斯路。率志盡物。以優裕于神祇。庶無怨恫。用迎祝施。則朕之精懇。宜諒于朝。乃今中外之情。愛戴弗已。因時熙事。增我號榮。連章叫闈。至于再請。諭而未卻。茲愧于懷。且禮繁者易敝于文。名高者難副以實。矧斯薦信。安議重華。罔固溢言。往順前指。

第三批答

朕奉承先猷。日儆端命。獲事上帝。于茲五郊。特以方隅靖嘉。犧齋蠲碩。樂與羣執。同戴盛儀。不謂官師。率
和奏牘。連委冀緣。瑞福之集。增列號榮之崇。荇諭至懷。俾停過舉。而億兆歸美。右席均誠。叩闈竚命。固期
開可。朕參慮夙夜。審處情文。不有所俞。曷符愛戴之切。不有所避。奚表抑畏之恭。若乃寶用善元。易冠丕
稱。是惟勗德。匪曰名功。襲用舊章。差或無愧。至于英睿之烈。后辟罕兼。未實而居。省已胡益。矧歲序之邇。
變眚屢臻。宵舍舛期。坤載愆靜。責躬念咎。已布于詔書。盡誠恤祀。方祇于天戒。遽加徽顯。是黷齋明。宜損
溢言之華。姑循備物之典。去彼取此。欣腆兼常。其所上新號內英睿二字。宜不允。餘如所請。候郊禮畢日
受冊。

賜荆王賀加上尊號受冊批答

朕屬者徇外朝之請。崇徽稱之華。甫畢禋燔。遂膺榮典。內循溢美。兼用建元。覲然祇受。良增夕惕。卿茂親
明德。聿隆褒愛。雅辭徹奏。首罄寅恭。表率友藩。尊奉王室。申味情旨。歡愧兼懷。

賜門下侍郎兼兵部尚書同中書門下平章事張士遜讓恩命不允批答

朕頃虔郊報。慎講禮文。實倚台司。總宣使範。肇于齋款。訖乃熙成。謀猷所咨。陟降咸若。褒功胙土。恩冠于
朝。誕告之辰。師僉允協。夫何冲避。猶爾控陳。且名器天下之公。股肱君體之一。卿而弗受。誰復宜居。宜略
常謙。往膺盛典。

賜荆王讓恩命不允批答

卿屬冠宗支。地尊藩輔。禮無與二。恩所當先。惟是嚴禋。介于繁祉。覃爲慶賞。實首親賢。明制誕敷。朝言允協。何圖謙愨。再列辭情。雖高讓可嘉。而至公難廢。宜循茂典。卽斷來章。

賜知樞密院盛度讓恩命不允批答

聶以獨吉元辰。紹修愆祀。緊卿舊老。相我盛儀。禮備福臻。此焉同慶。華階茂爵。允矣疇庸。而乃稽命至公。徇高一己。過敷讓懇。將廢彝章。收汗出綸。所繫尤重。宜遵往受。卽副虛懷。

賜參知政事王譔讓恩命不允批答

朕屬者躬祓嘉壇。獲成鉅典。歸臨端闕。大有羣生。實賴左右之臣。罄宜協贊之力。無德不報。慶賜遂行。參質寵章。允穆朝論。讓封來上。謙槩頗勞。然信賞勸功之先。徇高行己之細。我方懋德。人孰顧私。當體虛懷。無淹往受。

賜參知政事李若谷讓恩命不允批答

卿早服忠謀。預聞幾政。屬余禋類。實相齋明。勤與禮俱。兆緣誠報。受釐之始。均賞攸宜。遽閱奏函。過形讓懇。夫疏封馭貴。褒勸大方。潔己辭豐。踐修末節。矧惟成命。已布公朝。當廢循牆之私。卽虔渙汗之拜。

賜寧江軍節度使允讓讓恩命不允批答

卿屬懿地尊。器詔韻遠。乘旄戎闔。司籍帝宗。曷展陽郊之儀。參奉上公之獻。助余介祉。時乃之勤。竣事布恩。寵章惟舊。猥形撝遜。未卽往俞。況定命已行。公言普協。宜回沖執。時對茂恩。

賜保寧軍節度使駙馬都尉王貽永讓恩命不允批答

卿早服近嫻見推賢帥屬余禮類專倚微循亦既均禧是焉進律質于公賞孰不謂宜而過執冲懷尙留成命安得徇茲崇讓虧乃懋功盍廢謙私往膺蕃渥

賜殿前副都指揮使寧遠軍節度使鄭守忠讓恩命不允批答

卿臯執親喪奄踰禫祭雖義從權奪早舉墨縗之文而官有舊常宜還艾綬之品仍緣喪數進衍戶封式示賞勞詎爲躡等遽茲冲避深體謙勤然命出成綸恩無收汗卽虔往受毋復牢辭

賜宰臣張士遜讓恩命不允批答

卿早服宗工洊同宰政式布揚庭之命且光圖舊之恩方佇延登遽形謙避體余慎簡當廢冲懷今差入內內侍省內東頭供奉官梁懷志賜卿讓恩命不允批答想宜知悉

賜宰臣章得象讓恩命不允批答

卿曩服僉俞贊圖宥密嘉有勞于幾事俾移爨于大鈞方佇延登遽形冲避讓牘再聞寵章猶鬱適圖亮采無遂終謙

賜知樞密院王德用讓恩命不允批答

卿總司樞務綿涉歲勤特遷內使之華仍易中權之號遽形讓奏稽我寵章宜副同寅卽祇兼授卿久勤樞務兼擁戎麾朝渥旌勞寵章異數疊形讓啓深悉冲誠宜回再僕之恭往對已成之命

賜知樞密院盛度讓恩命不允批答

卿茂宣忠力對掌機衡實嘉籌幄之勤俾換建牙之秩遠形讓奏稽我寵章宜副同寅卽虔初授

賜參知政事程琳讓轉官不允批答

卿夙蘊賢猷參知宰政尙講邦彙之要俾增臺轄之崇渙令已行讓封來上嘉其謙慤方切倚毗卽服寵階無廢朝賞

賜參知政王讓讓恩命不允批答

卿德映民宗才經政體蔽于朕志擢佐台猷顧承命之允諧何奏封而固避雖嘉有讓難廢同寅宜略謙懷用光賢舉

賜同知樞密院張觀讓恩命不允批答

卿適膺成命參掌繁機朝論允孚謙懷興讓宜虔往授以協至公

賜淮康軍節度使同中書門下平章事陳堯佐讓恩命不允批答

卿近解政機榮兼將鉞洊形讓奏彌諒謙懷矧誕告之徧聞當往諧而卽受無煩遜執式副僉俞

賜新授武寧軍節度使赴本任王德用讓恩命不允批答

卿久服政樞洊彌歲筮盡心匪懈均逸有常特移漢節之華近奠徐方之重詢于疇若僉曰宜哉疊覽讓封過辭恩典矧出綸之誕布顧收汗而罔繇宜略終謙時膺茂渥

賜新授尚書侍郎同中書門下平章事章得象讓恩命不允批答

省表具知。袞職華重。槐階峻極。必咨民望。允釐天工。卿頃幹鴻樞。實稔休閒敷燮之任。授受惟宜。而謙情素懷。累控重啓。尋加敦諭。尙執遜沖。且策名者以奮庸爲先。體國者以獨善爲細。矧茲爰立。方切仰成。安得遂循牆之恭。稽側席之竚。時膺往命。勿復煩辭。所讓宜不允。仍斷來章。

賜參知政事程琳讓轉官不允批答

卿識貫民宗。望高時秀。比繇卿貳。擢贊宰司。參決大猷。總領衆職。動本直道。期于致君。年績甫成。朝寄滋重。式疇忠概。兼肅政機。德賞之行。公言無間。遽披沖述。深具至懷。宜略常謙。往服休命。

賜新授參知政事王纘讓恩命不允批答

參毗國均。僉屬邦望。卿忠力淵劭。思懷凝簡。擢考藩最。進貳政樞。式時猷爲。濟厥文敏。績用已試。朕甚嘉之。移替宰庭。俾暢賢業。而介節難進。刻奏自陳。遜執雖勞。虛竚方切。當廢確然之請。庸副往哉之命。

賜新授參知政事李若谷讓恩命不允批答

卿局力開濟。思謀淹允。歷踐衆職。簡服近僚。以詳文飾吏師。以精器制京劇。侃然奮德。華我治朝。宰路缺員。邦均疇佐。式咨民望。參筦政機。僉謀既同。亮采惟竚。遽披讓奏。頗執沖規。儻矜節自高。則同體安寄。宜屈終謙之守。時副欽鄰之重。

賜新授宣徽南院使定國軍節度使知樞密院王德用讓恩命不允批答

卿茂負忠勞。兼資才武。曩藉世臣之重。入司幾政之煩。寵序節旄。籌持帷幄。左右無懈。歷年于茲。奚加使于徽猷。乃改藩于維翰。疇功斯允。讓爵載勤。閱乃奏封。尙稽拜秩。固當略循牆之小善。體渙汗之明恩。往踐崇階。以穆公議。

賜新授宣徽南院使定國軍節度使知樞密院王德用讓恩命不允批答

卿地服世忠。勳在侯表。久翊樞務。遙制州師。曩疇匪懈之勤。卽寵兼榮之拜。尋從誕告。執不謂宜。夫何冲懷。再爾牢讓。矧宣猷使範。持節戎麾。蕃其典章。蓋重帷幄。朝僉德舉。咸出至公。無執終謙之勞。尙違信賞之實。卽斷重請。時對茂恩。

賜新授寧武軍節度使知樞密院盛度讓恩命不允批答

對掌斗樞。遙持將鉞。隆名重器。兼副實難。卿望冠本朝。謀經庶績。曩咨雋乂。參處弼諧。穆然清規。式我彝序。因儒林元老之懿。換籌幄皇僚之華。亦旣歲成。是光戎秩。而洵形讓懇。固避寵階。謙槩雖勞。至公難廢。卽膺往授。無復多陳。

賜新授同知樞密院陳執中讓恩命不允批答

卿茂器清規。冲懷勁節。世詒忠教。族擅邦華。自結先朝。歷試衆職。侃然直道。形于造次。逮升禁從。連撫外藩。威惠並流。聲實偕劭。眷乃內樞之劇。均于隆棟之求。斷自朕懷。召以軺傳。諫垣籌幄。相資爲重。命成之日。僉曰宜哉。何乃奏封。猥形讓懇。雖嘉遜擢。方疴謀謨。卽服近司。無淹盛典。

賜新授同知樞密院張觀讓恩命不允批答

卿懿行雅材。素襟直質。曩繇士選。來冠賢科。椒闈書殿之游。斧藻辭垣之訓。雖復間勤吏事。中借守麾。政本惠和。道無緇磷。逮升禁署。復總憲綱。已試之能。朕所親悉。入司幾事。誠協僉謀。渙命甫頒。讓悰方確。矧萬樞叢劇。四近參裨。天戒曠工。邦思亮采。宜略循牆之細。用光側席之求。時幹繁機。卽斷來表。

賜新授同知樞密院王博文讓恩命不允批答

卿儒操吏資。邦華士望。服干公路。多歷歲期。出勤宣布之和。入備財煩之使。聿疇聲實。參佑機衡。朝無間言。我得才舉。奏封來上。謙述有條。雖難進之風。可矜媮俗。而至公之授。當廢沖懷。往序近司。無淹盛典。

賜新授彰信軍節度使同中書門下平章事王隨讓恩命不允批答

卿曩自星樞。魁升鉉席。奮庸方劭。嬰疾有初。屢陳遜位之章。姑倚調元之寄。而太和未復。前請重違。爰解鈞衡。寵頒旄鉞。仍視台聯之秩。俾令邦體之榮。疊疏謙懷。尙稽成命。矧告庭之已洽。非收汗之可圖。宜副往諧。卽斷來請。

賜新授淮康軍節度使同中書門下平章事陳堯佐讓恩命不允批答

台槐之尊。以穆朝序。方嶽之重。以陪王室。不有舊德。疇可迭居。卿比遜煩機。是均斯寵。誕告于外。僉曰往諧。洊閱奏封。固形謙執。雖受爵而讓。禮則當然。而慎令以出。恩無中廢。宜屈辭豐之操。協伸懋賞之公。促拜徽章。仍斷來請。

賜鎮國軍節度使駙馬都尉李勗遵爲疾病乞致仕不允批答二首

卿勳伐之華材猷兼劭。早膺尙禮。實睦近嫻。以駙馬之榮。列通侯之籍。望高貴里。時陟將壇。而能出擅藩。宣之勤。居多位著之恪。乃心道素。探蹟藝文。余懷所嘉。曷日而旣。今乃因晦明之偶。診援進退之大方。確布書辭。願致官政。矧告旬未幾。年力甫強。謝仕而歸。在禮安據。卿其止念慮寶精神。招還天和。頃遲藥喜。慰我虛佇。勿復文陳。

卿羸苦擢疴。甫淹時晦。特優賜告。用適頤生。屬療治之未瘳。覽控陳之迭至。願還有政。追踵昔賢。高風所存。媮俗知慕。然卿地雖嫻密。器實虛恬。情棲道腴。行富天爵。偶嬰無妄之疾。固匪不衷之災。視履其旋。何恙弗口。遽歸印綬。殊惻朕心。矧嚮福未涯。與善無爽。勉輔醫藥。行復粹和。姑廢沖懷。卽斷來表。

賜知樞密院王德用等賀壽星見批答

陽序布和。瑞躔循軌。爰覽日官之奏。且符壽策之祥。見象孔昭。撫躬增愧。卿等協司樞務。欣覲乾華。平徹露辭。熾昌歸美。願因寶貺。參紀信書。矧在同寅。協茲均慰。勉從敷請。良切歎嘉。

元憲集卷三十

內制

賜步軍副都指揮使張潛已下啓聖院罷乾元節道場香合酒果
卿等集祓仁祠慶余誕節適當罷會深諒祝延宜渥寵頒用均熙事

賜宰臣已下上清宮罷散天祺節道場香合

朱律肇和纓符紀節敝瓊霄而申禱肅會弁以如儀式助薰燃宜加頒賚

賜宰臣已下大相國寺罷散乾元節道場香合

慶節在辰外朝祝祉祓仁祠而有血會鄰使以咸臻宜錫名薰用資華供

賜賀乾元節人使鈔鑼唾孟被褥等

卿等肅奉聘儀甫安候館嘉乃虔恭之節倘多夙夕之勞宜有寵頒用昭眷待

賜賀乾元節人使內中酒果

卿等已陪壽筵留獻都郵克蹈寅恭允通信睦宜加霑賚用篤恩勤

撫問郵延路知州部署等

卿等出膺邊寄參總軍和候望雖寧撫循亦至眷惟勤職良用注懷

撫問環慶路知州部署等

卿等任參邊瑣職總戎昭驅事所經公心攸賴涉茲炎序諒協常休

撫問涇原路知州部署等

卿等夙官邊部總職軍鈐體余修偃之風謹乃綏和之略歎炎在候率履咸宜

撫問眞定路知州部署等

卿等夙奉朝恩言綏邊略軍和謹職疆候沉氛屬此歎炎諒寧官守

撫問秦鳳路知州部署等

卿等分職邊關布和郡壘協寧疆事無爽朝猷言念祗勤弗忘存矚

賜宰臣已下清宮罷散先天節道場香合

令節欽先瑰宮薦會儼朝倫而並集率道範以惟寅特示頒宣用資薰奉

撫問梓夔路知州鈐轄等

卿等恪稟朝威善分邊職州疆有謐戎律無譁適啓秋氛諒綏時祉

撫問并代路知州部署等

卿等寅奉朝經協司疆事政條參乂戎索無譁言念恪居可量遐矚

撫問高陽關路知州部署等

卿等分荷朝恩參寧疆事夙官有次展體惟勤涉此秋陽勉綏時福

賜宰臣章得象生日禮物

卿亮采光朝生賢紀旦邦儀有舊恩數惟蕃姑篤慶私所宜祇荷

賜荆王生日禮物

霜籥紀辰門弧集慶眷惟蕃錫抑有彝儀尙讀壽域且符欣矚

賜宰臣張士遜生日禮物

卿等業茂承明望崇輔弼爰屬生賢之旦實昭命世之祥宜渥寵頒用將慶祝

賜宰臣已下上清宮罷散降聖節道場香合

孟冬協序靈節延禧肅朝弁以相趨會珠庭而有恪宜頌薰炷用獎圭誠

閣門賜宰臣荆王使相節度使加恩告勅

熙事甫成恩章有典已誕宣于著位宜申錫于贊書當體眷懷往欽褒渥

賜宰臣荆王使相節度使讓恩命不允批答

甫畢嚴禋載均順福乃眷臣鄰之重式推恩數之蕃允協舊常詎煩冲挹

賜淮康軍節度使同中書門下平章事陳堯佐加恩告勅

卿台袞蓋臣將旒近屏適均鴻霈載茂徽章仍因子舍之賢往授贊書之重

賜刑部尚書知徐州李迪加恩告勅

郊類成儀。臣工底力。眷惟舊德。宜進寵章。往錫贊書。用光藩闔。

撫問真定路知州部署等

卿等分扞邊州。參持戎律。政條有穆。疆場無譁。方涉窮冬。諒綏吉履。

撫問麟府路知州部署等

卿等肅膺朝選。分扞邊虞。率職有經。治戎無懈。適茲凝列。可諒勤劬。

雄州撫問賀正旦人使

卿等肅將歡幣。來慶端辰。擁行傳以勤斯。款邊關而戾止。眷言冒涉。深體寅恭。

賜賀正旦人使生餼

卿等恭持歡聘。來會元正。就館方初。犒賓有式。特申優渥。用體眷懷。

賜賀正旦人使鈔羅唾盂被褥等

卿等來聘王春。甫休使眷。方眷睦鄰之厚。宜優適館之華。爰畀寵頒。所宜祇荷。

賜賀正旦人使內中酒果

卿等肅將信幣。已展朝容。適館載寧。加籩有品。宜賜禁筵之味。更資公讌之餘。

賜賀正旦人使春幡勝盤等

端方布和。上春啓祚。餌辛盤而惟舊。戴寶勝以增華。併示寵頒。且均嘉貺。

撫問環慶路知州部署等

卿等奉將朝寄。參幹邊符。率職有經。訓戎無懈。方臨詔節。勉蹈常休。

撫問益州路知州鈴轄等

卿等分輯郡條。參司戎籍。並勵首公之操。副余綏遠之懷。益蹈常休。以符遐矚。

撫問知永興軍夏竦

卿握節寰畿。布條關輔。忠誠卓亮。邊略攸綏。適履初炎。具蕃嘉祉。

賜賀乾元節人使到闕班荆館御筵

卿等肅奉聘儀。來祗慶節。駕言輶傳。次我都門。宜錫宴私。用紓勤勩。

賜賀乾元節人使到闕班荆館御筵酒果

卿等將命載虔。馳徒有次。方卽郵亭之便。式燕豐俎之華。宜賚芳馨。且資酣懌。

賜賀乾元節人使生餼

卿等展幣嘉辰。停輶外邸。犒勤有式。致餼惟豐。爰優卽賜之恩。更篤如歸之惠。

賜賀乾元節人使鈔鑼唾盂被褥等

卿等奉幣修歡。停輶就次。惟使勤之甫釋。給賓具以宜優。爰錫豐華。用昭眷遇。

賜賀乾元節人使內中酒果

卿等適展慶儀。載寧傳次。必厚甘馨之品。別將燕衍之華。故此恩頒。用昭勤勩。賜幸臣已下。上清宮罷散天祺。節道場香合。

離序孟辰。仙符舊節。肅靈場而既就。昭寶貺以彌新。宜錫真香。誕迎茂祉。

賜知樞密院王德用已下大相國寺罷散乾元節道場香合

卿等以朕誕辰。歸虔梵果。爰屬散香之會。載延拂石之齡。宜有頒宣。用茲薰奉。

賜知樞密院王德用已下罷散乾元節道場錫慶院齋筵酒果教坊樂

卿等恭祓梵場。慶余誕日。既畢人天之供。宜頒藥餌之私。仍副甘珍。併昭慈惠。

賜防禦使劉從廣景德寺普門院罷散乾元節道場香合酒果

卿率職禁聯。慶余誕日。肅建梵場之果。載歸壽歷之祥。宜渥寵頒。用資薰祝。

雄州撫問賀乾元節人使

卿等奉幣有儀。及疆胥會。矧韶和在。候諒跋履。以偕勤言。念寅恭。靡忘嘉矚。

賜鎮海軍節度使新授知樞密院夏守贊赴闕沿路茶藥

卿入掌繁機。已膺迅召。宜示頒宣之寵。體茲眷待之私。

賜鎮海軍節度使新授知樞密院夏守贊到闕生餼

卿適馳戎傳。甫戒都門。勤禮有初。犒儀惟舊。往膺蕃錫。深體眷懷。

賜鎮海軍節度使新授知樞密院夏守贊讓恩命不允批答

卿師帥舊臣。藩垣茂伐。勳酬踐歷。入總幾微。過列讓誠。難稽公舉。

賜鎮海軍節度使新授知樞密院夏守贊讓恩命不允批答

卿近允徽章。俾敷列位。再觀封疏。尙執遜沖。宜時攝于繁機。勿專懷于小讓。

賜護國軍節度使兼侍中張耆生日禮物

卿位冠列藩。慶周誕日。特俾過庭之嗣。往宣班物之恩。姑體眷懷。卽宜祇受。

賜武成軍節度使同中書門下平章事駙馬都尉柴宗慶生日禮物

卿戎節宣風。慶弧紀日。特命家庭之懿。往頒燕筐之華。式表恩私。所宜欽荷。

賜宰臣已下上清宮罷散先天節道場香合

寶誨舊聞。先秋令節。謹醮場而有式。會朝祇以如儀。爰錫名薰。用蠲慶會。

撫問涇原秦鳳兩路沿邊經略安撫使夏竦鄜延環慶兩路沿邊經略安撫使范雍

卿出總藩條。載華使節。兼倚中權之重。且紓西略之虞。宜篤常休。用符榮寄。

撫問麟府路知州部署等

卿等恪分事任。祇奉朝規。永念忠勤。克壯邊略。屬季商之在候。諒夙夜以爲勞。用示撫存。幸綏吉履。體余

眷囑。罔替終譽。

賜宰臣張士遜赴闕都城門外御筵

卿甫膺節召。再冠槐階。封傳疾驅。都門在望。宜渥勞旋之禮。俾均示惠之私。式符同寅。且欽飫賜。

賜宰臣張士遜赴闕都城門外御筵酒果

卿甫修圭覲。入序台儀。延勞都門。均豐燕豆。宜加珍錫。以侑歡誠。

賜宰臣已下罷散乾元節道場錫慶院齋筵酒果教坊樂

卿等祝慶梵場。流恩宴館。列豆觴而有餞。肅簪檜以如儀。特示頒宣。且榮歡集。

賜宰臣已下罷散乾元節道場錫慶院齋筵酒果

卿等率利朝弁。祇祓齋場。歸祉誕辰。均恩燕俎。宜頒異品。以侑多歡。

賜知樞密院王德用已下大相國寺罷散乾元節道場香合

卿率屬內廷。祝延梵宇。壽祺來集。忠款可嘉。宜錫名薰。用資寶供。

賜知樞密院王德用已下罷散乾元節道場錫慶院齋筵酒果教坊樂

卿等祝慶仁祠。推恩宴館。特厚籩壺之賜。兼諧匏竹之和。姑寵肆筵。用昭示惠。

賜知樞密院王德用已下罷散乾元節道場錫慶院齋筵酒果

卿等修慶誕辰。祈禱梵果。散香在會。式燕攸均。宜錫甘滋。用昭獎眷。

賜賀乾元節人使到闕班荆館御筵

卿等恭持聘節。用戒都門。征馭載勤。候亭留憇。特伸燕勞。以洽寵私。

賜賀乾元節人使到闕班荆館御筵酒果

卿等肅將信幣。來慶誕辰。迎犒有初。燕私甫洽。宜加珍錫。參侑歡悰。

賜賀乾元節人使鈔鑼唾盂被褥等

卿等肅奉聘儀。甫安候館。嘉乃虔恭之節。尚多夙夕之勞。宜有寵頒。用昭眷待。

賜賀乾元節人使玉津園射弓例物並御筵

王籩均歡。使儀侑好。爰設射壘之算。參陳宴俎之華。特厚匪頒。用昭儀眷。

賜賀乾元節人使朝辭御筵

卿等將復使軒。甫違朝陛。率多儀而允恪。軫長邁以方初。宜寵燕慈。用蕃恩錫。

賜賀乾元節人使朝辭御筵酒果

卿等甫訖聘儀。將還使路。歸裝旣戒。候館少留。宜錫醇芳。用昭眷賚。

賜賀乾元節人使回班荆館御筵酒果

卿等聘禮甫成。歸塗云戒。式厚都亭之餞。將勤征軼之行。特賜甘馨。用滋酣悅。

賜賀乾元節人使回至天雄軍御筵

卿等復命使輶。次塗州館。冒初炎之燠。若。想夙駕以勤斯。宜錫宴羞。用申犒禮。

賜宰臣已下南郊禮畢御筵

郊配成儀。臣工治社。當速燕私之惠。且紓陪贊之勞。宜抃慶辰。往均良集。

賜賀正旦人使赴闕至天雄軍御筵

卿等肅將鄰聘。甫次近藩。諒行李之爲勤。矧凝嚴之在候。宜申犒禮。式表恩華。

賜賀正旦人使到闕班荆館御筵

卿等遠將歲聘。近戒都圻。惟涉路以載勤。俾頒觴而申犒。並宜歡飲。昭體眷恩。

賜賀正旦人使就驛御筵

卿等奉將鄰好。來慶王正。當嘉節之肇新。固歡心之允協。宜因館穀。特展宴私。

賜賀正旦人使就驛御筵酒果

卿等肅奉鄰歡。參陪朝慶。蹈虔恭而有恪。均戢祿以咸宜。爰錫甘滋。用昭勸賜。

賜賀正旦人使玉津園射弓例物并御筵

卿等慶幣成儀。宴庖均渥。特啓禁園之勝。俾資射算之歡。仍示頒分。並宜欽荷。

賜賀正旦人使朝辭御筵

卿等肅導鄰歡。將還聘節。使無違禮。恩有示慈。宜渥燕私。用昭獎賚。

賜賀正旦人使朝辭御筵酒果

卿等既展邦儀。少留候館。虔恭載恪。眷尙無忘。宜錫甘滋。且昭優異。

賜賀正旦人使回班荆館御筵

卿等奉聘成儀。載馳復命。適遵歸路。特舉餞筵。用示寵嘉。體茲眷遇。

賜賀乾元節人使玉津園射弓例物并御筵

卿等適達鄰歡。甫均燕惠。爰擇囿遊之勝。且觀決拾之容。仍渥寵頒。以昭眷佇。

賜賀乾元節人使回至天雄軍御筵

卿等奉成歲聘。回飭使驂。冒朱籥之初炎。次星街之近鎮。特頒宴犒。用篤恩勤。

元憲集卷三十一

劄子

賢良等科廷試設次劄子

竊見近者召試制策并武舉人于崇政殿。皇帝陛下親蹕。留神永晝。嚴門異席。程其才略。誠見聖心。覈真偽。進英豪之審也。然臣以謂有司祇事。失于奏請。苟從便易。乖戾舊章。措置之間。甚不稱陛下求賢之意。伏覩賢良方正。蘇紳等就試之日。並與武舉人雜坐廡下。洎攜辭寫卷。皆俯伏氈上。自晨至晡。訖無飲食。飢虛勞瘁。形于嘆嗟。雖僅能成文。可謂薄其禮矣。又況武舉人等。才術膚淺。流品混淆。挽弩試射。與兵卒無異。使天子制策之士。並日較能。此又國體之深譏者也。臣竊爲朝廷惜之。臣不敢上引漢唐。以煩省覽。仰惟先帝故事。布在耳目。縉紳列位。孰不知之。謹按真宗皇帝凡五策賢良。皆躬御便坐。其舉人就試。并于殿廊張幕爲次。垂簾設几。大官賜膳。酒醪茶菽。無不畢供。聖人之心。以爲張不次之科。待非常之士。所咨者。天人之際。所質者。古今之宜。言若可行。高者足以和陰陽。躋仁壽。下者足以明利害。觀學術。是則所責于人者。若是之重矣。所設之禮。又可以輕乎。勢自當然。非苟而已。臣恐有司自今以往。待士之禮。因循亡喪。則國家設此舉。必無異人。何者。夫士有高才。必有高節。節高禮薄。將恥而不就。其就者。皆輕躁傲倖。先身後義之徒。適足啓偷競之風。玷詳延之詔。若執事者以爲人不逮古。文中不程。虛屈至尊。行不急之

務。則因而罷之可也。或惜其歷代盛王之所重。當世奇才之不乏。則先朝舊禮。庸可廢乎。伏願申詔近臣。檢詳舊史。作爲定式。付于攸司。今後每試此科。卽備陳條件。凡厥供擬。關報所由。仍乞或有武舉雜科。不令同日就試。庶擬人于類。有協禮經。仍貫而行。嗣恢世烈。狂言聖擇。或補大猷。如允所陳。乞降付中書詳議。干蹟旒辰。臣無任省循狂瞽。慙懼屏營之至。

封畿劄子

謹按周制王者都畿千里。千里之地謂之寰內。井田百萬。是之自出。兵強地廣。以制諸侯。漢都關中。亦分京兆馮翊扶風爲三輔。又取河南河內河東弘農四郡。合三輔之劇。遣司隸校尉以督之。雖地非幅員。侈于周制。若其包山河之固。冠郡國之首。置使持節。不與部刺史爲等。亦王畿之意也。魏晉而下。始以司隸之治爲司州。南北分爭。名實始替。然江左建國。常以宰相帶揚州刺史。朝廷根本。此焉是賴。至唐有天下。復都長安。乃因關河形。便分州郡爲十道。而關內一道。全是王畿。雖無司隸之名。猶以華同岐三州爲上輔。河南爲東都。而京畿都畿。並置觀察使。此皆強幹據極。統御庶邦。國家因循五代。卽都于汴。地非京邑之舊。州無輔畿之實。自祖宗以聖武神略。剗平僭僞。萬方臣妾。會于京師。雖城闕雄尊。閭里繁衍。而諸縣之外。便屬他州。州雖密邇。卽爲別路。畿內十六縣。纔置提點官二員。人瑣位卑。降于漕軍之局。寧所謂尊甸服重王官者哉。臣欲望略依周漢舊章。以三京所環之州。畫爲畿內。曹濮滕單陳蔡鄭滑等八州。輔開封爲中畿。以孟汝二州。輔河南爲西畿。以宿亳二州。輔應天爲東畿。併三畿之州。升口近輔。通置畿內觀

察使一人以統之。取臺省給舍爲出入之資。凡輔州並乞正除刺史。取待制官以下正郎以上爲出入之資。俸秩班品異于列郡。除去今日虛名之弊。且示聖朝正官之漸。然後舉畿內之籍。均其租稅。輕其徭役。踵漢故事。徙天下豪族內實。三畿之州。四面設關梁。譏出入。以嚴王制。應禁兵營府。分據寰內。如此則海內震服。而王室安矣。

乞御前殿朔日立仗羣臣朝服劄子

臣聞告朔之義。周家尤重。在昔宣聖愛羊存禮。漢沿周制。合朔朝會。故惟優借大臣。許朝朔望。唐制立仗羣臣。皆禮服入會。藝祖受命。論次開寶通禮。亦著月朔入闕之儀。則朔日者爲政之端辰。講禮之盛節。國家因五代之亂。承千年之統。始勝殘去殺。務從簡易。雖制度既定。而謙讓未遑。五日一參。靡分朔望。禁衛軍少。威儀相率。禮典弗振。則朝廷不尊。國容寢廢。則臣下不肅。臣愚以爲羽衛之設。非矜華侈。所以重主威也。朝會之作。非專拜揖。所以飾治體也。臣願陛下上攷成周仲尼之法。下稽炎漢皇唐之盛。近守太祖開寶之禮。明詔執事。祇按成規。每遇朔日。坐前殿。朝羣臣。旗旂細仗。以次陳設。公卿朝服。如儀而罷。如此則臣道肅而主道尊。于以示四夷。風萬國。警民耳目。不可闕也。夫禮有以素爲貴。謂其誠慤。有以文爲貴。謂其采章。伏望陛下錄臣此言。使博士禮官得確論可否。講求故實。如曰便禮。卽奉而行之。使重熙顯猷。執競丕業。由陛下之馴致也。

乞于御苑空地內種植奉祠劄子

伏見國家每歲大小祠祭。黍稷取于太常。果蔬出于司農。茅茹責于光祿。然三寺皆牒取市物。入供祠饌。但具名品。無復馨嘉。雖明德上通。不貴多物。而工祝奉告。固有愧辭。夫孝子事親。必求仁粟。聖王饗帝。實立神倉。三代以來。茲禮惟重。取不告乏。用乃有虔。國朝因循未遑斯議。故令官司怠沓。祭典廢墮。百靈薦嘗。一切須索。習慣成瀆。神無據焉。臣竊見玉津瑞聖諸園。舊有隙地。異時主者。懇爲公田。歲藉其收。以備常用。臣願卽于苑中擇上腴之地。播五穀之種。謹耘耔之法。慎登穫之勤。每春種秋斂之。陛下順時乘輿。親省。彷彿畎畝。因行勞賜。一以奉國大事。一以勸民力農。穀成之後。擇其上者奉大祠。次者奉中小祠。各以御廩。付所由吏。粿劑粢品。悉量而取之。至于果蔬之細。皆須苑囿之植。外盡庶物。內將至誠。達其令芳。以介福祿。茲亦三代爲籍千畝。以事天地社稷山川先古。以爲醴酪粢盛之比也。其與物物仰市。煩褻神祇者。寧並日而言哉。

乞差當直兵士劄子

伏觀唐制。凡在京文武職官。自一品至九品。皆給防閑庶僕。州縣官僚。皆有白直執衣。今來外任自知州以下至簿尉。並給兵士散從。官承符手力之類。品位至卑。猶給七人名。雖不同。其于供身指使。猶用律文。白直執衣之法。國朝稽若古道。備衆官。惟在京臣僚僕從無準。竊見翰林學士及尙書丞郎兩省。給舍并待制以上。皆天子從官。並有呵引條制。其從人則學士每員差開封府散從官各三人。待制以上二人。別差諸軍剩員各三人。每員共得六人至五人。其剩員又多。是年老疾病。加以本營迂遠。每分番上下。尙只

得一人指使。非獨不任驅走。亦且虧替官儀。非所謂尊朝廷重臺閣也。欲望聖慈。下有司。將往代制度律令。比類今來官品。量添人數。又在京冗兵至衆。乞除元差散從官外。只于諸軍雜役兵士內。每員各給十人。以充當直。其剩員。卻乞放還本營。若上件官內。有差任三司羣牧使。御史中丞。知開封府。管勾三宮觀三班院。提舉在京諸司庫務。自有合給公人兵士者。更不兩給。庶其祇奉朝請。出入公門。辨堂陛之有差。免儀服之失體。定爲新制。庶協舊章。

乞毀棄元昊僭僞文移劄子

臣近者兩蒙中書奏傳聖旨。令與學士丁度等。同撰賜僭逆元昊答詔。及後來削奪。詔書聞各付外行下。臣竊惟元昊塞外小醜。世載兇狡。背恩忘義。屏棄人神。鷓鴣張以來。雖懦夫女子。皆欲拆篋奮挺。縛致都下。數罪梟首。以戒四夷。況服官在公之臣。何堪容忍。陛下天資仁恕。不嬰細忿。且以蚤虱瘙痒。非四肢之患。戢兵謹備。未令誅討。但設購賞。俾殲渠魁。蓋不欲疲人命也。自德音布發。士無愚智。莫不感恩怵德。知聖人之度。然臣伏思所降詔書賞格。已遍諸路。元昊自知罪重。固無革面懷音之志。必將妄作符令。吠堯詬天。傳入邊疆。污染民聽。又或許爲章表。緘置醜言。規避朝廷。冀傷威重。竊恐守塞將吏。不知忌諱。或得敵書。爭先啓聞。自謂有探伺之能。實非人臣所當言也。欲乞預勅邊吏。若得元昊章表。許先開視。凡僭僞文字。應有辭涉悖慢者。並須隨處焚毀。勿使騰布。除其間有入寇時月。及邀約部落之言。須合聞上者。止令抄錄大意。卽時馳奏。庶內外不瀆。以尊國防。臣忝備近班。理當申罄。涓埃之益。敢冀裁擇。

論蠲除雜稅劄子

臣草茅之姿。光華邁運。近承人乏。入倅計司。惟厥吏員。實掌民版。以一介鶩緩之質。閱四海征賦之益。徒爾首公。無所紓責。輒懷管穴。思報毫分。罔避嚴誅。仰干睿聽。臣聞立簡易之法。則民不惑。去因緣之姦。則吏無害。省簿領則要可舉。一賦稅則取有名。此皆治道之所繇。而歷世之無改也。臣竊見當今正稅之外。雜賦至繁。詭制異科。醜名暴斂。原其所自。由來甚邇。蓋自唐室解紐。五朝挺災。虜王僭侯。盜據方國。壞合徹之典。取一切之宜。培尅無厭。禁令自出。于是有身丁地頭之賦。農具牛皮之征。鬻酒則戶出麴錢。煮海則家增鹽價。雖與民更始。而弊制尙存。官司因循。憚于改作。故使堯舜之代。無桀貉之中。雖臣之愚。竊以爲過。今縱不能蕩滌橫賦。以寬民財。猶當釐易舊名。少近王道。臣愚以謂可取雜名稅錢。及派納之色。不移舊數。合爲一號。削去季世剝害之品。作爲我朝較畫之法。示之于民。則耳目易曉。委之于吏。則條貫難欺。錄于官曹。則文籍不煩。供乎財用。則稱謂差美。此舊人無秋毫之損。新規有指掌之易。丕變訛謬。垂于經常。實天下之幸。如允臣所見。乞下三司。令子細勘會。見今天下諸雜稅錢。外沿錢名目。貫百聞奏。然後取其實數。併爲一號。逐年折變。自從舊法。斯皆防患制法。遭時垂統者也。臣伏見國朝以來。詔數下而建條。比牒連名。充曹物府。煩科碎目。與日而滋。每罰一罪。斷一事。有司引用。皆連篇累牘。不能徧舉。率不數歲。則別加論次。謂之編勅。蓋欲條貫飭盡。綱目畢張。大可含元。細不容髮。而抵冒未絕。風流寢濫。一令之下。則姦生令表。一禁之設。則罪出禁先。示于人則若教誅。施于事則如素網。此皆不循其本而求之于末。

將欲措刑辟躋仁壽者。不亦難乎。夫恢恢有條。重而必罰者本也。事事曲制。輕而易犯者末也。本不舉則巨猾徼倖。末專任則細民罹災。今之詔條。病在于此。陛下幸加大惠。惜皇猷之未暢。深詔執事。精覈舊文。欲因盛時。遂定不律。臣以謂不一勞者不永逸。無遠慮者必近憂。今雖定之。後必復改。何則。制度不立。賢愚雜議。故也。爲之計者。莫若盡取見行詔勅。與律文相校。律有本條。而勅意小異者。則改而入律。律無本條。而名項別立者。則編而爲勅。況唐律之內。廢條已多。若擯去舊文。益作新例。亦前王損益之常也。人情不能無過。王道禁乎太察。其約束之煩語。官司之小禁。且一切蕩除。蓋去之不足害治體。存之徒以飾罪梯。法輕不能繩姦豪。文密足以汙良善。臣又聞王者之制。揭若日月。動如雷霆。其言易而文。其禁切而廣。伏見今之編勅者。繁長猥俗。與府縣文移無異。用字乖舛。遣辭重複。寧所謂明白溫醇之旨耶。實由不專任達識大儒。而多用執法之吏。夫法吏者。奉行其法可也。寧制法之人哉。古人有言。治國如治家。耕當問奴。織當問婢。今欲與法吏謀致治之本。是猶使奴織而婢耕。要其成功。不可得也。臣欲乞專委鴻博之老。及輔弼大臣。商較勅條。略依律文爲體。裁其辭句。第其輕重。約其義。明其文。布之四海。使識朝廷之尊。傳之萬世。俾知文雅之盛。自今以往。有臣庶上言。欲釐改舊法。建設條禁者。願陛下慎其俞旨。必先付之兩府。參之羣吏。若前條確見其短。今文率以爲便。可行于經久者。卽下兩制。令以所陳之狀。去其蕪雜。取其精意。倣古律令。著爲章程。若其事止苛文。不足發明利害者。皆寢而勿報。如此則法不數變。而民知所措矣。多言者必難。臣曰。今若依律令以爲勅。天下官吏。必不能曉。臣對曰。今天下所頒律令。曹局小吏猶能

引用則似律之勅。獨不能曉耶。此膠柱之論也。又必難臣曰。夫詔勅者。多先帝所定。而不當改作。臣對曰。凡詔勅之設。本臣庶上陳之見耳。寧一出先帝之口哉。況聖人以便利萬物爲至仁。不因循陳迹爲至孝。且太宗皇帝改建隆之勅。眞宗皇帝革興國之法。是皆可乎。此守株之談也。臣又聞事不師古。商典實譏。必也正名。魯堂攸訓。雖文質異尚。沿襲有宜。至于辨尊卑。分職業。其實一也。竊見國朝故事。自使相及左右僕射以上。出典州郡者。皆曰判。六尚書節度使以下者。皆曰知。蓋以謂僕射而上。品秩隆重。藩鎮之任。地望卑遠。故以尊臨卑者判其事。以小任大者知其職。及除佐官。則例曰同判之職。自京官以上。皆可任焉。今六尚書知州于上。京官判州于下。名旣不順。理亦無稽。而又朝廷之儀。臺省爲重。近緣苟且。寢失典刑。尚書都省尚書令之職也。今兩省五品以上。皆得權判。刑部流內銓。皆尚書侍郎之職。今或以知雜御史判銓事。或以升朝官判刑曹。其餘卿監之司。小官判者多矣。天下友邦大郡大臣。不得判。天臺帝省小臣得判之。是重諸侯之藩。而輕天子之吏。臣竊以爲過矣。又府史者。二人之名也。故自周禮至唐令。有其任者。皆曰府若干人。史若干人。今寺監見有其人。則併稱府史。此雖小吏。而名不師古。亦朝廷之所惜焉。幸陛下詔有司。按前典。認者正之。顛者序之而已。雖未能復治古之法。亦一時之制也。右臣所懷狂瞽。悉已條述。惟陛下裁幸。

元憲集卷三十二

答內降手詔垂詢西陲方略

答內降手詔

伏奉二月二十七日手詔。以僭逆元昊。阻命西鄙。令臣等細畫方略。並其實封進入者。仰承天旨。伏用震汗。臣等愚駑無狀。待罪宰府。聖恩含養。弗暴所疵。夙宵惟念。未獲小補。乃今羌狄小種。違背恩盟。輕爲風塵。穿盜邊塞。而將吏未習。烽徼弗明。轟然逆醜。遂稽天罰。此皆臣等謀猷疎暗。奉職不稱之咎也。陛下幸開大惠。不忍加誅。丁寧垂喻。俾悉其意。此誠謀及卿士。詢于芻蕘之成訓。然臣等旅服三事。義殊百辟。以謂中書門下政令之所出也。朝夕之所詢也。事無巨細。謀無遠邇。皆可罄率庸淺。日陳于前。隨宜置務。靡容有隱。不當更疴清問。始復條列。至于守禦方略之要。則與樞密院並可議定。餽運便宜之常。卽下三司轉運司。坐見虛實。凡所關啓。略可施行。此陛下之明悉也。雖使各述爾志。亦不出于茲矣。惟詔旨內深入討擊一事。臣等自來未敢輕議。非謂沮損威重。直以勢有輕重。時須進退。請試言之。夫中國之人。習見承平久矣。將不六十。不更金鼓戰陣之事。卒不五十。不經疆場馳鬪之役。齊民編戶。租稅之外。不知差調。率斂之勞。猝然有警。執不騷動。自劉平石元孫陷沒之後。邊防震擾。吏氣沮傷。奏報相銜。妄增敵數。或言四十萬。或稱三十萬。故敵未攻壘。先杜城門。寇已出界。尙求兵援。將帥庸懦。亦緣人情未嘗諳歷故也。今若

更責未習之將。驅嘗敗之兵。討已黠之敵。而希百勝之術。無功必矣。故臣等近者但乞本路修峻城堞。以遏奔衝。藉閱強壯。以擬緩急。速遣韓琦等馳至邊郡。采訪利病。補救頽敝。且爲今秋守禦之策。仍令紓放倚閣。緩責轉輸。綏撫西人。務令安堵。且亦申戒邊將。以時訓練。使寇去弗追。此上數事。雖皆老生常談。然當今守邊之策。未有易此者也。臣等又料狡寇情狀。必須再謀寇抄。欲乞諭緣邊守戍。因寇入境之際。或羸師以誘之。或伏險以邀之。或奇兵夜斫其營。或堅壁晝挫其銳。務據便地。勿與馳逐。俟其疲老。則倚角以斃之。如此一經創艾。則可以漸謀羈服矣。臣等熟計。莫便于此。至若臨機處置。應變弛張。一二之言。非可豫述。事至中覆。未爲後時。然敢不策發懇冥。以須期會。思有伐謀決勝。少報萬分。然後退就田里。誠無所恨。臣謹昧死上愚對。惟陛下幸察。

資政殿答手詔

臣等十六日蒙恩召見資政殿。面賜手詔一通。且以財用不給之端。仕進多門之弊。牧守將帥之未稱。西北隣敵之難防。躬形德音。徧詢列位。臣等以忝任丞宰。首膺延訪。伏讀聖訓。愧汗交流。何則。執政之官。與國同體。陟降四近。政靡不聞。參決萬機。言無所隱。雖或論議之深淺。裁處之否臧。未格大猷。仰煩宸算。至于罄盡庸識。條列事經。均憂共責。固以日陳于左右矣。今方特被天旨。更咨急務。此乃臣等奉職不稱之明效。而陛下至慈。藏疾之大恩。弗忍棄捐。尙令自效。夙夜慙震。弗遑寧處。然申命確切。靡容控讓。敢不略述綱要。以禱萬一。謹具條列于左方。

一聖詔曰。問者西陲禦備。天下釋騷。趣募冗兵。急調軍食。雖常賦有增。而用之不急。累歲于茲。公私匱乏者。臣等謂西事之役。首尾十年。毒始邊陲。募兵加賦。救急一時。蓋中國太平之民。遭強敵倉卒之變。勇者未及練。而督之戰。智者未及慮。而使之謀。故聚軍則惟恐不多。而忘養之之費。斂財則惟恐不盡。而忽繼之以難。又嘗跡農以隸邊。鑄鐵而爲幣。事多棄本。策罕要終。逮此平時。方見其害。此公私所以匱乏矣。今幸凶醜自斃。封略少安。四路雖有帥臣。重兵漸移內郡。緩徭節費。多所改張。陛下復采衆謀。思加大惠。以陝西小歉。及錢法鹽禁之弊。特遣仲簡。馳往撫存。付此二條。就詢利病。方總內外之論。別謹財賦之規。俟見所長。敢不悉心商榷。其冗兵料檢。開樞密院日亦講求。必有遠圖。以弭來患。

一聖詔曰。承平寢久。仕進多門。人浮政濫。員多闕少。滋長奔競。糜費廩祿者。臣聞欲影之正者。必端其表。欲流之潔者。必澄其源。此雖老生之常談。然實治道之要術。朝廷設官取士。固有成規。三年一開舉場。九品盡由銓選。其餘資蔭入仕。流外出身。或托附權臣。謂之門客。或因緣酬獎。不累年勞。攀例承恩。詭名希寵。人浮政濫。抑有由來。臣等謂取士者。政之表也。補吏者。官之源也。近歲舉人殿試。有老榜之目。但論舉數。無取藝能。釋褐雖被朝參。恩選已登暮齒。縱分職任。盡味廉隅。臣等欲乞將來科場。罷茲一事。又每歲百司人吏。出官甚衆。羣臣子弟。增年就祿。員多闕少。不得不然。今審官院流內銓例。許成資便令除替。雖守闕者。暫時爲利。罷任者。赴選益多。苟且因緣。不能盡舉。以上三事。欲乞各付所司。審加詳議。委中書門下裁酌以聞。如此施行。似堪經久。

一聖詔曰。牧守之職。以惠綏吾民。而罕聞奏最。將帥之任。以威服四夷。而艱于稱職。豈制度未立。不能變通于時。豈簡擢靡臻。不能勸勵于下耶。臣等竊觀舊史。欲治之主。未嘗不留意守令。以寧方內。慎求將帥。以清戎索。矧陛下乘至聖之德。御久安之世。靖民防患。孰先于此。謹按朝廷列郡四百。地踰前代。參建官吏。分督政條。其間知州。實匪輕選。大者則領以公相。次者則寄以從官。其餘遠邇。由卿郎官而下。莫不惟材是擇。考績序遷。一有踰遠。並從按劾。或降或罷。無所私焉。臣等謂選任之官。如此粗足。若欲人皆召杜。政必龔黃。質于前聞。恐難盡然。重內輕外。今古常情。臣等敢不更務采掄。審加勸沮。或申明約束。或廉察風謠。奏最之科。庶幾可復。然不得謂制度不立矣。若乃將帥之舉。宥密是司。國朝之規。名分難越。儻或奇材。拔于羣萃。勇略著于邊疆。任用之間。亦當公論。然不得謂簡擢不臻矣。

一聖詔曰。西北多故。敵情難常。獻奇譎空言者多。陳悠久實效者少。備豫不虞。理當先事者。臣竊以契丹結好四十餘年。厚幣至恩。淪于骨髓。邊民白首。不識干戈。此先帝所以遺于無窮。陛下所以守而不失。間者曩霄違負恩義。驚擾塞垣。虐用種人。旁結鄰敵。自知禍敗。還復首降。陛下愛惜生民。盡赦前罪。賜以府庫之餘幣。結以丹青之大信。懷音歸德。邊略乃安。雖王誅未加。而天罰遄及。梟凶狼噬。父子相殘。此二敵者。皆被國至仁。宜不敢自違信順。設有狂悖。終是外虞。但可嚴戒邊臣。常修戎備。守金湯之固。積糧廩之豐。持重如太山。不測如滄海。常使直在我而曲在彼。此聖人羈縻之術也。近聞議者多欲乘逆羌斃踏之會。遺孽孤弱之時。分割土疆。誘來部落。此乃奇譎空言之類。非悠久實效之言。深願聖慈。抑而勿聽。伺畿

取斷謀之未晚。臣等仰被清問。殊乏遠謀。粗略條陳。不敢文飾。陛下留神幸甚。

崇政殿與樞密院同答手詔

臣等今月十七日。伏蒙聖慈。召赴崇政殿。面賜手詔各一封。仍令中書樞密院一處商量對答。聞奏者。伏讀聖訓。震駭愚衷。退而詳研。稍分條目。乃知皇帝陛下。防危于慮表。求策于事先。鬱悼諄勤。徧咨良策。此誠聖人勞謙思治。博索廣詢。不以睿哲掩尋常之謀。不以高深辭淺近之益。雖舜好問。禹拜言。無以過此。奚獨臣等幸甚。抑亦天下幸甚。然臣等預聞幾事。皆忝近司。自去歲春陛下有祕殿疇咨之勞。迎陽敷納之廣。是時中書樞密院。亦各條對急政。尋會面論。以謂兩府者。佐天子決大政。總四海謀議。評百官能否。或片言可以防患。或寸效可以佐時。凡有見聞。便當裁處。不須承命。然後告猷。而宸旨丁寧。辭不獲免。靦顏待罪。粗述大綱。雖荷天地包荒之仁。終慙股肱同體之美。今者再煩清問。是重前尤。既不敢固拒詔音。仍且許協陳公論。銜恩被貸。無可寘言。敢不悉心。同上愚對。謹按聖詔大略。以今契丹因我西征之役。遣使來告。深慮狡黠。別有邀求。詭譎多途。作何回答。臣等竊謂契丹之性。雖不可以禮法爲期待。文辭爲約束。見利則動。緣問則爭。固其常態。至于向背之勞逸。利害之重輕。雖曰匪人。亦將有擇。契丹自景德通好。垂五十年。冠蓋相望于歲時。金繒沓委于幽朔。戎馬不汗。而坐收厚利。邊烽不焰。而自稱鄰國。彼若常保此誓。可謂逸而不勞。常獲所資。可謂利而無害。今或自違信順。妄作端倪。心欲渝盟。以圖入寇。是則部落蒙調發之苦。蕃兵須賞餌之科。穿塞必有矢石勝負之憂。掠野不過牛羊廩窳之獲。我若堅壁以持重。蓄

力以待疲。去則勿追。來則固守。但恐彼之所獲。不復有五十萬之數矣。捨交聘。就戰鬪。則倖逸而向勞。絕歲輸。謀掠奪。則利輕而害重。果從此舉。是謂無謀。況今特聘之來。未失睦鄰之意。且西北構釁。邊境具知。既議出師。固當通問。昔歲高麗之役。近年河西之行。皆遣使人。實爲成例。未聞前來兩次。別有他求。兼契丹常作大言。欲平西夏。今若乞財助費。便爲示弱于人。遙揣敵情。恐無此理。萬一狂狡。實有過言。則對答之間。誓書可復。彼曲我直。何懼無辭。然必望朝廷且鎮之以靜。淺謀橫議。抑而未行。聖意又慮詐報西行。陰爲南顧。則山川地形。甚處可爲控扼。臣等竊以自來河北河東兩路。各有控制。走集之地。救應邊陲之所。只緣保守信誓。不敢明作改張。必使北人。便違舊約。則可勅此兩路。馳按邊屯。或展塘水。以扼兵衝。或築軍城。以遮敵路。塹山堙谷。何所不爲。樹帥分兵。惟變所適。事至而應。亦匪後時。聖意又念方面輔翊之材。帥領偏裨之舉。或難于自薦。或須藉衆推。威禦綏寧。堪爲鎮靜者。臣等以謂將帥之器。非獨今世所難得。威禦之略。顧亦前代所希逢。然自古聖帝明王。選才擢士。未有借賢于既往。待俊于將來。必以一世之人。治一世之事。不可謂將無韓白。而廢軍帥。吏非龔黃。而去守宰。顧其策勵獎育。任使之術。何如耳。苟得其道。胡恤乏才。若能賞不過功。罰必當罪。卜無姑息之施。下無僥倖之求。則雖懦夫。可使握節以制軍。女子可使攘袂而赴敵。又況擇材武之長。用訓練之師哉。大法一行。則賢者不得藏其謀。何煩于自薦。智者有以申其用。何待于衆推。而綏寧鎮禦之方。惟所使矣。聖意又念河朔軫救之外。軍儲闕乏。及向去財用。如何省節。加以冗兵尙衆。戰馬未孳。發于焦勞。並令周悉。臣等伏以冀部不幸。決盜爲災。中路州軍。例遭

湮沒。此則非緣他故。專爲河防。民戶旣以流亡。田畝未能耕藝。且可恣其所往。以就廣饒。所在撫綏。庶幾存活。議者多欲使州縣出粟。以救其命。虛倉舖餒。誠是深仁。連營乏儲。更非小事。欲乞嚴勅三司。及安撫轉運等使。凡係本路浮費。且令一切罷之。專以調食爲先。次以安民爲急。若向去秋夏西路豐登。必有餘波。可蘇疲衆。至如冗兵一事。最是減費大端。近日雖累降指揮。並令揀退。天下剩員萬數。亦已別行催督。其餘條貫。敢不申明。此則較向所用省節之矣。若乃戰馬登耗。事存監牧。然自昔生馬之地。今皆不屬中州。惟藉四夷。與官互市。切聞邊關未嘗肯出名駒。徒費財珍。例多驚劣。其源若此。爲弊實深。自餘坊監官司。華戎貿易。更乞下羣牧制置使。多爲條約。以量價直。重明賞罰。以督蕃孳。常或舉修。亦恐可登舊數。然臣等今來所陳以上數事。卽是日夕奉行。行而復言。理不踰此。竊恐衆臣議論。別有所長。欲望聖慈。盡取將相學士以下對詔之文。降付中書樞密院。商量行遣。匪徒逃尸素之責。固亦合中外之謀。天下至公。于此爲美。惟陛下留神裁幸。

答手詔

伏奉手詔。以元昊未平。邊防用武。上煩聖慮。諮及具臣。竊以元昊旅拒偷生。巢穴深固。若或與師出境。必須命將得人。又緣承平以來。久無征伐。縱有驍勇之士。皆非縣歷之流。況復饋運之間。勞費斯甚。陝西民力。配率已繁。更或隨軍。愈難應副。且當靜守。頗謂得宜。今來邊臣。例循舊轍。靡營禦寇之策。但急濟師之言。須立定規。俾從經久。緣邊州郡。皆有熟戶蕃兵。不能訓齊。但務姑息。雖有弓箭手人數甚衆。其如部伍

未明。至于本城蕃落定功之類。亦未嚴整。凡所防托。悉藉正軍。是致調發之煩。不無科率之困。復有多立小寨。例蓄糧儲。無事則兵勢虛分。臨敵則不能自固。奔衝掩襲。職此之由。所宜委自轉運使與逐州長吏。量其戶口籍定土兵。每至農閒。輪番教閱。仍選勇敢有部轄之人。充等第將校。其熟戶蕃兵。亦須點集齊整。檢括人數。與本城及弓箭手。每臨陣敵。前後節次使用。所有敵兵出入道路。合行把截去處。並可展置大寨。令弓箭手與本城兵士守把。其諸小寨。不可廢去者。量留側近土兵看守探候。不得廣積糧草。所有朝廷差去禁軍。只委自部署鈐轄。路分臣僚。相度敵勢。遠近策應。如此則固守有常。東兵可減。蓋資其土人。服習道路。彼中每有點集。易爲探候。自免奔衝。而又兵籍素定。經費有涯。轉餉之勞。漸可撙節。自來每招役蕃戶。耗蠹頗多。主帥但納其虛言。臨陣恐成于悞事。今後不須枉用金帛。更有招收。其逐州長吏。能訓練兵師。修完戰備。膽勇材幹。爲人所稱。朝廷當與保全。不責小過。歲滿成績。增秩再畱。使之恩信及人。用明獎激。臣等素不知兵。叨居近列。欽承睿問。莫副天心。無任戰懼之至。

元憲集卷三十三

行狀

宋故推誠翊戴功臣彰武軍節度延州管內觀察處置等使金紫光祿大夫檢校太傅使持節都督延州諸軍事延州刺史兼御史大夫上柱國武威郡開國公食邑六千五百戶食實封一千六百戶贈侍中曹公行狀

曾祖業。累贈太師尚書令兼中書令。追封榮國公。祖芸。累贈開府儀同三司。太師尚書令。諡武惠。追封越國公。

父彬。故樞密使。累贈開府儀同三司。太師尚書令。諡武惠。追封魯王。

真定府靈壽縣某鄉某里曹瑋。字寶臣。年五十八。

公之先本出晉清河太守泓之後。泓卒。子孫貫其郡。後徙真定之靈壽。今又爲其邑人。高曾值唐室之騷。皆以才力事州爲列校。忠規雄算。屈于地勢。故二祖閱閣不章于王朝。逮魯武惠王之興。功蓋盟府。擁旄服袞。綢繆累聖。率義而上。追賁烜赫。王又重之以勞謙明德。保躬不伐。歿從太丞。爲宋宗臣。使今天下言諸侯王世家者。以曹爲首。公卽王之第四子。性英壯。沈決。形于羈卯。武惠節制鄆徐也。竝奏署公爲天平武寧二軍牙內都虞候。以恩換西頭供奉官。閣門祇候。叛羌李繼遷擾靈夏。太宗畱意邊瑣將屯之臣。時

武惠冠領內樞。面奉詔舉材堪西事者。久之啓上曰。知人不易。朝廷雖多士。臣未見其能。臣有子某。好謀而斷。謂堪試用。太宗喜王之內舉。卽日召見。欲命公以諸使。王固辭。召以本職。同知渭州。時年十九。迎者驚其壯。真宗嗣極。就改內殿崇班。咸平二年。正領州事。俄丁先王憂。以守邊不得歸。及葬。自請還喪。廬畢。劬勞之報。書數上。辭情哀切。朝廷念繼遷旅距。又公治最已顯。詔不聽。卽拜閣門通事舍人。頃之加本州屯田制置使。轉西上閣門副使。徙知鎮戎軍。繼遷虐用諸帳人。不堪命。朝恩購募安輯。所以慰納之良厚。吏多不能奉揚威德。公至部。則騰檄區落。告以丹青之信。戎人得詔書。皆泣下。由是喀努羌舉族內附。繼遷兵討西涼諸姓。還次石門川。公率軍邀敗之。多所俘馘。威震夷鄙。自爾黠寇往來。不敢近當路塞。軍境平易。無扼束。利于馳突。又邊民挾弓矢。應募爲官軍。每有警。則輒爲前鋒。而官無資糧器械之費。公因奏言。請竝隴山而東。循古長城。剏大壕。以隔敵騎。給境內閒田。復賦役。夏秋出戍卒。護民耕穫。以賞義兵。制皆曰可。迄今奉行爲故事。時繼遷死。餘燼衰破。子德明畏誅。奉獻計不堅定。公請出師討之。上以德明首鼠兩端。且諭公以待其變。俄而揚珠瑪哈等族萬餘落。款闕順化。竝乞師應接。將吏疑怖。欲弗許。公獨決策。夜將兵逼天都山。信宿盡擁其衆歸。因是諸小種皆納質保塞。值德明亦輸貢受爵土。而公名寢重矣。驛書召還。錄前後功。正其使名。充邠寧環慶路駐泊兵馬都鈐轄。俄又命兼知邠州。封禪恩。進使東閣。帝以公著效西土。更欲以名震北道。大中祥符三年。卽使號領高州刺史。徙爲眞定府定州路兵馬都鈐轄。又出公所上涇原環慶兩路邊州圖。以示轉臣曰。山川華戎城郭儲峙之要。盡在是矣。可別繪爲二。一畱

樞密院。一付本路使。按圖以從事。因嘉歎久之。歲中復徙涇原路兵馬都鈐轄。兼知渭州。西祀恩。遷四方館使。札瑪克部大入。數爲寇害。四年夏。公勒兵與大將支軍出武延。鹹泊川。合擊破之。捕斬首虜數百。奪甲鎧駝馬牛羊居多。上書讓州事。願專督兵要。密詔不許。五原外界有巴勒臧族。屢違王命。公因按塞夜襲之。殲其衆。厥後屬國羌無敢叛者。乃謂補百帳以上會長號本族軍主。次日指揮使。以擬王臣部曲之官。七年冬。西南諸戎解仇伺便。欲穿塞爲盜。特遷公引進使。再留州任。以防遏之。先是隴外有棄地號籠竿川。恒爲兵衝。州無外蔽。公按形勝築城以鎮之。自是寇無踰心。而我有重關矣。明年春。復與大將陳興等討札瑪克餘黨。滅之。未幾。改領英州刺史。充本州團練使。秦州宗噶爾人李遵。挾置勒斯賚爲之謀主。裁制種落。號爲文法。衆十餘萬。雄長塞外。遵因獻方物。求贊普之號。用詔拜爲保順軍節度使。以羈縻之。然凶狡恣睢。專趨邊隙。乃使其舅賞雲丹。說義從羌郭蘇達勒。謀爲鄉導。公知之。許蘇達勒以重賞。使圖雲丹。後十餘日。斬其首。旣而前預謀者皆逃怖伏匿。公誘召之。許輸物贖罪。是歲入塞者數千人。因其效牽。量賜繒綵。或以少爲訴者。公怒曰。此紆死物。猶希利耶。叱左右逐出之。諸部震恐。郭蘇達勒割南市城以獻。公請因其入地。竝酬殺雲丹之功。乃拜爲順州刺史。是時斥地寢遠。因增築弓門至威遠。凡十寨。浚隍三百八十里。列亭障。繕橋梁。屬于州門。皆戍兵餘功。民不知役。繆詔褒寵焉。俄丁內艱。上以雲麾將軍奪服。初。戎人有殺王民者。率以戎法入羊馬償其家。邊人愁苦。公下令曰。戎人自相犯從其俗。犯華人論如律。于是蕃渠斂手。而民有更生之賴。置勒斯賚乘諸豪未安。因率衆號十萬。脅餘黨寇三都谷。公率兵

迎擊破之。斬首千餘級。獲馬牛雜畜器仗三萬。計逐北至沙州乃還。改客省使領康州刺史。充本州防禦使。及加秦州部署。充涇原路安撫使。天禧元年春。宗噶爾人復使其將馬布札爾屯野吳谷。公夜遣壯士。鏖其營。獲人馬甚衆。戎師潰。是歲州民狀保鄆鎮靖之迹。聞于朝。願刊石頌功。以信不朽。天子手筆褒諭。古哩羌恃衆逼塞。歷年招撫。無內屬意。公潛師襲其廬滅之。渭川河州諸羌皆惶恐請降。置勒斯賚知外。援衰落。于是竄還故地。俄被召歸。燕見勞問。恩禮蕃渥。三年復拜華州刺史。充本州觀察使。鄜延路駐泊馬步軍副都部署。環慶路緣邊巡檢安撫使。慶州羌烏爾勤郭勒敏特你等族千餘落。詣吏歸款。因撫之。使爲外禦。邊路益安。四年春正月。崇拜宣徽北院使。鎮國軍節度觀察留後。簽署樞密院事。是秋忠愍寇公譎道州。嫉正者指公爲黨。改使南院。以留後機務出爲環慶路駐泊馬步軍都部署。兼安撫使。乾興元年春。落南院使。降爲容州觀察使。知萊州。冬。改授華州觀察使。知青州。天聖三年春。進領彰化軍節度觀察留後。徙知天雄軍。戎聘歲道北門。素稔公威望。至飲餞郊勞。皆曲拳畏慄。不敢仰視。俄奉詔修覲。徙知永興軍。未上道。拜昭武軍節度使。加賜褒功之號。復鎮全魏。踰葦感耀羸之疾。輒抗表願治河陽三城。以便頤養。兩宮優答。俞請疾少間。議者以威名大臣。不宜處閒外。裁數月。徙充眞定府定州路駐泊馬步軍都部署。七年改彰武軍節度使。部署如故。明年正月丁卯。薨于位。訃聞。帝震悼。不視朝兩日。以侍中印綬。延賞歸賻。躡常等由公始終踐歷。一出于功名者歟。夫人潘氏。追號馮掖郡夫人。後夫人沈氏。號吳興郡夫人。諸昆曰。察殿前都指揮使忠武軍節度使。累贈太師。曰。璉。終義成軍衙內都指揮使。曰。翊。至昭宣。

使恩州團練使諸弟曰玆。至西京左藏庫副使曰玘。尙書虞部員外郎。以椒房之親。累贈太師中書令。曰珣。至東上閣門使宜州刺史曰琮。今爲同州觀察使。三子長曰儋。禮賓副使。曰倚。內殿崇班。早卒。曰僕。供備庫副使。一女適今西上閣門副使王德基。公端誠壯猷。不勉而立。知兵好古。虛己下士。周旋抑畏。皆得先王之風。結髮乘障。至剖符握節。出入二紀。至于威信所治。郡兵不敢虐民。民不知有兵。功纖芥必賞。罪秋毫不貸。故士皆勸能盡力。而爲之用。乘機討貳。數與敵角。隨衆寡必以捷聞。自國初以來。扞西夏者。皆無公比。智數纖敏。應機輒會。嘗奕棊便坐。外有白羣兵叛入戎者。左右貽愕。公據枰算勝。徐曰。是吾使之爲。諜勿復白。不數日亡卒俱爲敵所殺。其奪謀制變類此。在秦州民多田訟。窮治之。皆不能舉其契。公知其罔冒。因訴亡官記。而自前者除其罪。得脫戶千六百。賦錢四百萬。亟以疏聞。朝議頒下州縣。遂爲常制。持重示信。不以小仁妨大慈。營兵當誅。值公疾之革。親近者乞少寬假。以資休祚。公曰。刑所以一衆弭亂。安可以吾區區之病。欲替王法耶。使法替病紓。吾罪大矣。遽索筆署以殊死。議者比古孫吳。而達生死過之。惜其中登皇樞。未易歲次。遭罹巧中。政輟善還。使文武之憲。弗及究于天下。晚鎮常趙。痾瘵寢劇。每嗟燕薊之地。淪胥敵境。願得一銘燕然。值時戢兵。卒與志謬。齋恨沒地。可勝愴耶。然而纂服濟美。都高牙齋鉞之重。威稜被于殊俗。功業見于本朝。易師之丈人。詩王之爪牙。公兼得焉。亦足以暴于夷夏矣。初公之捐館也。卜葬不吉。歲在己卯。諸孤屬圖襄事。天子聞之。特詔鴻臚持節有司。具本品鹵簿。以須其引。今日月有期矣。飾終二品。具于官閤。易名節惠。請循令典。謹狀。

故樞密副使朝奉大夫給事中柱國天水郡開國侯食邑一千三百戶食實封二百戶賜紫金魚袋

贈尚書吏部侍郎天水姜公行狀

曾祖道黃不仕贈太子少保

祖頰不仕贈太子少保

父詔仕太子少保右贊善大夫累贈太子少師

淄川長山縣開善鄉青丘里姜遵字從式年六十八

公之先本齊姓漢以豪傑徙天水後復貫淄右今爲郡人焉公幼岐嶷長而沈毅初肆業治百家之言深博自將文藻足用旣與鄉物有聲于齊魯間屢挾策于宗司以經濟自任咸平三年眞宗始御軒陛延髦秀公以進士擢第明年調登州蓬萊尉治有風力郡將貪其幹用奏請就補本州理曹掾朝廷報可未幾丁內艱免憂闋都銓舉充開封府右軍巡院判官京穀浩穰獄市居天下劇爲吏者罕能以課自脫公至則勵直氣探情僞厥職修舉廷無留事二囚自誣棄市罪獄將具矣公微得冤狀翻其文致先是雪冤有賞公慮傷前主者寢不自列祥符初秩滿遷大理寺丞建封恩例改殿中丞出知吉州廬陵縣氓籍數萬氣俗荒蕪左言閔貌以久訟爲健公威克明斷摧破姦黨據案一決吏民厭伏汾陰禮畢就改太常博士得代歸闕時故相天官王公在西掖熟公治行卽薦公宜幹抨彈察視之任有詔換監察御史八年以勞遷殿中充開封府判官賜五品服吉守高惠連誣構公廬陵舊事奏請逮訊公聞命不疚馳往對辨左驗

明白訖無污穢。還臺以本官同判延安郡。天禧三年召還遷侍御史。判三司戶部勾院。俄出爲陝梓利夔等路體量安撫。先時公舉奏山東大姓奸利事。至是皆伏法。天子以公建白有狀。未復命卽拜尙書工部郎中。非常例也。還節出知邢州。今上卽位就轉刑部。移守于滑。俄充京東路轉運使。天聖元年換京西路。不旬日召以本官兼侍御史知雜事。加賜金紫。受詔詳錄計省逋負之籍。科別蠲貸。明年遂以本官充三司戶部副使。三年改兵部。遂歷副度支鹽鐵二使務。俄攝太僕卿。充北朝正旦國信使。四年冬拜右諫議大夫。知永興軍。六年春驛召以本官充樞密副使。七年遷給事中。八年秋感疾請告。兩宮馳親使挾太醫相望于路。存神省慮。形于慰勉。九月乙丑車駕親視臥內。賜白金三千兩。丙寅薨于坊第之正寢。上聞震悼。復趣駕臨弔。制贈尙書吏部侍郎。法賻所須。率在優等。夫人路氏。國子博士從古之女。封平陽郡夫人。公三子。長曰居正。舉進士。早夭。次曰延齡。太常寺太祝。次曰餘慶。未仕。孫三人。曰承顏。試將作監主簿。曰正顏。齊顏。及遺奏之上。延齡改大理評事。餘慶授太常寺奉禮郎。正顏齊顏竝秘書省校書郎。外孫宿拱之。補三班奉職。哀榮之數。存歿之恩。篤矣。公天資方重。內孝而外嚴。家庭之內。有若官府。性長于吏事。濟之以忠力。未嘗阿意當世。故所莅必震肅。所言多指切。前後進用。皆上所自知。又感昔人削藁納誨之箴。問樹漏言之誠。故闔臺奏議。樞機密勿。言天下事甚衆。世莫得而知云。惜乎。參基命之司。歲律未幾。遠猷熙綽。弗克究公之素。寒暑興沴。棟梁其萎。然可謂雄駿之寶臣。黃中之元吉者已。謹狀。

元憲集卷三十四

墓誌銘

宋故推誠翊戴功臣彰武軍節度延州管内觀察處置等使金紫光祿大夫檢校太傅使持節都督延州諸軍事延州刺史兼御史大夫上柱國武威郡開國公食邑六千五百戶食實封一千六百戶贈侍中曹公墓誌銘

宋有忠勳之臣曰武威曹公。在天聖中。以宿將持節分督河北軍事。屯中山。庚午春正月丁卯。寢疾薨于位。壽五十八。訃聞。天子震悼。不視崇德朝兩日。以黃門監璽書告第。走命中謁者護其柩還京師。後九年。寶元之己卯。其孤等始以龜筮之吉。歸窆封樹。有詔鴻臚亞卿典喪事。奉常易其名曰武穆。冬十月乙酉。具鹵薄鼓吹。葬公及其嫡孀掖夫人潘氏于南洛陽之金谷鄉尹村原。從大墓且言順也。先是其家合官牒世譜以狀咨史氏。請辭刻石。讓不遂。乃紉而紱焉。公諱瑋。字寶臣。其先晉有清河太守泓。去官寄孥。始爲郡姓。後裔再徙。占數真定之靈壽。曾祖諱業。祖諱芸。竝遭時俶擾。仕本州爲牙門大校職。以世及功緣地徧陰邁德美。儲爲慶靈。以至烈考樞密使累贈太師尚書令諡武惠諱彬。以明允篤誠。道參運始。禽吳越蜀。助平天下。翊亮三聖。卒爲元老。諗謀帷幄。溢動旂常。生極師臣之尊。沒從大享之配。顯揚追賁。爲時第一。逮公之克濟世美。及昆弟宗門之貴。交荷恤典。叢于先報。故今繇祖而上。皆贈太師尚書令。又封會

祖于榮。大父于越。俱爲國公。曾祖妣張氏。祖妣李氏。皆累封齊韓二國太夫人。禰廟。自始薨飾以濟陽郡。再易冀魯。竝爲眞王。妣高氏及二劉氏。又別以秦齊陳三國爲湯沐。公卽武惠王之第四子也。承是休烈。生而岐嶷。童齠英發。雅爲先王所器。至道初。以任爲西頭供奉官。閣門祗候。黨項餘種。李繼遷盜弄朔方。兵穿塞首鼠。強吏不能制。時武惠握機政。太宗面訪雄俊。以置邊瑣。久之。輒以公應詔。帝喜曰。卿有祁午安。遑遑更索耶。卽日召見。命有司加顯秩。以俟遣。武惠固辭。及以本職試守隴西郡。年甫十九。公自以見知于父子之際。又爲明主所適拔。感激忠孝。遂據才蘊。由廷臣凡八遷。至客省使。其間帶高英。康三州。刺史。團練。防禦使。各一。洊領華州。一降容州。皆爲觀察使。進主鎮國。彰化二軍節度。觀察留後。昭武。彰武。兩軍節度使。其化條所莅。則戍鎮戎軍。守渭邠。秦。萊。青。天。雄。孟。堯。七藩。而渭。天。雄。皆再。其瑞璋之總。則環慶。眞定。涇原。三路。皆爲兵馬都鈐轄。鄜。延。路。爲副都部署。環慶。眞定。兩路。竝爲都部署。國論所咨。則領宣徽。南北院使。署樞密院事。命秩之備。則階三品。勳二品。視官帝傅。兼亞丞相。書社六千三百。實幹一千六百。以四字爲功號。烜赫光耀。冠映侯籍。迹公之策名展體。服勞中外。爲國方召。多本西略。初繼遷逋誅。寢久劫羣羌爲支輔。苛征暴戮。人思自拔。公之扞蕭關也。盡條恩詔。綏懷之意。以檄諸部。部人得書。皆東向感泣。或率衆內屬。對黨始離。寇略河湟。諸戎歸重。弗戒。公短兵鏖石門川上。狡衆殲殲。趙德明初喪。凶。有首罪稱藩之請。公以天厭餘孽。宜時平蕩。願帥一隊。縛豎子以釁鼓。驛書言狀。慮密計周。時朝議前已許降。謀弗果用。揚珠瑪哈之族。合萬餘落。乞援內徙。諸將惶惑。未知所受。公獨撫其使。自將勁騎薄天都山。

凡三日。盡擁其衆。按道徐還。中外服其勇。再守渭也。古哩羌寇掠不已。公率所部合支軍趣武延。鹹泊川。鼓行夾擊。諸帳皆潰。係牛繫馬以萬計。遂破滅之。又襲叛姓巴勒臧于平涼。剪其巢窟。自是屬國者倚漢與天等矣。鎮天水也。值置勒斯賚初盛。挾李遵妖妄。自謂吐蕃貴重。當雄西域。稍并他部。恣睢塞外。遵乃傍緣故事。上書求贊普之號。公密疏以春秋許外夷者不一而足。今二羌烏合。而所希無法。宜黜桀鷔。以尊國防。真宗納焉。但授遵保順節度制。後果窺伺邊隙。包藏禍心。迫脅小種。扇動豪帥。連營方陣。號稱十萬。乘虛內壘。浸淫于三都之谷。公率軍整旅。背城逆戰。斬首千級。獲利器雜畜三萬。計追北至敦煌。驍將馬布札爾恥敗。負力復屯野吳。公遣死士數百。夜擣其壘。自相蹂躪。羣醜遂奔。古哩羌陰謀累年。規敗疆事。先其未發。掃平廬棚。因是西南諸姓。皆納款轅門。遵賚震怖。遁還故磧。不敢彎弓而取當。此式遏制勝之大較。故事邊民挾弓矢。皆應募爲奔命。鬪勞賞薄。人情弗愜。公建言能墾境上曠土者。蠲其租。春秋耕斂。出州兵以護作。而戰者忘死矣。渠率內屬。恩隆無等。公請百帳以上。比古帕主。次比營司馬。贊書。拜授列爲王官。而來者知勸矣。黠羌殺人。輒以羊馬自贖。公按律令除其弊。犯華人者論殺之。餘從其俗。而刑無頗矣。秦人田訟。彌歲不解。曹吏投隙。竄易版書。公審其宿姪。一取質劑爲驗。亡契者貸其負。使得自占。收脫戶千六百。租錢四百萬。臺符宣告州郡。以爲後式。而文無害矣。此威懷安利之凡最。若其按秦漢舊迹。因長城之塹。稍築塢堞。以殊內外。斥境千里。建籠竿之壁。列弓門十寨。迭爲藩蔽。班賞格。飾關具。繕梁表道。屯田足食。迄今爲保障之利者。不可悉紀。公之在關隴。以威名莊重。淵回山立。累功懋賞。皆卽拜稍。

遷倚而不召者。歲踰二紀。至于丁外內艱。泣血委印綬。率以墨綬奪服。天禧中始有下邳觀風之拜。猶副戎柄。時三陲寧晏。外虞訖息。僉以公壯猷盛烈。當敷及天下。于是有留使宣猷之授。入筦樞極。公既踐修世範。知無不爲。秉義據正。勤勞夙夜。海內抗頌。歸縑衣之美。終以助高地偏。更由總管之任。出臨西夏。讒黨乘勝。又以容山之拜。徙守東藩。聖上始初清明。誅放儉狷。不俟辯謗。寢還舊物。奠營丘。藩全魏。養疾明律。興護北方。再陟齋壇。終屏王室。洪稜勁節。久而彌厲。方且桓圭阜馬。蚡來朝之儀。彤弓彫戈。將蕃錫之典。昊天不弔。殲良奄及。此哲侯所以深聞。擊之悼。邦人所以寄成。蹊之泣者已。嗚呼公之材之劬。本沈雄而施事幹。然承藉先訓。濟之謙慤。保功約己。未嘗有過。臨政精悍。不獨以軍旅從事。故數佩州組。皆以最聞。大指道威。信必賞罰。以軍之嚴。移于郡。則肅然畏。以郡之愛。移于軍。則薰然和。伍符吏牘。參行不愆。古名將之憚。公優爲之。前後褒勤。賞捷受方。底書以數十。若其詢逮兵策。則寶跗細劄。委曲纖悉。甚者手詔往反。如宣帝問後將軍故事。決而後已。在常趙感疹方革。營卒以常過干軍禁。左右勸寬其罰。公曰。以病易守。非吾節也。卒置殊死。故公之約。所守如介石。公之重。所至爲長城。言料敵則焯龜。語應變則奏刀。用能英聲茂績。超蓋前代。行均椒蘭之芬。威無藜藿之采。有由然也。論者猶以羌渾右鄙。事微敵脆。不足暢桓桓之舉。晚睨幽朔。悲歌慷慨。常謂禪姑衍銘燕然者。復何人哉。時方弭兵。公亦齋志。此又謀夫壯士。擊劍長懷而不能已也。繼室曰沈氏。今號吳興郡夫人。故相僕射倫之孫。光祿少卿繼宗之女。三子長曰億。任禮賓副使。次曰倚。終內殿崇班。曰僕。爲供備庫副使。噫。門閥隆貴。蟬聯魚貫。以功名世家者。今無偶矣。

游談故老。尙將傳而不泯。又況圖金刻。期陵岸。則公之終譽。其有既乎。銘曰。巖巖常山。靈氣磅礴。值爲豪英。拔秀遼廓。沈沈侍中。實本渾熊。纂服肖善。自箕而弓。武惠知子。獻之天辰。弗啻家寶。用參國器。黨項猖狂。擾宋西疆。公冠未升。戍于秦涼。治兵刺部。或征或撫。游魂殘孽。莫敢余侮。婪婪大酋。交兵結仇。率爾蕃部。搏我邊州。公計先定。聊秉武節。螳臂蛙跗。卒染車轍。蕃族震擗。款塞就羈。滅烽臥龍。帝曰來歸。計功酬績。大使方伯。乃幹鴻樞。柔惠正直。間因讒人。旋陟舊勳。三偃大藩。再帥中軍。屏于北道。威聲偃草。公侯干城。宜壽宜考。耳順未踰。與世長違。徹我金湯。帝曰予思。貂厥衰極。哀榮竝至。寵葬周原。陪先洛涘。儼畫柳兮。彷徨。公將僚兮。幽堂。惟松楸兮。嗣世。尙橋梓于家王。

故朝奉郎守尙書駕部員外郎上輕車都尉賜緋魚袋濟陽江府君墓誌銘

昔班固稱西都英雋之域。黻冕所興。議者以爲一時之夸辭。過矣。蓋京師樹首善以倡天下。擁太和以陶民性。若堯土之俗多憂思。舜野之器無苦窳。遷善成教。不知其然。則中州人物之華。常卓犖于諸夏。固其宜矣。雍丘爲左畿大邑。氣俗尤厚。士之挾經術由鄉校脫野巾而襲朝組者。視寰內不若也。其間尙書郎濟陽江君諱日新字仲元。又章章者與。君端拱初。以明經登科。調補陵州。始建尉由外臺陟狀。就除成都司法參軍。入爲大理寺法直。滿歲改評事。出知曹州。濟陰縣轉運使。河東薛公嘆上其課最。就徙同判撫州。摘姦卹隱。示歸厚之法。其後吏民多奉行江君故事。就轉國子監丞。眞宗嚮明改丞大理。秩滿除太子洗馬。同判鄜州。咸平初。匈奴未賓。侵敗邊略。天子念兩河之棘。特詔有司。選中朝臣有風績明劭。知下疾

苦者不問其位。付使節以安輯之。時君適自鄜歸。繇是以春官五品領河北安撫採訪之任。疆場方駭。政
靡事易。農不狎野。吏或失官。輅車所經。輒振其弊。使還論奏。上皆俞可。俄除同判并州。會平原守王用和
治迹無狀。爲使司所劾。奉辭之曰。面改知德州。遷殿中丞。賜緋魚。至州。建言城小不足以扞寇。願率衆力
而侈大之。朝嘉厥謀。民亦肯勸。樓堞未備。戎入其郊。時趙魏諸強藩。皆堅壁自完。不內細弱。惟平原虛城
納衆。料丁壯以操戰具。開東西門。使士易服出入。晝夜不絕。敵衆憚之。被圍三旬。守有餘力。凡獲馬口甲
胄以千數。獻于行在。民賴保障者數十萬人。上錄其勳。改國子博士。俄丁父憂。有詔奪情。復攝郡事。秩滿
吏民守闕。願復借君一年。故歷四朞而得代。還朝。除濮汝壽三州。不拜。上書願治邊郡。會邊瑣無缺。守遂
同判真定府。改尙書虞部員外郎。府帥滕文襲木強少文。條教自任。君數援吏法以裁正之。乃挾刑獄。使
陳綱翟繼恩奏君以當官失和。傳致疑狀。朝廷下其章于本路計使以辨之。君具陳所諍。皆公言。他毋纖
芥。由是陳翟俱得罪。移君同判大名府。又移邠州。序遷比部員外郎。太夫人在堂。表乞就養。俄除知扶溝
縣。數月復移同判齊州。轉駕部員外郎。自陳翟之誣。爲居中者所惡。數易官守。將逞憾于君。君自以婞直
多忤。不容于世。乃以末疾自劾免。時長子爲尉氏主簿。遂往就焉。痾瘵寢加。以大中祥符六年四月二十
八日啓手足于牖下。春秋五十七。曾王父瓊。烈考延濬。潛德不仕。教忠詒法。逮君之顯。贈其禰爲水部員
外郎。母李氏。敍封隆平縣太君。初娶富春孫氏。繼室以汝南周氏。封內鄉縣君。後君三歲而卒。五子曰中
古。進士擢第爲綿州從事。曰中和。守家學爲鄉老所薦。曰中庸。有高才而夭。曰中應。富辭業未第。曰中立。

登俊科。掌宣州記室。初君之終。諸孤等以筮之未從。而歲之不易。故藁葬君于南部。今龍集癸酉孟冬之己酉吉與姓會。始號奉靈輜。及二夫人之喪。克葬于雍丘縣陽夏長白岡之原。禮也。惟君感慨強濟。由徒步而取時譽。其術長于機變。而兼敦義烈。今天下積年。逋田許賦。他戶著于令。乃君所建。又邊民蔡靜恭者。父爲賊劉廷晏所殺。後廷晏仕契丹。爲涿州別校。靜恭旣壯。出塞斬之。以首祭父墓。君表其孝勇。章數上。靜恭卒。授三班奉職。其樹風竦善。他多此類。固當驚擊橫騰。騰夷夏而薄霄漢。終乃婆娑郎署。沈浮郡竹。外失貴臣之意。奄同萬物之盡。道遐運促。可勝嘆哉。然松心不彫。井德無改。剛腸勁節。終始彌厲。亦足以矯抗羣枉。詒燕後昆者焉。其孫休復。童牙有文。弱冠而仕。與余聯第榮牒。敦契鄉粉。具狀先猷。丐識圓石。罔獲辭拒。姑實其狀云。銘曰。日畿之藪。風夷土厚。秀龍乘乾。回岡包西。龜食告祥。牛眠啓後。葬君子兮。佳城備大夫之廣柳。物共盡兮。奈何。德有基兮。可久。岸爲谷兮。谷爲陵。期信辭兮。垂不朽。

宋故朝請大夫尚書工部郎中充天章閣待制上輕車都尉賜紫金魚裘彭城劉府君墓誌銘

景祐乙亥秋八月。天子制詔丞相曰。朕思得忠廉老成之人。參備顧問。其疇宜哉。僉曰。尚書工部郎中劉隨。有史魚之風。於陵之清。直方秉彝。節貫華皓。帝曰。愈翼。日以冬官待制。天章閣。褒言渥禮。形于書贊。搢紳動色。有得賢之賀。未涉旬。恙生心腹。日臻無損。越九月。旣望。家老奉祭衣。以號。東榮時髦端士。相與流涕。朝廷恤憐。厚賻終錄。孤之典。仲豫庚申。歸葬于開考城之黃城原。禮也。君字仲豫。其先漢楚元王之後。後十三代祖諱思立。仕唐爲右武侯大將軍襄武郡公。衣冠慶靈。宗牒詳具。大王父利賓。王父運。皆占籍睢

水烈考濟以石晉之擾始居神甸。逮君通貴累贈尚書刑部郎封妣侯氏爲永安縣太君。其高曾以還。亢宗避地之節。悉見于君自撰先人之誌。此皆不書。真宗景德初。君始以鄉秀詣春官覆試。使殿擢進士第。解巾連主安豐仁和二縣簿。又調倅永康之壁。屬邑令有受賕易死生之獄者。君正其誣枉。將抵令罪。漕使李士衡陰爲之請。君終不答。士衡怒密奏君苛矯非綏邊術。坐是代歸。仍閱冬集久之。補南劍州從事。丁內艱。服除。改大理丞。參主詳斷。時宮保文元晁公以重德處辭禁。朝夕獻納。雅知君風力強毅。手疏稱薦。因是出通判益州。益號會藩。故事非外朝臣不俾爲貳。洎貪君才劭。故以京司命之。延登臨遣恩禮。無殺就殿中丞移原州。今上繼明。轉太常博士。關掌河中府。未幾驛召換左正言。囊封盡規爲相國文穆王公不悅。會京府秋薦。命君遷察試席。入榮進士。有一辭異卷者。亦旣構訟。扶以爲疵。左邊掌濟州商筭。明年移監平陽郡。秩滿序涉左司諫。入計省爲戶部判官。賜緋魚。以疾上書得濟陽符竹政成。稍遷起居郎。判戶部勾院。未踰月改尚書刑部員外郎。兼御史知雜事。仍副都銓。九流之炳。加服金艾。涉基以兼官介銅監使務。明道建元遷秩七兵。是冬持節使龍庭。出塞冒霜露。足力攣痺。至其廬。單于命無重拜。還臺有司以爲不敏。降秋曹承務。典信州。尋復舊官。徙宣城郡。數月拜今秩。知應天府。兼付宮鑰。被召赴闕。再居地官之筵。裁半歲。乃貼禁嚴之職。凡歷官十三。受任十五。雖命有伸屈。而道無磷緇。精心強力。果于樹善。其佐幕于道江也。異政犖犖。最爲可述。軍有宣父祠。富人穿廟墻爲賈區。以出公算。君下車卽移書譙主者奪其地。春秋率博士弟子釋奠如常禮。由是裔民識師儒之教。壘中有李冰遺像。名載祀典。而遠方右

鬼因爲煩費。歲斂閭左出私錢以給賽。且至數千。皆先神精而後國賦。財用既積。官爲簿受。而吏得傍緣。乾沒。君尤之。曰。神賢者也。生以扞患利茲土。而沒以血食害斯民耶。非聰直之意。悉罷之。俗不爲井。食于江溪。霜嚴波澗。則水去軍署。亘二十里。硬缶係道。官民愁苦。君乃洞竹萬箇。引近山之泉。因地湧伏。徧注官寺。鑿空甃數十。儲華清以汲。鄴里舊城有疆域無雉堞。歲課民斬木爲虎落。地又多火。連蔓恐懼。君乃環植官柳數十萬。櫛比交錯。旣已限鬱攸之烈。又相壘以成。援人到于今賴之。岷源與沱川竝流。勢欲橫潰。君規治長堰二百丈。障狂波趨故道。自成都十三縣。竝免其危。西南夷以馬市邊關爲阻。僧所欺。君繩其宿奸。夷人悅服。及後以中傷罷去。鬢髮千餘人。遮使者車呼曰。我劉父何在。本部以聞。君始得再調。丞于鄉棘也。值李溥之劾。辭多詆譎。溥始以商利得幸。黨連貴要。至是牘背諭指。惡不悉暴。君上書卻其獄。究其姦態。有詔再訊。卒至重科。明邪翕翕。無少畏憚。居諫署也。志拾遺漏。以箴朝禁。教坊舉伶籍之缺。有命蜀部輸送善優。君建言聖主方追三代之隆。斂才聘士。孜孜如不及。奚復遷明詔求賤工。非所以廣德聲于天下。疏奏。帝悅。遣中黃門申諭。且勗以無後言之隱。莊獻太后敦外家之愛。幸小侯之第。上封援古。兩宮咸動。自是終其世不復再駕。他或譏其恩倖。修其善否。削藁奏御。尙數十百函。沃心中理。多蒙褒答。今參預貳卿。宋公之去內署也。以建白迂旨。換職守南都。君時副總憲綱。亟上言善人邦國之基。禮樂之宗。不宜外斥。以孤人望。事雖中寢。朝議寤之。四爲州藩。皆宣威導慈。推行靡密。大指破狡蠹。綏瘠瘼。防檢刀筆。下無能欺。便俗垂制。必圖終永。外臺倚重。常爲二千石表。出內風績。始終無懈。然剛腸寡偶。矢言好

盡根于忠義。折而不撓。凡所建明。必欲蹈遠猷而遺近利。是則希遷難進。其樹立使然耶。惜乎見識于後。凋之餘。開榮于晚節之會。道悠命局。終淪舛躓。不弔昊天。齋志沒地。嗚呼。春秋六十有五。先是君聘敵之。復也。有馬十五乘。悉上送官。主者因其外遷。不時還賜。及葬。輜庀具家資。窮絕。上聞之。特出庫錢一百二十萬。追酌其直。服勞處約。歿身彌顯。夫人張氏。以柔嘉輔作。啓壽昌爲湯沐邑。三兄曰洽。平巽。巽以君故。仕爲大邑佐。洽隱居。平早夭。一子孝忠。任大理評事。一孫慶餘。試祕書正字。僕與君篤鄉枌之契。接朝紳之舊。危言雅行。稔于心耳。又以嗣衰狀遺烈。見託斯文。輟慟含毫。辭實無愧。銘曰。噫嘻。仲豫志靡回。昂昂邦直。卿之材。飲冰樹政。惠可懷。握瑜屢黜。心無猜。生涯將究。時甫來。天意難忱。賢者衰。寧神降體。掩夜臺。琢辭沈碧。揚清埃。

宋故右班殿直郢州兵馬監押贈太子右清道率府平昌孟府君墓誌銘

府君諱仲宣。字坦之。其先出魯卿之宗。爲平昌望族。世系寔遠。不常厥居。土斷于梁。多歷年所。今爲開封人也。曾王父迪。王父守中。皆蹈道不仕。以貲徙于京邑。考處讓幼。號文敏。喜刀筆。初襁巾入公府。極右署。太宗皇帝毓德朱邸。尹正神縣。遴揀左右。宣贊音旨。繇是以閒練儀矩。改補王屬。出則先馬。入則侍帷。倚賴親信。宮臣欽矚。雍熙踐阼。以舊恩連宰劇邑。終洺州泲鄉令。君則其冢子。愿慤華穎。發于羈貫。及長。治書術。好文藻。嘗一貢春官氏。泲鄉之捐館也。占遺牘以聞上。天子憫焉。卽以君爲三班奉職。官未及蔭。而賞延于世。非常例也。君以父任。尤感慨。首公盡節。奉承王事。其間馳軔將命者十數。反無懈色。商功守局。

者凡再任多尤課以勞補右班殿直監兵于郢川咸平四年十二月二十三日不幸感疾啓手足于廨舍享年若干歲娶王氏晏氏皆早卒又繼室張氏二子曰陶曰某晏出也某未冠天闕陶天禧中擢進士乙科歷郡掾邑丞爲公卿慰薦遷祕書省著作郎今爲本省丞知扶溝縣初府君以廉儉宿業屈浮齡而無貴仕貽燕訓道造次必于儒者宜有慶善叢于後昆故祕丞襲是素基據厥休閒載質未幾通籍于朝今上東耕禮成以辛未詔書贈府君爲太子右清道率府率封張夫人爲永安縣太君綵衣承顏士林聳慕噫垂裕顯親之致其相爲美乎先是東部枌榆卜竊者重世矣祕丞君永懷先正藁葬之久又感故塋昭位之卑卽于所治改占塋域上書言狀有詔可焉參問耆龜得景祐甲戌十月癸酉惟卜吉于是奉府君及二夫人之柩合葬于扶溝縣之白馬原竭誠慎終禮無違者夫江源濫觴而派爲南紀臺與累土而高極九層前蔽世烈鬱抑憑厚發于來裔庸可度思嗚呼孟氏之子將光顯于時矣僕也不佞辱祕丞之知勤請斯文以誌幽隧銘曰君子含章蘊隆善祥安節効用其功弗揚志則藏兮令嗣追遠褒榮恤典肯構充聞其言克踐世將顯兮神革之畿連岡蔽虧寧神卜兆紀寶刊辭魂有知兮

墓記

宗室內園使忠州刺史殤子故右班殿直墓記

殿直諱克威無字始賜名且未冠也內園使忠州刺史承鑿之次子母曰臨淮君劉氏初宣祖之昭曰秦悼王之子曰保平軍節度使鄖國公德鈞鄖公卽忠州之烈考今上之諸從父也惟國積累憑厚固槃石

之宗。仙源慶祇。派分枝附。天子以爲三后之屬籍。九廟之孫謀。凡親親之恩。率過乎厚。于是殿直生三歲矣。未能勝衣。趨拜而服。庭臣之命。景祐甲戌五月癸酉。不幸天闕。卽權殯于佛祠。今官占告猷得乙亥孟春丁酉吉。因其庀尊屬之葬具。詔以殯禮祔焉。實汝州梁縣之先域也。噫。託封樹寧體魄。庶幾從乃祖于下乎。謹記。

宗室內園使貴州刺史殤子墓記

殤子者。宗室內園使貴州刺史承裔高密郡君韓氏之第五子。保平軍節度使鄖國公諱德鈞之諸孫。秦悼王之曾孫。天聖辛未生于宮邸。以景祐甲戌七月丁未卒。年四歲。初以貴州之愛。免懷辟咷。就嬉于姆保。故未及賜名。以皇支之蕃。辯族疏寵。次上于官簿。故未之逮祿。歲在乙亥正月丁酉。舉其襯祔窆于汝州梁縣之封兆。從大墓且吉卜也。夫承九廟之覆露。宜參麟趾犬牙之雜襲。苗而不秀。其命矣夫。表于幽阡。用篤終禮云爾。謹記。

宗室懷州刺史殤女墓記

故秦悼王之子曰高密郡王諱德恭。高密之子曰懷州刺史名承慶。懷州于今上有再從昆弟之倫。天祚所開。國姓蕃衍。殤女者卽懷州之配涇陽郡君和氏之所生。第在十一。景祐元年夏仲甲申。天子宮邸距始生凡三歲。卽以其月寓肯于延祥佛廟。天子至仁睦族。溝恩漏壤。每宗支遘戚。丘封藏事。必卹然加厚。辨圖按域。厭祭畢舉。窀穸就安。斯所以厚邦風篤天屬也。故因其諸母之葬。祔窆于汝州梁縣之先域。得

從祖歸全之義。嗚呼順哉。時二年正月丁酉。謹記。

祭文

祭孫僕射文

唐季俶擾。皇綱弗競。俗頽厥風。人菲其行。於皇時宋。天集大命。下武繼文。如周之盛。嚮學首善。稽古作聖。必有儒宗。緝隆醇政。公稟英粹。挺然天資。靈譽威鳳。瑞我昌時。含章履素。居中稟彝。仲尼既沒。文不在茲。有德可樂。爲邦家基。有道可尊。爲王者師。有行可法。爲生民規。有容可觀。爲朝廷儀。昔公始仕。墳籍是司。濟濟學徒。發篋樞衣。誦誦天族。學易受詩。乃升內閣。前席詢咨。直言正色。介然不移。德玉自潔。讒蠅莫緇。列藩偃息。風教下施。甘棠勿拜。去爲民思。聖皇纂御。累洽重熙。入居講勸。十稔于斯。義重師傅。多所發揮。典章禮樂。時庸稽疑。士任國用。授薦罔遺。君從人服。以其不私。日昃歲晏。眷然懷歸。引年還政。安居委蛇。進退合度。始終有宜。嗟嗟耆德。天不憖遺。邦殄瘁兮。人亡吾安。放兮哲萎。納書褒述。揆于禮闈。易名取善。與聖克齊。陽穀之野。汝水之涯。令嗣卜窳。神降來依。昌朝早以。譔材爲僚。東序。鷺蹇之價。重于一顧。曷堪厚知。猥煩清舉。暨玷經筵。公指館宇。嗣講舊編。叨榮懷慕。某本諸生。得游材館。示以槩模。假之羽翰。比名言路。抗章敷薦。陟被上庠。遂階清貫。撫躬悼恩。心誓旦旦。希言早歲。進擢左雍。授經王府。引籍殿中。中和晚進。被遇攸同。昔登學省。今傳皇宗。豈不懷德。銘此微躬。方阻門闈。各服官次。靡皇執紼。遐伸奠饋。靈兮如在。俯昭誠志。尙饗。

元憲集卷三十五

祝文

上辛祈穀祀昊天上帝文

斯民之生。實賴嘉穀。亦有高廩。國乃乂安。敢伸虔誠。仰祈昭昭。

冬至祀昊天太祖皇帝配位文

受命造邦。奄有區夏。配天立極。功冠百王。昭報之誠。敢忘祀事。

太宗皇帝配位文

繼昭聖德。載續武功。聲教誕敷。丕冒土宇。奉茲常祀。以昭獻誠。

南郊昊天上帝祝文

維景祐五年。歲次戊寅十一月癸巳朔十八日庚戌。嗣天子臣敢昭告于昊天上帝。伏以。燾育羣生。總握元命。降衷孚佑。明威有赫。司牧之重。實繫乃眷。升中備物。疇敢弗祗。臣猥承基圖。仰荷臨鑒。宇內方外。咸循厥理。天正二元。躬率郊報。序神綴食。用蠲大事。精誠所嚮。居敬靡忒。開錫純嘏。永綏兆居。謹以玉帛犧牲。粢盛庶品。備茲禋燎。祇薦虔心。皇伯祖考太祖。啓運立極。英武睿文。神德聖功。至明大孝皇帝。皇祖考太宗。至仁應道。神功聖德。文武睿烈。大明廣孝皇帝。配神作主。尙饗。

南郊皇地祇祝文

伏以博靜之宗。持載攸主。順配乾理。參儲靈命。廣生含厚。理絕名言。臣獲以冲眇。嗣膺宗緒。蕃釐所祐。日以靖嘉。歸報明察。不敢有貳。長景協序。庶物畢登。親陟泰時。肅將祀事。率典盡志。欽惟格思。無疆之休。申錫攸冀。

南郊配帝太祖皇帝祝文

恭以天有景祚。集于元聖。聖有成訓。垂厥後昆。於昭武功。建我炎統。勝殘去殺。輯寧戎夏。宏模顯道。燕詒罔極。施于寡昧。仰席慶靈。守成任重。日以增惕。敢緣類饗。陟配郊丘。親執豆籩。對越穹厚。孚佑敷錫。祈庇本支。

南郊配帝太宗皇帝祝文

伏以執競建猷。經世垂統。思文顯祖。丕烈是承。威戡桀鯨。恩涵動植。爲綱爲紀。遂安萬葉。曾是涼末。庇于孫謀。循規蹈常。罔敢寧逸。慶祚所衍。歲物載豐。虔修盛禮。禋宗類帝。迭配之重。抑惟茂典。庶無罪悔。以對神休。

后廟修築垣壇祭告土地文

伏以別廟闕清。外壩崇奧。蟻墉漏壤。雲錘戒徒。方亟繕完。慮奸禁忌。恭陳信祝。尙介神休。

繼照堂上梁祭告土地文

伏以京室寶區。聖真舊邸。夙標宏構。用志初潛。歲歷寢深。堂皇滋漏。俾從必葺。將慶惟新。適涓上棟之辰。敢肅柔祇之薦。庶資冥祐。永保靈基。

開汴口祭告文

繫厥輔渠。首茲經瀆。控引淮楚。餽漕京師。汴涵以時。開塞惟謹。方春之仲。疏派有常。圖興庶工。參倚靈眷。薦嘉達懇。用竚安流。

東太一宮立夏祝文四首

伏以天序乘離。風薰中律。瞻言靖館。夙駐奔精。祇率舊章。虔修孟祀。仰宮元之循度。鑒祝嘏以儲休。神道孔昭。民生永庇。

伏以天序布和。炎靈啓律。參幹大化。實惟尊神。至迎氣有常。備物茲恪。迪是繁祉。庇于羣生。精輝孔昭。鑒祐無忒。

惟神上棲太穹。參握靈紀。飛象所舍。純福是膺。歲時順祀。邦有常典。屬戒東序。虔率禮章。備物薦誠。允格聰鑒。伏以茂循星元。參宰乾幹。嘉氣儲福。是惟貴神。薦馨備物。厥有常事。茲屆邦典。紹修恭達。潔誠仰對。真御奔精。胙吉靈其格思。

狀

乞許汝州狀

臣聞事君之方。止于無隱。遂物之施。終于曲成。故下情靡不達之衷。人欲有必從之感。冒緣明訓。控述私
悰。中謝伏念。臣志局狷愚。藝文涼淺。偶偕鄉物。遂玷辭場。屬元聖之協華。預羣材之始隗。與于孤土。實在
甲科。首塵卿屬之榮。旋濫朝闈之籍。書林抱槧。久宿官成。財簿操籌。再承人乏。間亦質歲期而上課。循吏
格以懋勤。優踐諫曹。參司史注。繼獎雕蟲之技。入陪演綵之嚴。眷會光亨。品儀峻切。凡此冒居之地。率非
平進之階。每一內思。罔知攸處。將策名之始。已濫于衆先。而待賢之規。忍由于愚廢。固當瘞盡。少贖僥踰。
曾未效于寸長。輒更希于自便。蓋念臣幼鍾薄祐。長去先疇。僅存喬木之區。列占東畿之版。高曾以降。丘
壟未夷。惟臣二親。尙從橐葬。不孝之罪。陰罰寧逃。然撲築焯荆。歲時或爽。按圖辨位。昭穆寢疎。洊失耐于
故林。實介違于本兆。今者訪于輔郡。偶獲新阡。惟涓遠日之良。乃在此冬之首。必祈恩惠。親奉襄成。奈何
職局有羈。營綜多緒。俸泉仰給。月罕貲贏。僮指招呼。門無幹力。至乃歔衣靈輅之具。祭牢謳紉之儀。雖儉
則易周。而禮難或闕。並資豫辦。方克如期。事既痛于弗躬。室復嗟于終窆。併茲危迫。敢避干聞。臣欲乞于
許汝二州之中。知州一次。且謀道出。兼使家爲。上則指賜田之豐。易成假貸。下亦賴執衣之助。差減僦傭。
情報獲伸。幽明胥濟。伏望景祐體天法道。欽文聰武聖神孝德。皇帝陛下。容光燭隱。善貸垂慈。徇其出守
之行。訖乃事亡之舉。況臣叨塵近掖。已越再期。參攝事經。奉行辭訓。荷包荒于聖度。偶逃責于刑書。均是
微勞。理當外補。攷其劬農求瘼。察獄衰征。具有綱條。布于郡國。蓋治規之已定。雖愚者而可爲。內省闔蒙。
尙知遵守。儻遂一塵之請。誓堅九殞之酬。意窘言煩。視悻極交。干犯宸扈。臣無任祈天俟命之至。

序

送河南法掾張子野序

曩示以不肖冒冠羣材之籍同升之士數盈二百其知之深者則清河張子野在焉子野本公族世家席旂常鐘鼎之餘烈卓然異操發于童牙自弁髦爲諸生棄錦紈而襲韋布逾文雅韻根于粹質一上高第無矜色初命徒勞無愠容士友以是服其清和而期之久大是行也以闕憂家府再奉銓檄補河南法掾且參軍事涓日首路款余告別議者多惜其美才冲守再冉于諸曹之次然余有以陰拊于子者可略言之今相國彭城公躬寅亮之姿保釐西郊翹材開館延天下士又余友人集仙陳留謝希深負淵雲之藻田曹外郎樂安孫君貫流略之學竝肅給溫裕爲時吏師方左右台儀協贊留務愛賢樂善求之如不及則子就署之日雖欲埋照自晦羣公其舍諸惟逖聽薦章揚茂實于朝耳子姑奮神以慰離緒而已

諸公留題王氏中隱堂詩序

夫射者工乎中微拙于使人無己譽君子易于避俗難乎必時無我用此故尙書度支員外郎王君所以深厭物累而見縻人爵高風勝韻歿而可懷者已初君以蜀漢之秀聲馳士林含章緣儒爲世能吏且悼其去里之遠始移籍于關中英躔上腴歷選其奧結宇植援疏流藝竹踞窳窳岑蔚之勝別爲堂皇求志命名實曰中隱每車騎休沐牛酒過家則必釋朝綏而襲野巾卻赤烏以御山屐眄柯蔭樾舉觴嘯詠躊躇四顧爲之滿志回睨印綬若桁楊韁鎖之遺而朝貪其能願卒弗果于時鉅公名卿及士之賢者聞其

風而悅之。有若內樞丞相文康王公。親式段廬。刻逾文以榮屋壁。有若左馮貳卿潁川陳公。篤愛羊豎。灑妙墨以題齋榜。雍土傳誦。號爲二絕。自是今參預小司徒太原王公。謹守大宗伯北海晏公而下。竝賦清什。以旌高致。星稠霞駁。異采同煥。絲廉磐辨。殊音竝雅。不遠千里。寄聲代祝。此其素（案）此下原本缺

送成上人序

天聖戊辰歲。余嘗過候。故內閣中山公。始與公門友成上人者。交臂于席間。微言軟音。時落耳界。自是數與之會。而亟飲其和。且慕其畸于人而不與人異也。旣而中山出守淝上。師振錫而從之。藹然風期。深入法樂。一室命粟。有施飯之緣。四海彥威。領彌天之對。勝集未幾。宗工云亡。孤雲匪心。飛鳥隨翼。背淮千里。聿來上都。庚午冬。余茹憂去官。屏處寢內。思文惠然策足。顧我于幽憂之中。悲心所熏。病膜如刮。老龍死矣。空成麥戶之驚。泰山頽乎。彌感負牆之舊。斂容中悼。徘徊久之。示視世緣。益足多者。一日踵門告別。且求贈言。余曰。儒家者流。道詩書。服人倫足矣。安識夫方之外耶。而又京師苾芻。方以俗諦罪我。將焉用之。師曰。不也。塵勞之與道愛。其縛均焉。今夫誦貫花之書。服界稻之衣。崇布金之利。是種種者。于我法。乃捕魚取兔具耳。苟泥于此。雖吾師猶阿焉。彼求封之仁者何害。今將相造乎忘言之地。乃以言爲病耶。余感其勤。因敘其所以而爲之贈。

談苑序

故翰林楊文公大年。在真宗朝。掌內外制。有重名。爲一下學者所服。文辭之外。其博物殫見。又絕人遠甚。

故當時與其遊者。輒獲異聞奇說。門生故人。往往削牘藏弃。以爲談助。江夏黃鑑。唐卿者。文公之里人。有俊才。爲公獎重。幼在外舍。逮于成立。故唐卿所纂。比諸公爲多。余雖耳剽有年。而求本未獲。前年春始得其藁于宗人祕書郎敏求。祕書郎宜獻公之令嗣。宜獻與楊爲中表昆弟。文采風尚。皆一代之宗師。緒立所傳。可謂審而無媿。然按本錄。但雜抄旁記。交錯無次序。好事者相與名曰談藪。余因爲掇去重複。分爲二十目。勒成一十二卷。昔隋有楊松玠。紀南北朝事。已著此號行于世。今襲之。將爲後生所惑。輒改題曰楊公談苑。其間有云。公言某事云云者。皆黃志也。楊于國史自有傳。唐卿天聖中預修正史。位太常博士。直集賢院。年未四十卒。摺紳痛悼。余昔與之善。因詳錄之。慶歷丁亥孟春。中書後閣宋庠書。

右談苑計二十類。曰聖範。曰德量。曰風節。曰才品。曰武幹。曰奇逸。曰舊聞。曰記異。曰雜評。曰事志。曰正誤。曰名式。曰書藝。曰方技。曰敘釋。曰僭亂。曰豪侈。曰惡戒。曰戲謔。曰夷紀。共十二卷。

王侍郎集序

夫古君子之治性情。保純白。必有凝神寄適之地。以完天守。雖見異物。莫得而遷焉。故詹何老于餌魚。尙儂巧于承蜩。承福以坊間造父。以御達。彼皆自得于內。而不知老之將至。尙書兵部侍郎太原王君之。于詩也。亦猶是焉。惟君樂易清和。膚敏肅給。由咸平中。名在秀牒。聲馳士林。脫巾逢辰。累課通籍。推行緣飾。皆本儒雅。標尙所寄。于詩尤邃。臺閣髦彥。居多斬嚮。君亦操清機。夔妙境。求仁斯得。不撻世務。其間雖登高感別。臨年悼往。或鞅掌官下。或淒涼酒所。春庚秋蟀之候。芳茗宿莽之變。莫不造與端緒。揣倅聲色。悲

欣萬態。一納于風什。警音秀句。隨意所指。其雋如破的。其熟如奏刀。當茲之時。誠有三旌之招。萬鍾之豐。不吾易也。故君興逢掖。至鳴佩補吏三紀。默焉難逮。隱侯握臂。南宮白首。區區榮悴。攻中焚和。卒莫能緣。憂端犯六腑者。信其詩爲蔽矣。若夫指事之的。切賡歌之婉媚。衆體參具。餘絢相鮮。皆可以粉澤中情。衣被來者。至于玩而無斃。味之逾旨。則啓卷者可知。不待贊而顯。僕曩自童齒。事君子無容之黨。優評定價。均于著蔡。及此承命。且俾冠篇。銜知感舊。欣榮參半。因輒推君之所以好速名之所以立。皆詳言之。亦康成譜詩之義也。凡古律若干首。離爲若干卷。列于左方云。

元憲集卷三十六

記

台州嘉祐院記

建塔廟。散香華。奉經典。攝受妄迷。而爲功德。有爲者爲之。雖然。佛滅度二千年。世與法交相喪。濁劫下根。誑爲愚冥。非廣示像法。無以震動而傾駭之。使趨善良。神道化時。叵得而已。沙門長吉。當茲世爲功德者也。初師以釋子之秀。來上都。會譯場。高選義學僧。敷演祖教。名在籍右。始與龍象爲徒。而覺華餘光。注射物境。頗作歌詩雜擬。輒自翼其宗。由是益爲人聞。俄詔賜紫方袍。號梵才大師。勝流欽風。多所延供。久之。厭著謝去。復山林之遊。歲在降婁。始還台州。州守悅其風。虛淨名菴。以舍之。惟師行嚴而身修。寓曠而氣安。能示方便。悅可大衆。居三年。道益光明。台人異焉。捐金抵壁。踵往瞻事。四方來者。與麻葦俱。乃闢精廬。而肆之。刊林衡。鏤巖椒。棘如而堂。蝟如而庭者。且數百筵。朝薰夜祓。供擬尤具。九年復作一成臺。置大般若經三百篇。及刻千劫佛像。彼貨與力。不募自至。弗可貲紀。師復砭膚取血。書維摩經質神爲要。又欲推慧命而廣之。乃謀于公卿大人。于是龍圖閣直學士南陽葉君。倡始籲謀。分繕寶典。凡臺閣方面知名士數十族。叢喜造捨。滲然寫庸。閱三年。臺成。約金奉像。皮而安之。黑白相趨。距躍圍繞。以爲去聖滋遠。有能駕其說。植德于人。令夫威神巍巍。現前如親。炙面命不在是經乎。因是經讀誦悟入。培五繹。泯空色。攪萬

異爲一眞。其爲福又可稱量耶。僕頃與師遊。樂其誓願之就。且枉錫顧我。丐辭以永傳。因宣是義而偈之。曰。臺屹而崇。摧我慢而恭兮。經華而精。竦我怠而誠兮。像嚴而顯。破吾魔而善兮。報我四恩。常不滅而存兮。師聞之。謂余言爲信。若其營綜之烈。投施之衆。日月之謹。大槩具之。至夫筆不可文。言不能宣者。僕與師均寄一歎而已。

緹巾集記

余幼學爲文。尤嗜篇什。而不能工也。然性習所牽。爲之不已。往往應和出諸公間。輒爲名公訓獎。余與子京初試吏罷歸中山。劉公子儀見索近詩。因各獻一編。他日劉公取當世文士古律詩作句。置齋中人。不過一兩聯。惟余兄弟所作。獨占三十餘聯。自是劉公深加訓獎。雖叨課雜發。巨以歲月。然每自陋其辭。未嘗綴緹。叢章墮藁。亡逸頗多。一日忽得新舊詩十餘卷于几案間。乃小兒充國等所次覽之。不覺掩口胡盧而笑。謂之曰。此燕石也。與瓦甃無異。雖緹巾什襲。庸足寶乎。命亟去之。兒曹懇祈留于舍中。弗廣布也。因取持藁近侍。出入藩輔。至守鄭日所賦。姑爲限斷。兼以志擁施之歲云。凡五百餘首。勒成十二卷。命曰緹巾集。莒國公記。

碑銘

成都府新建漢文翁祠堂碑銘

蜀之廟食千五百年不絕者。秦李公冰漢文公翁兩祠而已。冰爲蜀鑿離堆。逐悍水以溉。所及常無旱年。西人德之。因言冰身與水怪鬪。怪不勝死。自是江無暴流。蛟蜃怖藏。人恬以生。故侈大房殿。歲擊羊豕雉。

魚伐鼓嘯籥。傾數十州之人。人得侍祠奔走。鼓舞以娛悅神。祝已傳嘏而後敢安。翁之治蜀。開學校。以詩書教人。澡熨故俗。長長少少。親親尊尊。百姓順賴。其後司馬相如。王褒揚雄。以文章倡。張寬以博聞顯。嚴遵李仲元。以有道稱。何武入爲三公。漢家號令典章。赫然與三代等。蜀有儒自公始。班固言之既詳。初公爲禮殿。以舍孔子及七十二子之像。殿右廡作石室。舍公像于中。晚漢學禁。有守曰高。朕能興完之。後人又作朕像。進偶公室。歲時長吏率掾屬諸生。奉籩豆饗醪薦于前。虔踧謹潔。一再奠而退。辭無敢不信焉。冰以功。公以德。功易見。德難知。故祀雖偕而優狹異焉。嘉祐二年。余知益州。往款公祠。至則區位湫隘。埃蝕垢蒙。不稱所聞。大懼禮益懈忽。神弗臨享。其明年乃占學宮之西。正位鳩工。弗亟弗遲。作室三楹。張左右序。及獻廡。大抵若干間。布尋以度堂。累常以度庭。疏牕以快顯。壯闔以嚴閉。采有青丹。陛有級夷。瓦密棟彊。若棘若飛。乃肖公像于廳間。繪相如等于東西壁。本古學之復。莫若朕。本今學之盛。莫若樞密直學士蔣公堂。故繪二公于其間。皆配祠焉。于是擇日告成于神。揖而升。簞罍果滫。脯脩紛羅。而有容。可以告虔。趨而降。纛尊巾洗。席燎竝施而不慮。可以盡儀。相者循循。任者舒舒。禮生于嚴廣。靈安于閒寂。故也。噫。自公之來。蜀之人自視若鄒魯。宋興名臣鉅公。踵相逮于朝。先帝時。巨盜再作亂。弄庫兵。爭劍閣。是時蜀豪英無一汗賊者。羣頑愁窳。不容喘而滅。非人好忠家知孝。使然耶。所使然者。不自公歟。傳曰。非此族也。不在祀典。公在之矣。則是祠之作。願自余而古。無俾壤息云。祠之興。同尙之賢。則轉運使趙抃及提點刑獄使者凡三人。贊輔之勤。自通判軍州事祝諮以降。六人。營董之勞。自兵馬都監毛永保而下二人。咸畫

像于西廂。列官里于石陰。云銘曰。公二千石兮守大邦。冠峩峩兮紱斯皇。出有瑞節兮車騎羅。石室孔卑兮人謂何。新堂翼兮耽耽。庭廣直兮序巖巖。吏奉承兮不諱。神來格兮此其家。儼羣賢兮竝陳。公所教兮如其仁。庖魚脰兮俎肉鮮。神來享兮憺蜿蜒。公教在人兮無有頗。蜀賢不乏兮才日多。俗祥順兮孝慈公。祀百世兮庸可知。

連珠

連珠一首

山有榲桲之材。居山者芟草而舍。田有禾稷之實。力田者半菽而飽。廐有驥騄之乘。掌廐者羸股而步。此所謂役于物者。智不逮乎物也。無木者有華榱之蔭。無田者有嘉穀之享。無廐者有上駟之御。此所謂役物者。智包乎物也。故君子逸于用德。小人勞于用力。

論

丙吉論

昔丙吉之相漢也。出見死傷而不問。見牛喘而問之。人或譏焉。吉曰。人鬪相殺。長安令京兆尹之職。歲盡丞相課其殿最。奏行賞罰而已。丞相不親小事。非所以道路問也。方春少陽用事。未可暑。恐牛近行用暑而喘。此時氣失節。三公典調陰陽。職當所憂。是以問爾。播厥前史。著爲話言。流風未渝。來者皆效。余恐慕其名而失其實。誑于前而惑于後也。可無辯哉。請舉其略。萬物紛錯。最靈者人。二氣休咎。所感者政。人和

于下。則天從于上。政敗于國。則氣沴于時。孝婦就刑。三歲爲之不雨。冤囚呼獄。九夏以之降霜。且匹庶存誠。猶足感天地之怒。而普率在御。能無損陰陽之和。由斯而談。則羣鬪死傷。非小事也。牛近而喘。非精察也。漢家之制。丞相無所不統。上則建道德。明禮樂。以輔天子。次則乘法令。申詔條。以率百官。下則省征徭。恤鰥寡。以綏萬姓。傳曰。天子之宰。通于四海。其是之謂乎。非若占筮卜祝之流。區區以陰陽爲職也。夫死傷橫路。是生殺之不禁。生殺不禁。是教化之不立。教化不立。然後陰陽失其序。陰陽失其序。然後寒暑乖其方。寒暑既乖。則萬物皆失其性矣。寧惟牛喘乎。吉徒知暑近而失時。不知政敗而傷氣。徒知小事之不知。不知庶職之已墮。昔一人向隅。堂上爲之不樂。一物失所。隍中爲之軫慮。況殭尸蔽道。生民絕命。內無惻隱之志。外無賞罰之令。乃曰待歲盡。以舉殿最。則冤濫之積。所傷多矣。愆伏之患。其防後矣。武王扇暍。事非大惠。而天下歸其仁。成湯祝網。理非宏業。而海內從其命。若吉之意。則二聖者不當于道路問也。必謂一畜之喘。可辨乎寒暑。則良民之死。反不害于陰陽。斯益見慕變理之虛名。失彌綸之大要。言無所據。事無所稽。玷經邦論道之猷。取貴畜賤人之責。詩曰。白圭之玷。尚可磨也。斯言之玷。不可爲也。其丙吉之謂乎。後之者或以不攬物務爲高。不治政事爲達。生靈殄瘁。移過于有司。巖廊拱默。自安于高位。晉魏而下。清談喪國者。未必不源于是也。可譏也哉。故牛喘之祥。由人事而來也。爲國者未有先寒暑而後敷政教。余又不知問喘之後。欲何術以調之。必若推精禳之源。攷幽顯之效。解二氣之相沴。通四時之大順。非求之于政。視之于民。則無以動天地而感陰陽。平邦國躋仁壽。今吉舍敗政而不問。而欲氣之順。若雖伊

臯弗能也。見死命而不恤。而望時之和。若雖稷契弗能也。舍本徇末。何其悖哉。

說

蠶說

里有織婦。著簪葛帔。顏色憔悴。喟然而讓于蠶曰。余工女也。惟化治絲枲是司。惟服勤組紉是力。世受蠶事。以蕃天財。爾之未生。余則浴而種以俟。爾之既育。余則飭其器以祇事。爾食有節。余則采柔桑以薦焉。爾處不恩。余則弭溫室以養焉。爾惟有神。余則燭其祀而未嘗黷也。爾惟欲繭。余則趣其時而不敢慢也。爾欲顯素絲之潔。余則具繰盆澤器以奉之。爾欲利布幅之德。余則操鳴機密杼以成之。春夏之勤。髮蓬不及膏。秋冬之織。手胼無所代。余之于子。可謂殫其力矣。今天下文繡被牆屋。余卒歲無褐。緹帛嬰犬馬。余終身恤緯。寧我未究其術。將爾忘力于我耶。蠶應之曰。嘻。余雖微生。亦稟元氣。上符龍精。下同馬類。嘗在上世。寢皮食肉。未知爲冠冕衣裳之等也。未知禦雪霜風雨之具也。當斯之時。余得與蠕動之儔。相忘于生生之域。蠢然無見象之樂。熙然無就烹之苦。自大道既隱。聖人成能。先蠶氏利我之生。蕃我以術。因絲以代蠶。因帛以易韋。幼者不寒。老者不病。自是民患弭而余生殘矣。然自五帝以降。雖天子之后。不敢加尊于我。每歲命元日。親率嬪御。祀于北郊。築宮臨川。獻繭成服。非天子宗廟黼黻無所備。非禮樂車服旂常無所設。非供祀無制幣。非聘賢無束帛。至織至悉。衣被萬物。女子無貴賤。皆盡心于蠶。是以四海之大。億民之衆。無游手而有餘帛矣。秦漢而下。本搖末蕩。樹奢靡以廣君欲。開利塗以窮民力。雲錦縠縠之

巧歲變霜。執冰綃之名。日出親桑之禮。頽于上。災身之服。流于下。倡人孽妾。被后飾而內閑中者。以千計。桀民大賈。僭君服以游天下者。非百數。一室御績。而千屋垂繒。十人漂絮。而萬夫挾纊。雖使蠶被于野。繭盈于車。朝收暮成。猶不能給。況役少以奉衆。破實而爲華哉。方且規規然重商人衣絲之條。罷齊官貢服之職。衣弋綈以示儉。襲大練而去華。是猶捧由堦尾閭之深。覆杯救崑岡之烈。波驚風動。誰能禦之。由斯而談。則余之功。非欲厚嗇身以侈物化。勢使然也。二者交墜于道。奚獨怒我哉。且古姜姬太妃。皆執子之勤。今欲以一己之勞而讓。我過矣。于是織婦不能詰。而終身寒云。